

# 廣說鈴

一名

十五家閱世奇談



上海

進化書局發行

上海图书馆藏书



A541 212 0009 53678

廣說鈴目錄

上卷

羅提督

宰白鴨

買柴媪子

辯才可畏

異香

劫婚案

賣荷包

藕絲帳

木工弟

捕快曹福

廣說鈴 目錄

草毒

袁癡

賈義士

石灰擒虎

皮夾中字畫

神力

史酒徒

何義門

風水

子曰



獄囚囚官

種銀子

袁體菴

跳白船

出世入世

馮鐵頭

武進盜案

寶爾敦

阿里瑪

延師課賭

一

竊賊之詭計

代嫁

甘鳳池

拳勇

鬪力鬪智

越人倪某

蔣中丞

騙婿

雪媒

吳孝子

師戒

足有赤痣

武夫不知文字

鐵肚皮

瓦盆

青鳥術

蔡錫

過期當票

石中雉雞

畫眉楊

剛剛奪黍

畫怪

賣竈

蜀婦

籠絡名幕

偷畫

圓光

譎判

大通余翁

千金亭

褚祚典

弔喪

拳法

文字三鑒

訟師

下卷

鳥識字

逃災女子

葉天士遺事

露天燒飯法

醫貧

沙七

夢葫蘆

白帽子

高二爸

黎世序

鬻花瓶

銅鶴銅鑪

皮毬

鶉

沙彌思老虎

高參領

某廣文

超勇公軼事

褚復生

卜者梁翁

蟻陣

六指人冤獄

甲與乙爲善友

某先達

一文錢

某甲

某銅匠

乩仙

介溪墳

三斗漢

癡女子

顧鶴鳴

測字

牆洞解元

盜舟對聯

石異

于廟祈夢

科場事

年羹堯

董邦達

鏡聽

蘭蠶

乞丐作聯

譚襄敏夫人

婢女代嫁

潘封翁

定數

茄字

紀文達

祈夢

汪狀元詳夢

鄭仰田拆字

瓦卜

長洲周某

范時行

韓慕廬祈籤

神籤預兆

求籤

術數之奇

扶乩奇驗

十七字詩

對語敏捷

解大紳

十三閣老

劍俠

江慎修

骨董店

賣蒲扇

夢馬言

古人轉世

卜者之謬妄

庸醫

翁覃谿

少林寺僧

寶石

象尊牛鼎

買東西

戲咒真死

淨慈寺匾額

山東朱翁

戲變

廣說鈴目錄





# 廣說鈴上卷

## 羅提督

東鄉羅提督思舉戰功。見於魏默深州牧源聖武記者詳矣。偶閱周芸臯觀察富陽凱所述逸事。其智能亦自可稱。非徒以武力雄一時也。公嘗率兵入南山搜餘賊。村人苦猴。羣盜食田糧。晨必發大器驚之。公問故。令獲一猴來。薙其毛。畫面爲大眼。諸醜怪狀。銜其口。明晨。俟羣猴來。縱之去。皆驚走。猴故其羣也。急相逐。益驚。越山數十重。後不復至。官夔州遊擊。夔關臨峽。山水迅急。瞬息千里。鹽梟及販鬻人口者。至。則鳴金叫呼。越關以過。船皆設礮械。兩旁繫大竹。彎如弓。他船追及。斷繫發之。船必覆。人莫敢攖。公募善泅者。持利鋸。匿上流水。俟船附而鋸其舵。抵關適斷。船不能行。觸石破。盡獲之。又有巨惡某。唆訟。守欲得之以屬公。公佯不悅。曰。是文官事。何語我。夜踰垣入其室。見所爲草狀及稿。匿出。使數人候門外。復入啓扃。人稿俱獲。曰。昨所以不許者。彼耳目衆。欲令不爲備也。冷廬雜識

## 蕈毒

寒山寺在姑蘇城外。唐人詩已屢屢見之。千餘歲來。爲吳下一大禪院。道光年間。寺僧之老者弱者住持者過客者。共一百四十餘人。忽一日盡死。寺中旣已無人。鄉保爲之報縣。縣令前來相驗。適一竈下養死而復蘇。縣令問諸僧。今日食何物。對曰。食麵。縣令復詳詢煮麵之人。與澆麵之湯。竈下養對曰。今日值方丈和尚生日。特設素麵以供諸僧。我適見後園中有蕈二枚。紫色鮮豔。其大徑尺。因搗以調羹澆湯。但覺其香味鮮美異常。未及親嘗。忽然頭昏倒地。不省人事。今甫醒而始知諸僧食麵死矣。不知是何故也。縣令使導至後園採蕈處。則復見有蕈二枚。其大如扇。鮮豔無匹。命役摘蕈。蕈下有兩大穴。縣令復集夫役持鋤。循其穴而發掘之。丈餘以下。見有赤練蛇大小數百尾。有長至數丈者。有頭大如巨盃者。蓋兩穴口爲衆蛇出入之所。蕈乃蛇之毒氣所噓。以自蔽其穴者。諸僧旣皆食之。故無一生。竈下養僅嗅其香味。故幸而復蘇。縣令乃命儲火種。發烏槍。一舉焚之。蛇之種類盡滅。而寒山寺由此亦

## 獄囚囚官

各郡縣獄中重囚。例皆鐐其足而桎其手。鉗其口而鎖其頸。晚近獄規不肅。每一囚入獄。獄卒皆有例定規費。僅於州縣典史巡獄時。爲上刑具。官去卽便弛之。習以爲常。官亦知之而不深究也。廣東有某縣令。欲察獄中積弊。一日屏去儀從。突入獄中。獄卒未及知也。獄囚百餘人。見之曰。汝來甚善。羣起縛縣令。宣言曰。官欲出獄。須縱我輩百餘人。與之同出。如門外人有來前者。我輩先扼殺縣官以待死。均之死耳。與其束手而死。不如與官同死。復連縛獄卒數人。有餉縣令飲食者。獄囚數人傳遞而入。獄囚口糧。或不時給。則亦絕官舖餼以相抵。縣中幕吏。皆無如之何。典史至門外。遙呼獄囚。始而婉諭。繼而哀祈。囚皆不應。不得已稟達郡守。郡守親自赴縣。至獄外諭囚曰。縣令自到任後。並未苛待汝等。汝等入獄。皆在前令手中。今如致縣令於死。汝等罪名益重。豈得倖全。不如速釋縣令。汝等有冤抑者。必爲伸理。其犯重辟者。亦

當設法超拔。決不汝欺也。獄囚皆曰。今日我輩與縣官出則同出。死則同死。不必多言。郡守徘徊莫措。相持已及旬日。恐縣令死於獄中。釀成重案。不得已密稟大府。請發兵兩營到縣。許赦囚罪。盡縱出獄。囚復言當攜官同行五十里。至某山頭。方能釋官。亦許之。獄門既啓。羣囚擁縣令。驩呼疾走。官吏尾之而行。行五十里。至某山頭。囚乃釋縣令。欲遂分道颺去。官兵伏隘以待。四面兜圍。百餘人皆就擒。惟逸去三人而已。郡守縣令。攜囚回城。盡法懲治。加以酷刑。死於杖下者二十餘人。其餘皆從重擬罪。尅期處決。此光緒六年事也。夫蛟龍失水。螻蟻困之。縣令之所以威伸令行者。以有堂皇儀仗之尊嚴。吏卒僕隸之擁衛耳。微行入獄。俾獄卒等不及掩其弊。用意非不勤也。不幸逢意外之變。致蹈危機。遭僇辱。吁。爲官者可不慎哉。庸庵筆記

### 宰白鴨

福建漳泉二府。頂兇之案極多。富戶殺人。出多金給貧者代之抵死。雖有廉明之官。率受其蔽。所謂宰白鴨也。先大夫在臬局。嘗訊一鬪殺案。正兇年甫十六歲。檢屍格

則傷有十餘處。非一人所能爲。且年稚弱。似亦非力所能爲。提取覆訊。則供口滔滔。汨汨。與詳文無絲忽差。再令覆述。一字不誤。蓋讀之熟矣。加以駁詰。矢口不移。再四開導。始垂泣稱冤。卽所謂白鴨者也。乃駁回縣更訊。未幾。縣又頂詳。仍照前議。再提犯問之。則斷斷不肯翻供矣。他委員噴先大夫之迂。逕行提訊。遂如縣詳定案。比臬使過堂問之。仍執前供。因訊爾年紀甚輕。安能下此毒手。則對曰。恨極耳。案定後。發還縣。先大夫遇諸門。問曰。爾何故如是執之堅。則涕泗曰。極感公解網恩。然發回之後。縣官更加酷刑。求死不得。父母又來罵曰。賣爾之錢已用盡。爾乃翻供以害父母乎。若出獄。必處爾死。我思進退皆死。無寧順父母而死耳。先大夫亦爲之淚下。遂辭讞局差。噫。福建人命案。每年不下百數十起。如此類者。良亦不少。爲民牧者。如何忍此心也。庸閒齋筆記

## 袁癡

袁丹叔先生國梓。文章爾雅。而性癡絕。人皆以袁癡目之。自郡守解組歸。居於葺城。

屋濱大河。鄉人每泊糞船於門外。先生惡之。乃買羊肉一拌。密置河畔。鄉人擔糞歸。將飯。見肉疑爲人所遺者。大喜。亟啖之。先生俟食訖。乃至岸側。佯爲周視。故作喜狀。曰。這畜生今日必死矣。鄉人驚問故。則曰。此地有惡狗。吾買砒霜置肉內毒之。今旣食。除一害矣。鄉人大恐。承係己食。懇其救解。先生佯驚曰。我毒狗不毒人。此係爾自作之孽。非我罪過。鄉人愈哀懇。至涕泗。乃指糞曰。亟啖此。或可解。鄉人畏死。從之。大吐委頓。則撫掌笑曰。爾他日仍泊船於此。當令再吃糞也。一日立於門前。適府公遣僕奉書於先生。僕見先生不識也。因詢曰。此間有一袁癡。居何處。先生引之至家。攜書入。良久什襲一巨函出。交僕曰。此係寶物。爾主向借。不能不與。爾主書中言。惟爾誠實可靠。須親攜去。毋易人。致損壞。鄭重言之再三。僕負之歸。物已重。路又遠。汗流浹背。府公見之不解。拆封。乃一粗石。重二十餘斤。上書十六字曰。尊价無禮。呼我袁癡。無法處治。以石壓之。府公大笑。卽其僕亦自笑也。庸閒齋筆記

種銀子

塔院僧性鄙恠。不念法華經。不理梁王懺。腌臢可厭。有江西客來寓間。以酒肉啖僧。頗相得。後密謂曰。我習種銀術。欲助汝。汝有意乎。僧問何謂。曰。以銀埋地。有符籙拜禱法。閱七日。一可得十。僧未信。姑付銀一。邀其種。客禹步庭前。喃喃作咒語。掘地埋之。扃戶出。囑弗窺探。至期啓視。則粲然者十矣。僧大喜投地曰。可多種乎。曰。何不可。母多則子愈多。唯紙鏹亦須多焚耳。僧乃罄其已之所有。又將衣帽及鐘磬鐃鈸之屬。盡質於典。不足。復借隣寺之鐘磬鐃鈸。亦質於典。侵曉詣城買紙鏹數十千。欣欣付客作法。客如前狀。闌然扃戶。至明午。客亡。兩三日無迹。急掘所藏。則零磚碎瓦而已。僧搶呼欲絕。後十餘年。復有外科醫徐甲者。傳種洋錢事。遇賺略同僧。而所賺更多。故徐之盈門索債。亦倍於僧。明齋識小

### 買柴媪子

有買柴老媪。挈其子入城。至一富家。其子年十八九。未娶也。富家適有隔夜冷粥一盂。有蜈蚣死其中。議棄之於河。其子正苦餒。卽曰。此不足爲患。乃以指捉去蜈蚣。而

噉之立盡。富家有女。睨之而笑。其子以爲悅己也。歸而思之不置。遂成疾。日以羸瘦。幾不起矣。媪知其情。偶以語富家之婢。遂達於女。女曰。然則速召此子來。其子甚喜。力疾奔赴。女一見大罵曰。天下有此妄人邪。我見汝飢不擇食。是故哂之。汝敢遽萌妄想乎。命媪婢輩批其頰數十。其子叩頭服罪。始叱之出。及歸。病若失矣。耳郵

### 賈義士

賈義士。逸其名。山西汾州人。挾其貲以放債營利。往往徧天下。義士嘗之楚之安陸。安陸人樊疑者。方設藥肆市中。義士貸其貲。而依以居。甚相得也。疑長義士十一歲。呼義士爲弟。居年餘。疑病將卒。謂義士曰。始吾以營業乏資。勢且殆矣。自弟來吾家。家中小裕。弟之視余猶兄也。今不幸。中道分離。吾死。以妻子累若矣。義士涕泣許諾。疑婦某有殊色。性狡而淫。疑亡未三月。卽思卷其資他適。邑有李監生者。豔婦色。且利其重資。遽遣冰往。旣成說矣。樊氏宗族羣起爭之。不得。則請終其喪。弗許。請待期月。亦弗許。義士從容諷以大義。婦恚曰。若何人斯。而亦欲與吾家事。吾且還若資。遂



若出矣。義士不敢復言。然居常忽忽不欲生。數日亦遂病。病七日。躍然起曰。吾得之矣。走告婦曰。而果欲嫁乎。而家簿籍經管。而貲大半吾所貸。若以償。而所餘貲幾何。且而有子在。將使安歸乎。吾在此。正苦岑寂。欲謀家室久矣。而若爲吾婦。是而喪夫有夫。肆中事皆可無改。卽而子可爲吾子。豈非兩全之道。婦大喜。遂與李氏絕婚。諷吉與義士成婚。李氏爭之。將控官。義士使人婉告之曰。某氏與賈相處久。今將却原聘。而琵琶別抱。其情可知。君焉用此不廉婦爲。李氏亦頓悟而止。由是安陸人莫不詈義士。而笑樊疑之所託非人焉。及成婚。義士盛設筵宴。招其鄉親。與飲大醉。夜漏已深。義士玉山頽矣。衆相與扶入洞房。覆以香衾而去。婦遣女僕出。卸裝就枕。撼之不醒。低聲呼之。則鼾聲齁齁作矣。婦輾轉不能成寐。乃赤身以下體暱就之。義士驚覺。小語曰。佳人愛我哉。語甫畢。沈沈睡去。無何。鷄旣鳴矣。義士急起曰。昨日余眞大醉乎。今某夥將赴廣州市藥。尙有一事未處置。舟得毋已發乎。曳履而出。自是遂託病酒。常宿於外。婦使人邀之不得。數月。婦不能堪。詬詈交作。義士使人爲好語謝之。

曰。屬有微恙。故久使汝孤另。疾愈。當就汝。又數月。婦已微窺其意。乃出素離婚書。義士約以明日。次日。值疑忌辰。義士早起。具衣冠。三揖疑之靈而告之曰。弟受兄重寄。所不能成事以報兄者。鬼神有知。罰及其躬。顧婦曰。汝向謂吾異鄉人。難與汝家事。今汝爲吾婦。得制汝否。乃執婦。裸而懸諸梁。拔佩刀。割取臀肉。熾炭於爐。炙之。陳於靈几。復三揖曰。無恥婦。敗兄家風。請兄食其肉。弟亦陪兄一嚮。因取啖之。且啖且詈。婦哀號乞命。乃幽之樓上。鑿一竇以通飲食。如是者十年。婦已四十。其子年十八。義士有所善王貢士者。有女。義士爲樊子聘爲婦。遣往從學。晝營生業。夜則課樊子讀書。數年入於庠。乃涓吉完婚。爲酒食以召鄉黨。樊氏宗族畢會。樂作。義士乃言曰。吾爲樊兄所託。非娶婦不足以制其死命。十年假夫妻。受人唾罵。期成事以報樊兄也。今兒幸成立。婦亦老不復嫁。吾今年四十有七。尙無子。吾妻獨居。爲樊兄故。遲我十年。今將歸而生子矣。出一籍付其子曰。若父遺貲數百。今已贏數千。謹守之。無忘乃父創業艱難也。旣而慨然泣下曰。樊兄樊兄。今而後可以瞑目於地下矣。遂卽日僱

驟車輦行李上道。樊子涕泣留之不得。乃分與千金。揮手不顧而去。於是安陸之人爭嘆樊疑之能知人。而交口頌賈君之賢。曰義士義士。埋憂集

### 袁體庵

明末高郵有袁體菴者。神醫也。有舉子舉於鄉。喜極發狂。笑不止。求體菴診之。驚曰。疾不可爲矣。不以旬數矣。子宜急歸。遲恐不及也。若道過鎮江。必更求何氏診之。遂以一書寄何。其人至鎮江而疾已愈。以書致何。何以書示其人曰。某公喜極而狂。喜則心竅開張。而不可復合。非藥石之所能治也。故動以危苦之心。懼之以死。令其憂愁抑鬱。則心竅閉。至鎮江當已愈矣。其人見之。北面再拜而去。吁亦神矣。廣陽雜記

### 辯才可畏

長興徐令。初下車。頗風利。每收呈。必摘呈中語面詰之。倘所對稍有參差。輕則擲還。重且扑責。其意蓋以示能也。有明經某者。平日把持邑中事。吏胥咸畏之。令亦前知其爲人。思欲痛懲之。而未有間。明經亦知令將與己爲難。適會有事。訟之縣。乃自懷

呈往。是日具呈者約百餘人。吏胥以明經呈置第一。意令出先詰數語。即可放之去。以免滋事也。俄而令升堂。人皆跪而待命。令見明經呈。即置之末。而每閱一呈。必呼一人前。絮絮問不休。欲令久跪以折挫之。明經意頗不耐。然尙無隙可乘。少頃。令摘其冠置案上。而以手搔髮際。明經見之。即蹶然起。令怒曰。汝衣冠中人。奈何不知規矩。公堂之上。容汝長立不跪乎。明經乃以手指其頭曰。汝先無規矩矣。世豈有不衣冠而臨民之理。言已。掉臂出。令竟無如之何。後中以他事。卒至兩敗。觀此。知臨民不可以不慎也。後在中州。白夢香亦言。今上初年。釐正品級。凡生員帽頂。例用銀。河南一劣生。以事至縣。而戴金頂。令指其頂。而嗔其違制。劣生曰。生員家貧無銀。故用銅。若以此爲違制。則父臺已先之矣。何責生員。令愈怒曰。吾何嘗違制。劣生曰。按例父臺之頂。宜用金。今果金也者。以責生員可也。否則生員不獨任違制之罪也。敢請以其頂俾生員驗之。令語塞。竟不能復措一辭。此更可供一笑也。印雪軒

## 石灰擒虎

仁和縣志。載明成化時。湖墅凌知州煜家。有一黃班虎。自南河游至。投凌之後巷。諸門不閉。虎入據廳上。大吼一聲。凌衆破壁逃避。虎遂登樓。時凌之孫婦。抱嬰兒未起。虎偶捱壁。壁倒。適覆婦身。不遭傷害。地方奔告有司。卽召獵戶二十餘人。擒剿彼此相顧失色。無策可施。一老者。令以石灰入稀布口袋。兼帶竹縛火把。擇輕健七八人。升樓屋。揭瓦進日光。虎必仰首。卽搖灰袋。眯其目。繼將火把下燎。虎必開口。隨以堅利長鎗入口內。不容轉吮。乃呼衆獵戶登樓交刺之。如其策。果擒虎。乃道光年間事也。時方歲歉。劫掠時聞。典主豫選衆健兒守夜。並儲石灰刀械。一夜寇至。壞大門將入。衆健兒出其不意。以石灰噴之。寇目皆瞇。刀械齊發。遂被擒。冷廬雜識

### 跳白船

捕魚之法。自網籬叉釣外。別有跳白一種。其船長有二丈。闊止二尺餘。至尾尤狹。僅容一人坐舫。出於水不盈尺。右首船舫。豎短網高約尺許。左置一板。闊二尺。長與船等。白粉堊之。斜放水中。兩頭以繩繫諸舫。每當夜靜。漁者輕棹其船於灘頭岸側。魚

見板上白影。輒驚跳而入船。大者以木槌擊殺之。恐其潑刺而舟沈也。每夕得魚甚夥。然止可行於黑夜。若日間及月明之下。白板一照。魚卽悠然逝矣。紹興偏門外有張鳳翔者。孑然一身。以此爲業。其叔開綢緞店於杭。屢招之往。張樂此不願改業也。一夕。棹船出。遙見義塚間火光雜起。有十餘人笑語聲。一船停於岸側。比張至。人皆入船飛棹去。上岸視之。則傍河新厝一棺。紙錢之火。猶熒然未滅。張心念此輩大抵皆昇棺者。然以其倉皇而去疑之。嗣後往來其處。漸見棺縫血水涓涓。穢氣四達。張疑屍在棺底。何以近蓋處亦有血流。且其臭亦不類死人潰爛之氣。夜靜無人。上岸開其蓋而驗之。見棺之上下。俱置猪肉半體。已發變矣。而其中悉貯黃白物。張知爲豪客所藏也。因船小物多。不敢重載。每夕逐漸運回。穴地深埋於缸竈下。而棺則仍爲蓋掩之。私念若徙而他往。恐豪客尋求。反致不測之禍。因執故業自如。惟不敢至義塚旁。祇於南塘一帶人烟稠密處跳白而已。後故於橋柱撞破其船。泅而得免。患病者月餘。以船破不能捕魚。漸至口食不充。行乞以度朝夕。未幾有狀貌魁偉者數

人尋張買魚。於其鄰家察問張之行狀。鄰人以船破行乞告之。張適偃僕攜籃歸。啓門而入。則蕭然四壁。景狀可憐。破船兩截。猶存室中。數人皆周視點首而去。又旬餘。張乞食遠出。偷兒夜入其室。凡臥床上下。及缸甕盆盎灰堆草窠之屬。檢搜殆遍。無所得而去。蓋若輩厝棺之時。惟見一跳白船。至今所藏盡失。疑其所爲。此外遍查。又無敢取其物者。是以屢次向張尋求。幸其善於裝飾藏弄。故不致爲其所獲耳。張歸亦心知之。料其數覓無踪。應不復至。懼禍之心漸釋。因潛至杭州告其叔。密移所藏人皆以爲行乞遠出。而不知其陸續運物也。又數月。其叔至紹興。僞爲尋姪也。見其憔悴困苦。欲攜之去。張故作不肯狀。叔大罵。逼其同行。鄰人咸勸之。於是張以屋託諸鄰家。隨其叔而去。於杭娶妻營運。遂爲富人。每年兩次還家。省其墳墓。然布衣草履。猶不敢改其常也。五六年。見事已冷。借叔之名。漸於故鄉置田產。買房屋。十餘年後。始移家而歸。仍造一跳白船。常棹而夜出。所親或勸之。張曰。此吾素業。安可以溫飽而昧其本來。且吾非跳魚。亦安能至是。因舉其事以告之。始知其致富之由云。聽

雨軒

### 異香

明萬歷間。江南諸生趙某者。家於召伯湖畔。某年夏。久雨湖漲。趙方徘徊堤岸間。見枯樹一株。浮沈近岸。遂命僕撈取之。析而爲薪。以供茶爨之用。火甫發燄。忽異香盈室。其烟盤旋而上。聚作白鳥十餘。長喙高脚。飛翔烟際。掉之隨手而滅。未幾復聚。皆白鷺形也。火燼烟消。倏忽不見。趙異而藏之。每於爐中焚少許。鷺仍羣集。識者曰。此木生於江濟者。已歷千百年。白鷺晨夕集其上。久之其精神凝注。故有此異。與龍涎香同一理也。於是同村咸至其家賞鑒之。時稅璫礦使四出。爭覓奇異之物。進之宮中。以博鄭妃歡。聞趙有異香。因出重值購之。以獻神宗及鄭妃。果大喜。以賜福王。崇禎辛巳。流賊破洛陽。福王被害。王府珍奇。悉爲賊有。賊惟取貴重物。以此香爲朽木而棄之。闔鄉人錢姓者富家也。賊掠其貲財。以錢善刀槩。逼使隨從。同至洛陽。當城破時。錢乘擾亂。攜帶乾糧數袋。匿於古寺承塵中。賊去始出。時福王宮殿洞開。無人



守禦。因入徧歷之。見宮庫中有小篋二。皆雕漆而嵌寶珠。棄於壁下。啓之。則所貯者朽木也。心念此必異物。遂反覆審視。篋蓋之背。有楷書數行在焉。具道此物之神妙。錢復徧檢庫中宮中。抄掠不盡。及狼籍棄擲之物。貯於宮中隱僻處。陸續運之以出。約值數千金。其時流賊正攻戰山陝齊豫間。江南尙然寧靜。錢攜貲順流而下。寓於高郵舍館。既定。密焚此香。果如篋蓋所云。旋聞召伯湖畔趙生。亦有此物。因往訪之。趙當內璫購香時。已密藏其半。璫勢衰後。每焚之以自娛。至是各出相示。其紋理顏色。無不吻合者。趙識其爲曩日故物。因與錢周旋頗洽。錢遂移寓與趙同村居。置家室焉。是時南京淮揚一帶。俱爲戰爭之地。二人挈眷渡江。避於寧國山中。以免。迨清朝定鼎。江南平。兩家同返故居。數年之後。揚州繁華如舊。二人以香售於鹺賈。所獲不貲。遂爲高郵富室云。聽雨軒

## 皮夾中字畫

世間玩好之物。固不可輕於棄置。亦不可過爲深藏。藏之太深。棄置隨之矣。昔聞先

大父退圃公言。康熙某年。郡城南街舊貨店內。有舊皮一片出售。闊一尺餘。長尺有五六。四邊細線緝之。兩面塗以紫光漆。極其光滑。三角皆方。而一角獨稍圓。開一細孔。繩貫之而懸於壁。歸安諸生潞村慎某者。以數十錢買之。歸爲夏間寫字墊臂之用。年餘鼠嚙其邊。慎見殘缺處。中開一縫。窺其內。隱隱若有字迹。於是盡折其線。啓而視之。則內藏蘇東坡字畫十六小幅。墨迹如新。另一小帖云。字畫數幅。皆得之於公之元孫。眞墨寶也。弄之皮中。庶免散佚。咸淳己巳秋日書。不著姓氏。一陰文印章曰。松下老翁。書法遒逸。絕類黃庭經。考其年代。在宋度宗登極之五年。蓋其人寶惜之至。故以兩皮夾而藏之。殊不知幾至於毀棄也。然市朝三易。兵火屢經。而此皮完好如故。殆爲東坡翰墨所在。故有神物呵護之與。慎寶之。裝潢爲冊。而書其故於末頁。以戒後人。其族孫天秩。移居吾邑。曾向先大父述之。又桂林太守商公之姪景陽。曾於京中小市上。以十數錢買得紫檀木一方。闊不及三寸。長五寸餘。厚可八九分。稜角皆磨。蓋舊物也。商置諸書案。以鎮紙。一日作文。偶文思不續。口沈吟而手舉

其物於案間斜頓之。忽見頭間長出分許。商駭而再頓。則一抽替出焉。內有大紅兜羅絨小袋。傾之。得珠二十顆。紫金指環紫金珠耳環各二。珠皆圓大如豌豆。指環鏤鑿精工。細入毫髮。耳環上啣二大珠。皆夜光也。其物蓋閩人用以纏線。名曰線版。此係名匠所製。抽替毫無痕迹。故雖貯重物於中。而人不之覺耳。乾隆丙子。予在商公幕中。與景陽同居恆餘園。親以告予云。嗚呼。此二物者。非大家世族不能有。而藏之太密。後人遂不之知而委棄之。與夫埋金銀於牆壁地窖中。子孫不能享。而爲他人所有者。類相若也。亦愚矣哉。聽雨軒

### 出世入世

卓少修字卓月。江西南昌人。固世家子也。幼卽喜麴蘖。七歲盜飲鄰家釀。醉臥甕側。父兄笑之曰。此畢吏部也。因名之曰卓月。長讀書頗聰穎。目十行下。顧不喜舉子業。鄰人有延僧作功德者。拜懺誦經。倍極熱鬧。徑往觀之。聞梵唄之聲。不禁手足舞蹈。曰。是可學也。詢僧所居。曰。在圓覺庵。僧名健修。固工詩畫。通內典。見卓月。頗愛之。乃

曰。庵在郭西門外。子來。未免跋涉太遠。我有師曰慧圓。乃高行僧。茲爲地藏庵。方丈苦志清修。從不出外。子盍詣之。可得其衣鉢相傳。卓月曰。諾。翌日。潛往見慧師。言近搆家難。願祝髮入空門。一心皈依正覺。慧師合掌稱善。卽爲披薙。及家人往覓。則已頂現圓光。衣露徧袒。取法名曰卓修。家人百計招之歸。不可。卓修日持念珠。夜坐蒲團。勤修不懈。香積廚常供蔬筍。初甚樂之。繼而酒興忽發。日向黃墟買醉。每醺然登禪榻。爲衆生講說因果。具有妙解。人皆稱之曰醉和尚。慧師常戒之曰。汝雖爲米汁佛弟子。然醉時工夫。終不如醒時工夫。明日我將大解脫。證無上禪。繼此座者。汝師兄健修也。恐渠不解酒中三昧趣。將不汝容。我鉢中有金錢十。汝可攜去。有酒處。汝卽可留。盡此。亦可往生忉利天矣。卓修謹受戒。師甫圓寂。席捲其所有去。遊紹興之準提庵。飲其酒而甘之曰。此王無功之醉鄉也。遂掛搭焉。寺僧日供酒一石。甚以爲苦。而卓修意猶未足。羣議曰。酒以餉客。非以養僧。恐後將不繼何。卓修笑謂衆僧曰。此無妨。我囊中自有酒資。出金錢十權之。每枚重十兩。曰。卽以此百金購田種秫。用

以釀酒。當無不足。於是大築糟邱。卽以門前江水供釀。酒成。清冽甘香。甲於一郡。卓修醉後。輒以禪杖叩酒甕作歌。聲淵淵如出金石。通禪理者聽之。具有意味。歲所釀酒。不獨供寺中用。民間求售者亦給之。大盎小甌。遠近畢集。得以寺酒款客爲榮。爰名之曰和尙膠。以比女兒酒云。珂雪禪師出家於甫里之保聖寺。容狀奇詭。軀幹雄偉。多膂力。善走。兩腿毛長寸許。口操北音。莫知其所從來。或曰和珅門客。珅敗逃於南方。懼禍發。遂披薙爲僧。顧雖入空門。仍復不守清規。每以術惑蕩婦淫嫗。誘以福田利益。招致寺中。授以祕密佛法。初至。里中無賴子知之。羣譁而前曰。始以大師爲佛門弟子。今知乃一淫禿耳。此寺乃六朝古刹。豈容汝妄來玷污。汝其亟去。汝所得布施金錢。乃是福田利益。悉當歸於我儕。汝一文亦將不去。蓋珂雪雖爲僧。囊橐頗豐也。無賴子之覬覦者久矣。至是將囊括而甘心也。珂雪聞之。吼奔而出。無賴子當之輒靡。或顛去尺有咫。羣受大創。一二爲首者。傷尤劇。嗣是不敢犯珂雪。乃得逞其所欲爲。夕陽落時。輒喜散步。偶見良家女子稍有姿色者。必誌其門徑。深夜越牆而

入。雖重垣邃室。莫能阻之。自簷際來往。有如飛鳥下墜。既達女房。彈以迷藥。卽不能聲。往往裸體負之以出。入寺恣其輕薄。味爽仍還原所。女父母雖知之。莫敢聲揚。懼爲門戶玷。女或有羞忿自盡者。里中人咸思除之。憚其勇莫敢發。有綠衣孃者。里中之蕩婦也。雖巾幘。頗有俠氣。恨珂雪之橫。曰。此南山白額虎也。不去此害。必將飛而食人。因思良辰令節。結伴僞遊寺中。實以觀珂雪之所爲也。珂雪邀入精舍。款以酒肴。女量固豪。罄無算爵。女環視其室。霧閣雲窗。備極幽靜。聞隔垣有婦女笑語聲。推扉而入。則皆村落中入寺焚香者。或相識。或不相識。方供伊蒲饌。咸起勸女飲。珂雪亦來。衆村姑皆黝以巨觥。飲稍遲。強提其耳以納之。曰。真如醍醐灌頂。女佯醉。遂留宿寺中。十餘女一夕殆遍。天明。女親見其手攜鐵鎚。環行一室。女戲問輕重。曰。約略三百斤。女出謂衆曰。此僧當以智誘。不可以力敵。衆於是佯交歡珂雪。結以酒食。適有妓船至。乘其醉。慫恿其登舟訪妓。妓獻媚逞憐。沃以大杯。遂至玉山頽倒。衆或推之。或挽之。咸曰。大師可歸去。移舟至巨港。擠之入水。珂雪猶從水中躍起。手攀船舷。

舟傾側幾覆。衆急抽刀斫其指。趨趨船板上。一時許。珂雪乃死於水。雪龕僧主持浙西大叢林。擁貲百餘萬。其初乃廟中一乞兒也。乞兒亦良家子。攜李人。俗姓許。幼不喜讀書。時竊父母錢。入博場。喝雉呼盧。付之一擲。偶得博進錢。則酒食徵逐。必罄而後已。父母約束之。弗聽。屢撻之。亦弗悛。遂逐之。出行乞於市。夕宿廟中。廟有羽士春颯者。善風鑑。見之曰。此巨富相也。何爲在此。揭其破帽端視之曰。所不足者。天庭微削。當於方外獲非意財。謂之曰。孺子好爲之。今日乞不足慮也。爰日給以飲食。畀以衣履。久之。體貌豐澤。不類貧家兒。早起過春颯前。顧之驚曰。覩子光采。時將至矣。適靈隱方丈。入京請藏經回。泊舟城外。偶爾登岸。入廟散步。與鍊師本舊相識。淪茗清談。許子方立窗外。檢曬道書。指黑雲壓簷端。進白鍊。可收書入否。遲恐雨至。舉止從容。言詞清朗。問此鍊師弟子否。何猶俗服。未易道裝。春颯爲緬述顛末。方丈因乞攜歸。爲佛弟子。笑曰。三教本同出一源也。旣至杭垣。延師教之讀。曰。不必求通梵典。可習詩文。藉工酬應。久之。俾司寺事。頗能迎合方丈意。漸見信任。俾管庫房。司出入會。

計惟慎。由此漸與寺中人往來。有李士俊者。素與知客善。因識雪龕。偶話及今年北方油豆頗賤。苟以賤值得之。定可居奇。獲利市三倍。雪龕聞之。躍然欲試。卽出庫房錢。如李言爲之。秋間值頓昂。所贏倍蓰。嗣後凡事與李商。售某利十倍。售某利百倍。自以贏項爲之。不必動庫房公款矣。於是投無不利。歷三四年。積貲數十萬。漸通當道。交結官場。外間所設鋪肆數十所。咸李總司厥事。適方丈圓寂。雪龕遂繼其座。集寺僧而告之曰。曩所以不動公款者。吾師秉性方嚴。素喜簡寂。請則必不許也。聖門貨殖。尙有端木。豈我釋氏無人哉。福田布施。何必仰求之人。今出庫金爲營運。贏則歸公。絀則歸私。願我衆僧。獲大利益。咸合掌讚歎曰善。如是二十年。獲貲二百萬。皆散之天下叢林。雪龕茶毘之日。不名一錢。鐵鑊僧行脚遍天下。法號超恆。以首戴鐵鑊得名。鐵鑊其炊具也。所經蘭若。前往駐錫。一語不合。卽負氣出走。雖已食香積廚中飯。亦必哇而出之。然後已。飢時卽於樹支兩磚作竈。拾枯枝作柴。除首上所戴鐵鑊。解背上所負囊中米。汲井水煮之。飽食三兩碗後。就石塊作枕。酣眠竟日。人或從旁



窺之。遽瞋目叱之曰。咄。汝鼠子何不縮頭去。其亟歸家。汝妻方伴和尚宿。遲則一頂綠頭巾戴卻矣。人或知之者。不與校。或有聞而怒者。奮拳毆之。如擊敗絮。僧亦暴吼。旋起與鬪。無不辟易者。夕或宿金剛脚下。寺僧有見而誚之者曰。此非我寺中地耶。則一言不答。徑趨而出。雖僵臥風雪中弗顧。嘗詣西湖。徧歷淨慈靈隱天竺雲棲。無有一僧與之立談者。每日下午。扶杖果腹。遨遊蘇白兩堤間。行歌自答。有兩女子過僧前。叉手行禮。女子佯作畏懼狀。僧遽操杖撻其一曰。汝家自有菩薩。何不奉敬。乃來此地燒香耶。今晨與汝母作什麼生。罪過罪過。蓋女忤其母。詰旦方詬而出。僧又棄杖。徑前嚙一女唇曰。比昨夕之樂如何。女子啼而走。蓋私有所歡也。觀者怒。盡起譁而逐之。僧大笑徐行。追之不及。鐵脊生方自富陽聞警。倉皇回行。倦暫休樹下。僧一見之曰。唉。汝何時又長此煩惱絲耶。今何不歸。左抱虎而右擁豹。與藥叉相對。乃來此地作楚囚泣耶。速去猶可脫也。復且行且笑曰。恐張騫天外飛槎。來盜支機靈石去。其詼諧機警類如此。時出隱語。申申詈人。惟其人自知之。輒不敢言。隱忍而

已。人又以是呼爲異僧。後於途中逢賊。指爲奸。搜其身畔。得一紙。大書曰。上元甲子。髮逆盡死。賊箠楚橫施。初無一語。乃投之火。烈焰騰空。毛髮毫無所損。良久忽曰。快哉。汝衆看一朵青蓮花升天矣。

### 劫婚案

有村氓女。受二十里外民家聘者。條有武生某。家故豪。結羣不逞。往來生事。無敢忤者。聞女美。以重金強聘之。女父母貪賄允焉。女不可。密乞鄰媪通款於夫家。促定吉期於數日內。父母雖心弗善。無辭以覆。姑許之。而急達武生。命劫於中途。女不知也。屆期。鼓吹來迎。女登輿去。時已入暮。行數里。遙見火炬通明。人語喧雜。女覺之。語昇者曰。我今夕于歸不成矣。速住輿。俟我潛匿暗處。俾劫空輿去。或暫免辱。從之。女甫避匿。劫者至。奪輿去。女伏叢莽間。念父母同謀。歸將不免。有寡姑住甚邇。投懇之事。或可挽。乃彳亍而往。至則雙扉虛掩。入至庭中。見堂上燈明。姑方與僧對飲。大懼退出。計無所歸。憶昇者以劫親事告夫家。必將涉訟。訟或不直。益可慮。不若徑至其家。

庶無中變。遂往登堂謁舅姑。舅姑大喜。卽夕成合巹之禮。武生劫輿至家。啓視無人。恚甚。意女有寡姑。住近劫輿地。必往潛匿。邀集羣小。執械往奪。排闥而入。勢甚洶洶。姑方與僧寢。夢中驚覺。意必隣人知其與僧通而來捕。惶遽無措。將僧藏櫝中。加鎖鑰焉。武生入室。遍搜無獲。試舉櫝。知有人。持之而去。至家。且不啓櫝。置酒歡飲。五鼓衆始散去。武生醉怒。持梃向櫝大叱曰。賤婢不願富貴。甘心從田舍郎。爾縱多謀。何能逃我術中。我何妨置賤婢。別覓佳麗。然不劫爾。無以見我之威力。且叱且擊。用力過猛。櫝破而寂然無聲。秉燭視之。赫然一僧。腦裂斃矣。懼而埋之。冀或倖免。不意女之夫家。已具牒邑宰。輾轉扳引。姑之姦與武生之謀俱敗。蟲鳴慢錄

### 神力

蕭春臺。杭人也。道光五年春。有事袁江。道出徒陽運河。時漕艘攔淺。候潮乃行。民船俱爲所阻。遂偕一小舟。共泊岸旁。而漕船水手橫甚。一篙工持篙誤破其鄰船之扉。篙之入者尺許。拔不能出。聚數人拔之亦然。呼其舵工下視之。見此小舟內。一老僕

坐船頭。慄騰欲睡。一少年在艙中。一手執書。一手以數指持其篙。篙之不出。職此之故。舵工大駭。力戒其水手弗生事。已乃登小舟告之曰。水手無知。誤有觸犯。乞恕之。弗與校。少年未及答。其舟人自後突出曰。吾扉爲所破。須要償也。舵工與之青蚨千文。少年乃一笑釋手。夫數指耳。而力之大至此。則少年殆非常人也。印雪軒

### 馮鐵頭

有馮允昌者。以賣腐爲業。勇力兼人。而其頭甚堅勁。每與人鬪。輒以頭撞之。罔弗披靡。由是氣凌一鄉。無敢與抗者。偶與西廟道士忤。馮於五更磨腐時。潛挾廟前二石獅。置諸廟門之外。明日。道士見而異之。僱人舁置原所。不數日。馮又如之。如是者五六次。道士費擡舁之值不貲。而心疑焉。夜潛臥於廟門之內。以覘其異。一日五更。聞馮店開門聲。見其挾獅而來。始悟由於前次開罪之故。遂啓戶出。向馮謝罪懇求。馮大笑。復以獅安於原所而罷。其鄰有與暱者。謂之曰。子頭誠有力。倘以石擊之。恐亦不能當也。馮拾一石。大如椀。擲於空中。而以頭承之。崩然有聲。石迸去而頭不傷。人

大駭。遂以鐵頭著名。一日。馮偶潑水於街。適陝西皮貨客張姓者過。誤濺其衣。張微詈之。馮惡聲相應而出。揮之以拳。張不與較。馮從後趕上。以頭撞之。張不回顧。而微側其身。馮頭適入於肋間。爲其所挾。極力搖拔不可脫。張笑曰。吾知汝爲馮鐵頭。然不知汝頭果是鐵否。吾當試之。於是駢兩指就肋間擦之。馮若以利刃刊其頭骨者。痛不可忍。不覺失聲而號。張曰。若然則非鐵頭矣。且放汝去。再加純鋼鑄鍊。吾當復來與較也。遂釋之。緩步而去。馮之頭紅腫者旬餘。自後深自斂戢。頓改故態。

聽雨軒筆記

## 賣荷包

紹興某生。應京兆試。入都不售。寓其族子家。一日。忽失之。十餘日乃返。則止一衫一袴。面無人色。問旬餘何往。何狼狽至此。某縷述所遭。大可捧腹。蓋其日某間行入內城。至四牌樓一曲巷中。見有一家。門署荷包出售四字。乃叩門欲買荷包。有少婦出。以一枚示之。已敝矣。問有新者無。婦曰。欲新者請入內。乃入共坐。婦絮絮閒談。不及荷包。問之。仍以舊者進。曰。吾家止此一枚也。然則何以署門求售。婦微笑曰。所售非

此荷包也。某會其意。以言調之。婦曰。吾荷包價昂。郎有此資乎。某卽解囊出錢券示婦。可數百千。是時錢一兩。易錢十千。計之亦值銀數十兩。婦曰。可矣。乃相將入室。弛服橫陳。某惑之。遂止宿焉。其家止一媪。婦所傭也。一童子。婦之弟。朝夕饗飧。咸仰給於某。數日而空其囊。婦曰。囊中空矣。某曰。此細事。吾自能籌之。數日。婦又語如前。某答之。亦如前。一日。二人方共飲。忽有男子至其庭。聲如虓虎。婦曰。殆矣。吾夫歸矣。不去必血其刃。乃導某出牖。使踰後垣而去。某倉卒不得衣。故止一衫一袴也。聞者咸粲然曰。此皆僞局耳。然亦不可再往。族子乃予以資而使南歸耳。耳郵

### 史酒徒

秀水有無賴子史姓。豪於飲。終日酣醉。人以酒徒稱之。道光壬辰。王師征臺。滿洲將軍馳辦軍務。泊舟江涇。酒徒自他處醉歸。風吹欽差旗。拂其面。酒徒曰。此何物。遽上乃公面耶。手裂碎之。將軍大怒。令摔酒徒至船上。詰之曰。何故碎吾旗。酒徒酒已醒。曰。非敢碎將軍旗。爲將軍報佳兆耳。願將軍旗開得勝。馬到成功。將軍遂釋之。由是

史酒徒之名益著。香飲樓。

## 武進盜案

武進莊氏兄弟三人。孟與季俱列武庠。黷暴無所憚。閭里側目。人以莊氏三虎稱之。時邑中多盜。富室以劫案控者。指不勝屈。令嚴責捕役。收妻子入獄。勒限以期必獲。而盜蹤杳然。捕顧某謀於衆曰。劫數之多。由於窩藏之密。莊氏兄弟。素豪橫。羣不逞。日盈其門。或爲逋逃藪。吾將偵之。至夜。登其屋。伏隱處。潛瞰其所爲。見室中燈燭照耀如晝。數人憑一棺。若視含殮狀。而皆嬉笑無戚容。亦無婦女哭泣聲。心甚疑之。次日。僞爲丐者。乞於其家。見新棺方加髹漆。私問其僕曰。此亡者爲誰。僕以莊氏之叔對。訪諸其鄰。則半月前果歿一叔。其棺已厝諸野矣。顧以白令。令督兵役以往。莊兄弟衣冠出迎。令問所停者何人柩。莊對如僕。顧請開棺驗之。莊曰。尸斂已久。今無故而發。罪孰承之。顧具狀認開棺罪。遂共啓。則皤然一翁也。顧大駭。令逡巡欲避去。莊兄弟共毆顧。且將及令。一室沸然。顧念罪名旣不能遣。而屍終可疑。揭其衾。見金銀

充物其內。蓋首則眞首。而衣所覆者。盡黃白也。莊兄弟相顧無人色。令飭兵役擒之。訊以刑。則棺中所有者。俱盜賊。捕急無可匿。適有叔病歿。因斷其首。置諸棺。以防開驗。而所厝之棺。則僅存其體焉。獄既具。復訊出劇盜十餘人。悉獲之。與三虎駢戮於市。香飲樓

### 藕絲帳

崑山千墩鎮顧給事思軒先生。與相國夏桂洲同年友善。在京邸時。同寓也。每待漏入朝。顧老僕陳某。必隨入承事之。顧先生歿。後夏桂洲亦乞假歸江西。顧公子命家奴運糧至京。浪費俱盡。假照塞責。既而地方官追比。破產輸納。罪尙擬流。蘇松常鎮之間。以糧事擬流者。共四百餘家。而顧將流嶺南。適當相國復召之時。舟泊虎邱。陳僕探望舟邊十六日。不得見。會相國送客出舟。卽叩首見之。相國備詢家事。情甚慙。陳流涕細述。願乞垂庇。相國厲聲曰。此係國法。我能曲徇故人子乎。陳恨甚。及相國將解維。方伯入見。出時。相國命之曰。聞貴治負糧者多。然旣補納矣。復正其罪。恐



非聖朝寬大之體。是宜免。於是大江以南。俱得免於流竄矣。免後。悉念顧氏之恩。厚禮而叩謝者。戶屢不絕。倉箱之內。棗栗應時而滿。夏相國無嗣。思軒之子觀海。爲饒州刺史。欲報恩於桂州。求夏氏子之疏宗子姓。終莫能得。僅瓣香致祭於祠內而已。時嚴嵩已失勢。籍沒時。觀海奉命。監其門。有老嫗倉皇而出者。袖中遺下一物。紙裹若管城。觀海意密書也。置之靴內。歸與家人觀之。則細如藕絲。引而愈長。卽拽成一帳。有知之者。曰此藕絲帳也。嚴府中至寶二。一爲藕絲帳。一爲銅鑼榻。上得藕絲帳。則一室無塵。銅鑼之聲。聞於百里。乃仙人所鑄也。不知流落何所。觀海嘗謂人曰。我無從報夏公恩。得監嚴氏籍沒。猶之報恩矣。蓋嚴嵩殺桂洲者也。顧氏藕絲帳。四世相傳。國初時。觀海之曾孫寧人。與南陽搆訟。將不直。賄於當事。寧人無子。故於珍玩皆不甚惜。其讀書一目數行。俱下。終身不忘。著述等身。今所劖劖者。惟日知錄與文集數卷而已。生平崇尚氣節。其無子蓋天奄也。

## 何義門

何義門先生。值南書房時。嘗夏日裸體坐。仁皇帝驟至。不及避。因匿爐坑中。久之。不聞玉音。乃作吳語問人曰。老頭子去否。上大怒。欲置之法。先生徐曰。先天不老之謂老。首出庶物之謂頭。父天母地之謂子。非有心誹謗也。上大悅。乃舍之。嘯亭雜錄

### 竇爾敦

竇爾敦。獻縣劇盜也。一日。尾孤行客甚疾。客知其盜。擊馬馳。馬逸。越宿處。至古寺。日已曛黑。不得已投焉。竇亦尋至。僧出迎。貌獍惡。見客裝。甚喜。延之食。俾與竇同室宿。戶旣闔。竇潛啓之。鍵矣。悄謂客曰。我初欲劫君。乃同陷盜窖。然無恐。我救汝出。火具見室西北隅。有大筥。中實敗絮。移之見穴。有階梯。竇持刀。潛身由邃道。達院落。窺室內。張燈。僧方據上坐。少婦環侍。飲甚豪。旋一婦攜壺出。挾之僻所。問狀。言某近村某妻。爲僧挾置祕室。如某者。二三十輩也。竇言能聽我。當救汝出。問賊兵器。則二鐵翼。排大小刃數十爲羽。挾以飛。著人立死。竇言入勸以酒。竊其翼。彼無能矣。婦入。約衆婦如竇言。共竊其翼出。竇奔入。以刀刺僧。僧索翼不得。躍起。竇亦躍而從。鬪梁間。逾

炊許竇以生力且持刀。僧徒手。又被酒。遂顛於地。竇手刃之。呼諸婦。囊括僧藏金錢。待空曠處。呼客打包。牽兩騎出。縱火焚寺。火起。鄰村來救。竇遂與客連騎馳。遲明至岐路。客感其救。欲分以金。竇曰休矣。若圖君金。待此時耶。遂分道去。蝶階外史

## 木工弟

孔星廬云。某甲木工。談者忘其里居。愿而黷。妻某氏。極婉淑。母家鄰村。相距廿餘里。弟年十七。美如冠玉。讀書極聰穎。一日某甲出。妻適歸。妻妹來視姊。兩不相值。妹與某甲弟同庚。明靚幽嫻。尤勝於姊。弟爲妹設饌。天條大雨。妹欲歸。弟曰。雨幢幢不止。汝獨歸旣不可。吾送汝。又無以別嫌。汝宿吾家。我出寄宿鄰舍。早旦晴霽。汝自歸。妹不得已。宿焉。鄰故場院。人衆且雜。弟求寄宿。道所以。衆賢之。賊某在坐。歸述於妻。妻曰。孤女在室。盍竊諸。賊曰。乘人之虛不義。我不爲也。妻笑其迂。自往竊。時有無賴子。一村之蠹。亦在場院。聞弟言者。謀往就女求合。女已寢。見賊妻入。恐甚。伏牀下。賊妻方上牀檢衣。被無賴子突入。賊妻疑某甲弟來就女。旣匿其俊秀。喜過望。無賴子暗

中摸索。賊妻已移船就岸。如白受杵。方極酣暢。某甲歸推門。闔而未遂。聞淫褻聲甚穢。疑妻有外交。怒火中燒。解腰下斧。次第斫兩人。落其首。時窗紙未白。以敗袱包兩首。奔至岳家。岳見壻神色俱變。問故。甲曰。若女敗門風。已並奸夫殺之矣。岳大駭。妻亦自內出。甲驚愕不知所云。妻曰。所殺者必吾妹與若弟也。岳偕甲夫婦同歸驗之。非是。從牀下搜女出。戰慄不能言。甦半日。乃言初見賊蒲伏。昏不知人。弟亦自鄰舍歸。鳴於官。令村人認尸。賊出。直陳不諱。亦不索抵。無賴子家人亦來領尸。官廉得情。案定。某甲以疑予杖。俾其弟與女合葬焉。蝶階外史

### 風水

宋倪思父云。住場好。不如肚腸好。墳地好。不如心地好。又宋壺山謙父贈地理師云。世人盡知穴在山。豈知穴在方寸間。好山好水世不欠。苟非其人尋不見。我見富貴人家墳。往往葬時本貧賤。迨其富貴力可求。人事極時天理變。前輩口占云。你也看我也看。自有天然地一段。重重包裹在中間。不須錢買無人見。錢水部仁夫詩云。尋

山本不爲親謀。大半多因富貴求。肯信人間好風水。山頭不在在心頭。堅瓠集

## 阿里瑪

清初有驍將阿里瑪者。能自握其髮。足縣於地。又能舉盛京寶勝寺之石獅。重踰千斤。戰功甚鉅。入京後。所爲多不法。章皇帝欲置於法。恐其難制。有巴圖魯占者。其勇亞於阿。因命其擒之。占至阿邸。故與之語。猝握其指。阿怒。以手拂占。擲於庭外。數十武。因數之曰。汝何等人。乃敢與吾鬪。勇耶。占以上命告。阿笑曰。好男兒。安惜死。爲何須用給計也。因受縛。坐車中赴市曹。至宣武門。阿曰。死則死耳。余滿洲人。終不使漢兒見之。誅於門內可也。因以足絙城門甕洞間。車不能行。行刑者從其語。阿延頸受戮。其頸脈如鐵。刀不能下。阿自命占以刀割其筋。然後伏法。亦一奇男子也。嘯亭雜錄

## 捕快曹福

湖口捕快曹福。善緝賊。其察人形迹。有非意所料者。然實中窳窳。一日閑坐署前。見一人衣綢衫。青呢半臂。絲履白襪。年三十許。持扇徐步而過。貌甚雅。福遽前呵之。其

人惶懼。贈以金而去。詢其何以知非善類。福曰。其人行屢低頭。多睨視。過溝檻輒褰衣。是不慣著長衣者。故知之。又一日。閑步河干。忽登一小空舟坐。須臾榜人至。促其登岸。不可。欲解纜。則願同行。異而詢之。則曰。爾船中有物。我欲搜之。榜人怒。揭艙板。空無一物。又命開底艙。榜人執不可。則持器強開之。金帛纍纍。下復有底。實爲藏賊之處。遂繫榜人。挈賊物以鳴官。乃多年滑賊也。問何以能知。福曰。見其舟小而風不能簸動。且繫舟纜。牽曳甚重。故知夾底有物耳。又一日。緝案出。見一人衣縵袍。棉馬褂。冠履頗華。而行動之間。諸形束縛。甚不自然。疑而尾之。及暮。隨入旅店。閉門後。穴窗而窺。見其人未解上衣。先赤兩足。旣熄燈。乃登床。益疑之。然猶不敢自信。次晨。其人出房。衣已全著。而足仍赤。久乃著襪。俟其持匕箸欲飯時。從後呼之。不投箸而回首。招使前。則舉箸捧飯而起。乃遽前執之。果積賊也。福又言其師某。曾緝一要案。約同伴數人。至他郡盜賊聚集處。密偵焉。一日。見一虬髯客。舉止粗疏。語言樸野。草笠布袍。往來街市。孑然無侶。同伴疑爲盜。以告某。某察之。良是。恐或有誤。乃徐視其動

靜跬步不離。隨之入飯肆。對據一席。見其目不邪視。啖噉無聲。杯箸井然不亂。坐而足履躡空。飯畢酬值出。遙尾之。復入一茶坊。登樓。博士進茶。客持盞倚闌眺望良久。某竊自其後。緩步以進。客忘形。徐以手向後遞盞。絕不回首顧。仍遠望如故。某接盞至案。下樓告同伴曰。此貴人微行。非盜也。不可造次。吾見彼坐如泰山。行如流水。其足之躡空。習用足橈也。不回首而遞盞者。向有僕侍也。故恆於無意中露其態耳。已而果知爲某臬司訪案過此。同儕乃服某之精識。蟲鳴慢錄

### 子曰

畢秋帆撫三秦。道經某刹。駐軒隨喜。一老僧迎入。畢曰。爾亦知誦經否。僧答以曾誦畢曰。一部法華經。得多少。阿彌陀佛。僧曰。荒菴老衲。深愧鈍根。大人天上文星。作福全陝。自有夙悟。不知一部四書。得多少。子曰。畢愕然深賞之。遂捐俸置田。爲香火資。并鼎新其寺焉。

### 延師課賭

余鈞攝山東萊陽令。與邑紳宋姓者善。卽荔裳先生族子也。家素封。而二子癖於博。百計勸懲。弗之聽。因出重幣。遍訪江浙之精於博者。延至家。使二子受業焉。年餘。盡得其祕。自是博必勝人。無與博者。竟絕博而保其家。

### 竊賊之詭計

有傭工業緞者。攜緞二端。日暮不及歸肆。宿於家。恐室淺被竊。夫婦各枕一端而寢。賊伏屋竊聽。知其謀。夜半潛入室。夫婦皆熟寢。賊先探手已懷俟溫。納入被中。弄其陽令舉。夫以爲婦也。任之。賊又撫其婦。悄語曰。爾來。婦以爲夫欲歡也。起就之。賊遂竊取一緞。歡次。婦問夫何忽欲此。夫曰。爾弄之久矣。何復云爲。婦答頃實睡熟。未涉手。互相疑。同起探之。賊乘間又竊一緞而去。夫婦遍床覓。緞俱失。乃知俱爲賊給。亟呼鄰。則已去矣。賊之智誠非人意料所及。此尤黠而可笑者也。蟲鳴慢錄

### 代嫁

有富室女。旣字而與人私。于歸之夕。彩輿至門。女忽分娩不能行。父母惶遽。適佃戶



女來主家稱賀。年與女相若。乃僞飾以往。戒不得言其故。且毋許與新郎寢。佃戶女伴應之。入門卽大哭曰。我非爾家婦也。爾婦有外遇。今夕臨盆。不能成禮。遣我相代。我雖貧家。迫於勢。不得已而來。若欲行合巹禮。有死無貳。姑爲拭淚痕。熟視之。頗端麗。乃曰。彼女既有醜行。吾亦不欲其爲媳。爾雖貧女。貌美而明大義。旣入我室。卽我媳也。命子交拜如禮。卽夕成夫婦焉。佃戶女亦曾字人者。夫家聞之。將涉訟。富室懼揚醜聲。重賂寢其事。隣里鄙其女。無問名者。久之乃嫁與佃戶女原受聘之夫。姻緣顛倒。亦奇矣哉。蟲鳴慢錄

## 甘鳳池

白下甘鳳池。精技擊。善運氣。近地無敢敵者。有僧云。自少林來。聞而訪焉。甘曰。姑毋交手。我負牆立。任爾擊如何。因先日要約。屆期擇寬敞地。觀者如堵。甘坦腹倚石碑而俟。色甚暇豫。僧於十數步外取勢。奮拳而擊。間不容髮之頃。甘聳身躍起。高丈餘。僧拳誤中碑上。石斷壓肩而臂折矣。狼狽遁去。此僧力過賁育。甘蓋勇而智者也。一

日。甘舟行。忽有人自窗隙探白蠟杆入擊之。甘駢兩指捺其秒於案。持杆人百計抽取不脫。詢曰。爾爲誰。答曰。我南京甘鳳池也。乃緩言曰。識爾矣。乞恕唐突。甘釋手。縱使去。有妓極淫蕩。日接數人。猶不愜意。甘聞往宿焉。運內功御之。妓初甚歡。漸不能支。久而愈堅。如鐵棒衝突。痛楚難勝。叩枕哀求。乃笑而罷。甘炫其術。不能韜諱。掉行街市。遇驢負米穀者。輒挺腹撞驢倒。囊破米出。狼籍滿池。驅驢人不敢與爭。忍氣經營。良久始行。甘樂甚。自詡得計。屢爲之。驅驢人積憾日深。稔知運氣者最畏柔梗。抽擊。伺其近驢將撞時。驟以長鞭迎擊之。氣結不能散。歸而脹死。恃術者終以術敗。可不慎哉。

外史氏曰。甘鳳池居第八人。則七人之技可知。僧之技更可知矣。顧不善用其技。卒以自戕其身。技雖絕。何尙焉。中四人名姓不傳。益令人想像於吳山越水間也。

按曹仁虎路石瞻皆在八人中路工畫  
鷹自題曰英雄得路當塗馬壽齡記

江浦邢某。慄勇善捏鬻。其姻戚設店閭巷。被人欺侮。倩邢守禦。居無幾。賒物者來。邢曰。店係我開。自今伊始。不能承命。衆洶湧欲毆。笑曰。郝婁不辨。毆恐未便。撮穀數粒。擲人眶內。欲去不能。因各鳥獸散。有虎而冠者。慣逋欠。畜惡犬拒人。邢步往。近籬角。韓獹宋狔。咆哮集。適旁積麥柴。握數根。俟張吻。卽投之。麥芒梗喉。不能吠。俱曳尾跳。最後者猛同虎。爰提其犬。犬猶獠嚙。乃以兩指抉牙落。摔於地。斃矣。見者懼負。羈矢屈膝。夙逋俱償焉。後一鄉棍。兇惡多力。邢至。出曰。君邢姓。吾所仰。但我逋欠甚多。倘人家各請拳師。則還無了期矣。如有技服我。我亦無吝。邢曰。以手置肩。能同走乎。棍自忖肩可任。二十鈞。適爾相許。邢倚左手。輕若敗葉。跣跣走數里。及坐定。身不能起。含塊請救。解其衣。自肩至足。皆腫。笑付刀圭。百日而愈。明齋識小

### 鬪力鬪智

野二不知始何名。以頎而黝。不操土音。故羣呼之爲野二。余外祖家全盛時。居青浦之永豐莊。門首置質庫。以野二多力。俾司警夜。二量可兼人。酒食不能供其饜飫。卽

三餐均以升米爲率。亦云祇可點心。不堪果腹也。一日。忽有少林寺僧來募。指名蔡氏。索三百金。挾一蒲團坐石橋上。來往俱不得過。與之數十金。不顧。云有能拉吾過橋者。我卽飄然。否則借寶典結冬矣。有強悍少年來試之。僧一舉手。卽已倒擲溪中。衆莫敢近。乃峻二曰。若素稱勇士。能挈此僧過橋去。除主翁犒賜外。我輩公備飯一斗。酒一壘。猪首一枚。以供大噉可乎。二應曰。是何難。卽至橋上。不盡一級。問僧曰。若非少林來者乎。僧漫應之。俯仰間。已取僧挾其首於腋。疾趨數十步。如土委地。曰。請請。可以行矣。僧起立。熟視良久。曰。拉我者汝耶。我行矣。尙當與子一角技耳。乃取肩行李一檀木扁挑。置禿頂。以兩手扳其末。張滿如弓。飛空中數丈。乘其落勢。以手接取。出不意。橫擊二股。二因慙猛不肯避。亦不解禦。受擊蹶然。幸立人叢。得不倒。大怒曰。妖僧無賴。暗襲乃公。汝慣擲人。乃公亦一擲償汝。乃摔僧背。擲隔溪中。僧憊且慙。棄其衣蓋。登彼岸而遁。二乃從容飲噉。自言生平第一飽也。僧竟不復來。外祖因述明季有喬公子者。以豪勇聞。有友康飛腿。以用足稱無敵。一日。有僧造焉。請與角力。

喬揣僧技實勝己。因假近游。約以數日歸。後試較。居數日。僧復大言。不拘何人。能揮我一拳。蹴我一足。我卽推牛刀。若縮朒者。非夫也。因與康謀。乘僧閒。坐於隔牆。飛腿擊之。僧壁同傾。越數十步外。僧起笑曰。郎君何須壁後置人。今已矣。會有相見日。未知鹿死誰手耳。後年餘。喬與康同游天台。於石梁旁遇僧曰。此間無人。正可一決雌雄也。當互毆三拳。以判勝負。喬方踟躇間。康目之。僞云。君素習易筋經。今何怯也。請師先之。袒衣立石壁下。僧鼓勇擊之。時康立其旁。飛蹴喬肩。喬倏然橫倒。而僧之臂已擊於石壁上。成折肱矣。此不惟鬪力。亦鬪智也。野二遇此僧。必洞胸矣。三異筆談

### 越人倪某

越人倪某。世習申韓。由幕而官。去官復幕。在保陽待聘。住旅寓有時矣。迫切鑽營。無微不至。是年冬。寓中內廳宅有人來住。章服華煥。僕從趨踰。絡繹不絕。似皆憲司之紀綱也。倪詢其僕。知爲大名府總司閹。奉本官命來省置辦衣飾。爲少君完姻。並延訪善於刑名錢穀之士。倪探得其情。卽具衣冠往拜。其人稍閒。卽與盤桓。竟成莫逆。

知其性情慷爽。而目不識丁。一夜漏已三下。突有役來傳本官諭帖。催其人歸去。其人得信。叩倪寢門而告之曰。請先生起。煩爲一讀來書。有役守候。不能待旦矣。倪起而誦之。不過因辦公乏人。諭令迅將什物置妥卽去。所訪之新友。必須於開篆以前到署等語。其人踟躕曰。辦物不難。訪友非易。先生意中有信託之人乎。倪遂自述其歷就州縣。助其東人升遷者不一。其人笑曰。吾以先生爲記室耳。疇知申韓妙手。近在鄰居。而猶外求人耶。卽請代某稟覆。云以千金訂倪先生。俟各物辦齊卽回。不敢逗遛也。倪爲書就。交役竟去。次日。其人送關書聘儀來。請安侍立。不敢抗禮。其僕從咸來叩喜。倪大悅。扯其人入坐曰。相好在前。旣承不棄。斷不可以常情拘也。其人稱謝側坐。告以首飾尙未造完。俟工竣先歸。當遣車奉迓耳。又數日見倪。似有不豫之色。倪惶然叩故。其人曰。貴鄉親某號緞局內。看定貨物。不過偶掛數百金耳。艱持不舍。何其吝也。倪曰。市儈恆情。何足怪者。吾與素識。代爲作保。雖千金亦不靳矣。其人曰。如此固好。恐先生未之信耳。倪曰。忝在同署。尙何可疑。是足下多心矣。卽偕赴緞

局所定之物。實千餘金。僅付百兩。餘皆掛欠。故未肯與。然局主已訪得大名。確有姻事。及倪就其幕。故倪至。殷勤款接。其人笑曰。爾舖主不我信耶。請以先生爲質。明日來請先生時。其價原車帶到。決無貽誤。倪亦言其就事之故。願力任之。局主欣然。交其貨物。給其人滿載而去。次年俟至春仲。無車來接。局主懷疑。邀倪同往大名。問司閹並無其人。亦無易幕事。倪歸貨其行李。以償鋪賬。悔恨無及。夜雨秋燈錄

### 蔣中丞

蔣中丞撫浙時。察訪官民之不法者。重懲之。溫郡某太守。簠簋不飭。聞風而懼。突有外來三人。操北音者。寓府廨側。不言所事。凡太守升堂。必往觀之。暇則與館人辨論。太守之是非曲直。館人怪之。密報府縣。太守矚俟三人出。搜其行李。得中丞訪牌一道。凡太守私事。俱在內。宛然紫印。又首縣致永嘉令一函。尙未緘封。有云蔣廳尊奉大憲命。探事貴治。諸祈照察云云。太守益懼。密與永嘉令商酌。擬重賂之。三人歸。見箱篋俱亂。喚館人詰之。館人曰。閣下去。太尊來拜。必欲面晤。在房中坐俟半日方去。

動閣下之行李者。其太尊乎。三人默然。既而曰。機事洩矣。盍去諸。遂買舟行。館人飛報太守。轉令永嘉令往拜之。至舟中。僅有一人。令問蔣司馬何在。二人曰。我主馳回省垣去矣。留函奉呈。令收閱。一係首縣原函。一係司馬自致。云公事匆促。不及謀面。深致抱歉之意。令白太守修書。餽柑橘四桶。中藏白物。因其僕追贈之。未幾。太守至省。晤蔣司馬。訊無赴溫事。知前物已入騙子手而不敢言。夜雨秋燈錄

騙壻

都中淮郡會館。有二新館。本爲客店。館之南鄰某姓者。當日店主人也。家小康。子一女。以賃寓爲生。嘗有客從江南至。云是縣令引見入都者。起居服御。意氣自豪。僕從三四人。出入裘馬甚都。主人子朝暮聚談。亟相契洽。一日有老僕倉卒問訊至。叩頭呈書。客展讀未竟。號泣失聲。問之。則夫人產難亡矣。主人勸慰至再。每語及夫人令德。輒哽咽不能已。時主人女年方及笄。姿色端麗。媒氏爲客議婚。客不可。曰。先室亡未踰年。何忍及此。主人益重之。屢議而後許。擇期入贅。踰月。忽晨起不知所之。盍



僕釵釧盡失。急尋之。杳無蹤跡。市中索逋負者。聞信踵至。計又不下千金。皆曰是汝壻也。不然。誰貰貨者。主人徧起客筭。空無所有。惟存鉛錫數十方而已。由是賣屋代償。生計大窘。而明府夫人寡居至今。不能作渡口石尤風。只合爲山頭望夫石耳。同邑曹衛川先生云。金壺七墨。

### 雪媒

康熙己丑冬。崇仁有兩姓同日娶婦者。一富室賈姓。一士族謝姓。新婦一姓王。名翠芳。一姓吳。吳貧而王富。兩家香車遇於陌上。時彤雪布空。飛霰如掌。郊原谿谷之間。一望皎然。幾不辨途徑。車上各飾綵繒。覆以油幕。積雪封之一二寸。絢爛略相似。同行二三里。共憇於野亭。輿夫僕媵輩。體寒欲僵。共拾枯薪。爇火亭中。久之。而雪愈甚。恐日暮途遠。各擁香車。分道而去。是夜翠芳將寢。環視室內。奩具甚薄。且非己物。疑壻家質而易之。怪歎不能忍。乃向壻曰。吾紫檀鏡台安在。可令婢將來。爲我卸妝也。壻笑曰。卿家未有此物來。今從何處覓。翠芳曰。賈郎何必相誑。壻又笑曰。吾真郎。非

假耶也。翠芳曰：謂耶姓賈耳。壻曰：某姓謝。翠芳聞言大駭。乃啼呼賊徒賣我。壻大驚。不知所措。家人盡集問故。翠芳唯啼呼不止。謝母叱曰：家本儒素。誰會作賊。汝父母壓我貧薄。教汝作此伎倆耶。誰能畏汝。翠芳曰：吾聞汝家本姓賈。今姓謝何也。母曰：咄婢。豈有臨昏而易姓者乎。然則汝家亦不姓吳乎。翠芳悟曰：我知之矣。汝婦自姓吳。吾自姓王。吾來時。途次遇一嫁娘。同避雪亭下。微聞旁人言此婦吳氏。其壻家吾亦聞之。不能記憶。殆汝家婦也。而吾乃賈氏之婦。雪甚寒極。兩家車從。倉卒而行。其必兩誤而互易之矣。速使人覘於賈氏。當得其故。衆咸以爲然。而賈氏相距三十里。使者明日乃達。則延陵季女。已共賈大夫射雉如臯矣。蓋吳女凝視妝奩。略聞姓氏。亦頗知有誤。而心豔其富。姑冒昧以從之。至是知之。佯爲怨怒。而盆水之覆。已不可收。卽賈氏之子。亦不欲其別抱琵琶也。使者反報。翠芳欲自盡。或勸之曰：王謝之婚。本由天定。殆姻緣簿上。偶爾錯注。合有此顛倒。今賈氏已婚於吳。則阿卿自宜歸謝。尙何負哉。翠芳不可。謝氏乃馳介詣王公。告以故。王公深異曰：非偶然也。卽遣媒者。

來告。願爲秦晉。翠芳以父母之命。乃始拜見姑嫜。同牢合巹。成夫婦之禮。厥後賈氏陵替。吳女憤恚而卒。謝氏子補諸生。終身伉儷。兒女成行。而翠芳以順婦稱焉。是事也。時人謂之雪媒。耳食錄

### 吳孝子

孝子吳姓。忘其名。魯之恩縣東鄉人。少孤。喑啞不能言。凡病啞者耳必聾。蓋有竅相通。均塞故也。其居距郭三四里。因貧爲邑之質庫擔水。得值卽奉母。不敢浪以一錢自啖嚼。雖啞且聾。而性敏。能以己意揣母意。母亦習久。能以勢與孝子言。每日母思食何物。必呀呀請母命。而後詣郭購之。回如四指作圈。卽知爲餅。撮指覆腕。卽知爲饅首。叉手成八字。卽知爲水角子。伸掌使平。知爲魚。垂手如提。知爲肉之類。百無一爽。母老且病。每食苦噎。孝子卽於暗處洒眼淚。見人必指畫。若言母食少。攢眉蹙額。作憂慮狀。食若甘且多。孝子卽對母呀呀若唱歌。張兩手起舞。效演劇者關目。博母歡。見人又指畫。若言母食多。年五十如一日。未嘗稍變更。每嚴冬。必先以己體爲母

溫布衾。既暖。又着衣起。爲母解衣就枕。已則蜷伏牀足。聽母鼻息酣。始逡巡趨就草榻眠。每暑懸蘆簾於門。寢母於中堂竹榻。已則解衣當門臥。意若代母飽蚊蚋然。居雖近野。而白鳥竟絕跡。里人賢其行。爭呼之曰吳孝子。然究赤貧。無肯以女妻之者。孝子亦絕不計及牀頭人。母每謂人曰。吾寧有承順反哺子。不願有忤逆長舌婦也。一日。正擔水入肆門。適恩宰梅公子。盛服至。誤潑水濺公子服。怒且叱。肆中執事人。急趨至拱謝曰。公子莫怒。此吳家啞孝子也。公子驚詢其事蹟。遷怒爲喜。假青蚨五竿贈之。孝子堅却不敢受。執事人舉無名指示之。蓋凡啞者。均以拇指爲天。食指爲地。中指爲父。無名指爲母。小指爲妻子耳。孝子見之。知公子憐伊有老母。始伏地稽首拜。呀呀指天地。感激非常。然當公子叱辱時。則固挺立不屈。毫無畏怖者也。擔水訖。荷錢歸。甫近村。見母正倚閭。遽歡喜呼嘯。泥滑幾傾跌。母見錢。驚問何來。孝子口呀呀指畫。呀唔不能道一字。母恐其因貧誤行竊。遍問鄰右。亦不知其所由來。叱使膝立。怒曰。吾寧有殘疾擔水子。不願有邪心穿窬子也。自扶杖詣質庫。遍問執事人。

始知實吳公子持贈。始誦佛而回。顧往返雖五里。然究困老病。躑步遲滯。半日始歸村。視孝子猶跪地不敢動。笑慰之。孝子亦卽收淚。笑舞牽母衣。視母床。其意蓋欲爲母易新製。但不知從何做起耳。噫。情態可想也。梅公知之。給匾旌其廬。孝子泣不受。里人懸於土圩門以爲榮。捻匪竄其鄉。見匾遽額手曰。此孝子里也。莫驚他。旣而思識其風範。仰謂守者曰。若肯以孝子一登陴。使我輩一瞻其面目。卽退。孝子卒抱母搖手不敢出。賊亦旋去。時浙人孫君怡軒。爲恩署錢幕。言於梅公。釀資得百金。存質庫。囑執事人代孝子略購田疇。兼覓配偶。因梅旋解任去。不知其究竟云。夜雨秋燈錄

### 師戒

里中有走無常者。嘗一臥數日。一日乍醒。遽向其家人曰。吾里外科岑氏子。昨已死乎。家人曰。然。君至冥中。亦見之乎。曰。吾昨於嶽廟城隍廡下。見鬼卒拘岑至。城隍拍案怒曰。汝在陽間做得好事。岑叩首涕泣曰。小人生前。並未敢造惡。城隍怒曰。觀爾聾頭鼠腦。胸中豈有一點墨。奈何旣以牛醫殺人。更託名教書。誑錢財而誤人子弟。

乎。命鬼卒拽下予杖。岑復叩首曰。小人雖託名世醫。然從無過而問津者。勢不得不  
草菅人命。第爲飢寒所迫。權行訓蒙度日。自分生平所讀。止有一部四書。又大半句  
讀不全。故所取修金。極豐不過二兩。大約不過菜傭與卒。日不識丁者之子弟。願相  
從受業。彼亦只圖省費。無意深求。若四書以上。小人亦不敢妄教。故猶不致大誤。城  
隍色少紓。顧判官取册檢視。至岑首一行。注曰綿蠻讀作黃鳥。城隍怒曰。此輩只合  
轉入畜生道中耳。又檢至下一行。注云如惡惡皆讀臭。如好好皆讀色。城隍笑曰。二  
字如此讀。試問作何解。岑曰。此當讀爲四句。言如其爲惡。須如惡臭。斯爲眞惡。如爲  
好人。須如美人。斯爲眞好。則善惡之意皆誠矣。城隍曰。然則後文惡而知其美者。又  
作何解。岑曰。此惡字當讀去聲。蓋惡之爲物。天下未有以爲美者。但據本草。則人中  
黃之益人多矣。是其味美於回也。故孟子曰。惡句在其敬叔父也。城隍罵曰。畜類。汝  
平日以此教人。尙謂未嘗誤人耶。遂命罰作狗。恣其食屎以償之。岑復叩首曰。小人  
生前。以飲啖兼人。中多痰火。每當暑作喘。其苦萬狀。願大王垂諒。罰作一牛。城隍訝

問曰。此又何說。對曰。小人向讀千家詩有云。赤日行天牛不知。惟牛能不知暑熱也。城隍大笑。令鬼卒拽下。先杖一百。仍押回里中。俾投生爲牛。爲課徒者示警云。家人皆未信。次日。聞比鄰畜牛生犢。往覘之。果然。戲呼其名。犢輒昂首掉尾而鳴。若應聲然。埋憂集

### 足有赤痣

海昌陳清恪公左足下有赤痣。每自詡爲貴徵。黃夫人者。公配查夫人之侍婢也。嘗爲公濯足。手捧足而視其痣。公笑曰。婢子何知。我所以官極品者。此痣之相也。夫人亦笑曰。公欺我。公足祇一痣。已貴爲公卿。何以我兩足心均有赤痣。而爲婢女。公聞之。驚使跣而視之。信。遂納爲簞室。生二子。長文勤。公世宦。官宰相。次闇齋。公世侃。官翰林。查夫人亦生子。皆登科第。廩仕。世目公門爲五子登科云。庸閒齋筆記

### 武夫不知文字

張璧田軍門玉良。起於行伍。目不識丁。余初於蘭谿軍次見之。適有急牒至。軍門折

閱。點首攢眉者良久。乃舉付從兵。令送文案處。余詢牒中何事。笑而不答。以爲祕而不肯宣也。越日又見持一札。顛倒觀之。大惑不解。旣乃知其本不知書。特爲此以掩飾人之耳目。嘗與程印鵠太守換帖。三代中有名蚤者。頗以爲怪。繼復見其一帖。則是早字矣。因詢其文案某君。答曰。渠不能指定一字。第隨其口語而書之。是以如此。同時有吳總戎再升者。眇一目。每戰必先登。賊畏之。呼爲吳瞎子。嘗延僧追薦先人。僧請三代諱。張目不能答。急召文案委員。令撰一好名字與之。聞者捧腹。此與侯景之托王偉撰七廟諱者何異。善乎國初之馬惟興也。惟興以孫可望將來降。官至福建總兵。順治之季。嘗賜諸將三代封典。惟興久之不上。撫臣問之。愀然曰。某少時爲寇虜。相從作賊。今幸際會風雲。實不知父何名。母何氏。若私撰之。不惟欺君。亦自誣其先人矣。願公以此語上聞。但恩榮及身而已。一時皆是其言。惜無人以是說告之軍門及吳總戎也。庸閒齋筆記

## 鐵肚皮



鐵肚皮。亦吳門人。腹蟠然。大於五石瓠。堅硬如鐵。嘗行市中。以腹觸人。人立倒。或有以楮擊之者。聲橐橐然。未嘗有所楚也。一日。吳縣城隍廟演劇。鐵肚皮當臺立。人莫敢近。一老叟至前。以手摩其腹曰。真好肚皮。宜其以鐵名也。言畢而去。須臾。腹漸痛。俄而益劇。歸至家。溺血斗餘。而痛未絕。有謂之曰。此老叟精拳勇。得少林宗法。汝腹爲其所損。不往求。殆將死矣。鐵肚皮大懼。乃物色老叟於市。投類乞命。叟笑曰。吾愛汝腹。不過略一摩挲耳。何至是。授以藥少許服之。痛立止。鐵肚皮自後不敢與人角力。而腹亦漸瘳。無復舊時彭亨矣。香飲樓

### 瓦盆

濬吳淞江時。工人於土中獲古盆。似瓦非瓦。盛水則熱。繼且沸。旋以爭奪致碎。諦視之。盆爲夾底。中畫離卦。蓋做諸葛武侯刁斗遺製也。不知何代物。何人所造。又瞿飛云。幼見開干山市河。得一瓶。其式匾。背有小孔。可懸挂。人皆不識。會遠來互郎。見之曰。是常有偶。如得二。我以十金爲購。土人尋覓。果又獲一。人問何用。曰。余亦未稔。

夙聞故老云。敝地有寶瓶二。失於千山。此若彷彿形似。今且試之。遂對懸兩楹上。天既黑。命盡去燈燭。少頃。瓶口奕奕有光。漸長相接。中具蛟龍獅象禽鳥花卉狀。光彩異常。照見種種色。味爽而斂。明齋識小

### 青鳥術

青鳥之術。有不可不信者。大興朱文正公。先浙人。曾祖客於京業。鍛有江西一士。善地理而道不行。迍邐已甚。居與朱翁隣。每出入扃戶。卽囑朱翁視焉。居數歲將歸。謂朱翁曰。承翁愛已久。愧無以報德。意中相得佳城二三處。翁能移此乎。翁謝以無力置地。術士言此地價不昂。我力尙能買以贈翁也。因以千文買蘆溝橋西鎮岡塔前地一區。爲植榆一株。告朱翁曰。他年移殯來。樹下卽穴也。後嗣當大貴。然須堅囑後人。若貴切無以土塚不華。別加土山與石坊享堂等物也。故公雖入閣。惟土墳一邱。樹二三十株而已。公歿後。公之姪山東方伯錫爵。於墳後培以小土山。中央畫一紅日。居無何。公子四品卿遂亡。公之孫觀察公。年未四十而夭。方伯亦褫職責戍。姪孫

澄守常州府。復左遷病廢。累世簪纓。頓嗟零落。近公之曾孫某。悟其故。不告家人。竟將土山毀去。乃舉於鄉。由教習得縣尹。公後起。乃漸有人云。歸田瑣記。

### 蔡錫

閩中洛陽橋圯。有石刻云。石頭若開。蔡公再來。鄞人蔡錫。中明永樂癸卯鄉試。仁廟授兵科給事中。陞泉州太守。錫至。欲修橋。橋跨海。工難施。錫以文檄海神。忽一醉卒趨而前曰。我能齋檄往。乞酒飲大醉。自沒於海。若有神人扶掖之者。俄而以醋字出。錫意必八月二十一日也。遂以是日興工。潮旬餘不至。工遂成。語載錫本傳中。乃實事也。人不知而以其事附蔡端明。且以爲傳奇中妄語矣。錫官至都御史。以才廉聞。

筠郎偶筆

### 過期當票

維揚王氏婦。孕六月矣。適有隣貓來。攫其籠中之鳥。婦起逐之。仆於地。震動胎氣。勢甚危殆。一隣媪曰。可速覓一二紙過期不贖之當票。燒灰。和開水服之。則胎卽安矣。

如其言。果無恙。夫過期當粟。已成廢紙。乃有安胎之妙用。其理不可解。亦見天下之無棄物也。斗郵

### 石中雉雞

紹興章雍如家後圃。前明巨室花園也。康熙間。工人掘地種菜。得一青石。高二尺許。其形正方。上鏤一文雉。飛鳴於牡丹間。花開三朶。含苞者又二。刻畫極細。因置之書室庭中。以爲坐具。一日。忽聞石中穀穀作聲。嗣後無日不然。或疑爲寶。或疑爲怪。因命石工自下鑿石視之。石堅甚。凡兩日始開。倏一雄雉自內飛出。毛羽燦然。止於屋上。少頃。向南飛鳴而去。是年章氏子姪。舉於鄉者三人。後兩科。又中其二。或言此是前知者。預識此地。日後中式人數。故於百年前。預埋讖文。以爲後驗。若卦影之類。是已。夫後世之事無窮。科名小事。安得人而先詔之。石面鏤刻雉形。石中卽生一雉。尤不可解。且塊然一石耳。初無罅隙。氣血之物。何由而生其中。雖格物者亦不能深窮其理也。火鼠冰蠶。何足異哉。其石至今猶在章氏書室中。聽雨軒

京師有善作口伎者。能爲百鳥之語。其效畫眉尤酷似。故人皆以畫眉楊呼之。余嘗聞其作鸚鵡呼茶聲。宛如嬌女窺窗。又聞其作鸞鳳翱翔。戛戛和鳴。宛如在天際者。然至於午夜寒雞。孤牀蟋蟀。無不酷似。一日作黃鳥聲。如睨睨於綠樹濃陰中。韓孝廉崧。觸其思鄉之感。因之落涕。亦可知其伎矣。嘯亭雜錄

### 剛剛奪黍

割麥插禾。郭公郭婆。看蠶看火。脫卻布袴。卽布穀催耕之鳥。方言異名。實一物也。吾鄉謂之光棍奪鋤。濟寧則謂之剛剛奪黍云。李紱五濟人。予姻家也。告予曰。濟有丐。無姓名。人以其好學鳥言。呼以剛剛奪黍。居無定所。多宿古廟中。衣敗絮。冬夏不易。肘間繫瓦罌一。斯須不去身。予孩時。聞其過門。必約鄰兒數十。環繞之。令其作各種聲。丐蹲牆下良久。忽聞雄雞報曉聲。鴉雀爭噪聲。牛鳴聲。犬吠聲。蟋蟀聲。蚯蚓聲。長空雁唳聲。夜鼠嚙衣聲。餓貓捕鼠聲。蒼鷹搏兔聲。馬嘶聲。車麟聲。磨室籊麩聲。萬戶

擣衣聲。凡世間所有。無弗洋洋盈耳。須臾呼作風聲。拔山撼樹。駭浪驚濤。一時並作。復有千百帆檣。互相撞擊。舟人撐篙把舵。竭力呼號。勢紛糾不可解。羣兒方噤齟不敢言。俄砉然一聲。如巨霆轟震。萬籟俱寂。丐徐徐欠伸曰。技完矣。乞我錢。人予一枚。積至百餘。卽往酒家沽酒三杯。以餘錢貫酒滿罌。買膏梁餅數枚。逍遙去。初敍五以爲都下口技之流耳。旣冠之。江南省其從父。從父曰。汝在家曾見剛剛奪黍乎。曰。瀕行時猶聽其技也。鬚髮白乎。曰。貌若三十許人。從父拍案曰。異哉斯人也。我幼時讀書。聞其人過。卽逃塾聽其技。問其年四十矣。今我年五十五。計此人將百歲。何不老也。得毋仙乎。敍五留數載北還。又遇之。貌不異曩時。問年幾何。曰四十耳。噫。仙耶否耶。抑有駐顏丹耶。予聞古之異人。常溷跡塵埃中。惜敍五時尙幼。未以吐納導引之術詢之也。蝶階外史

### 畫怪

京師有人於琉璃廠見一畫。畫惟繪一燈檠。火熒熒如豆。以數十青蚨易之。歸不知

其何所用。姑懸之室中。是夜滅燭而寢。則一室如晝。審視之。光自畫中出也。以語人。人無識者。後有人以重價購去。問其故不答。或疑此如古人畫馬。能夜出齧草之類。或曰其軸中有夜光珠。可寶者不在畫也。印雪軒

### 賣竈

賣房不賣竈。杭俗也。黃翁家素封。子某。游蕩無度。翁度身後。堂構必不保。乃修七竈。每竈埋萬金。糞子售居室。拆出後。或有悛心。庶足爲衣食計也。又慮子不知。乃書一冊。置中堂額上。計售室必下額也。後翁以疾卒。田產典肆什物。轉售既盡。乃及居室。既成交。售者屢促拆竈。輒遷延。以得貲故。益揮霍。某故茂才。日約仁錢兩學諸生。會飲故宅。初。新主以原業主假地宴賓。亦常情。後日日往。厭之。不聽入。某曰。宅雖售。竈未拆。我用我庖。何傷焉。新主浼人居間。再畀七百金。俾拆竈去。某既得金。並竈付新主。而日約諸生茗談堂上。新主又屏之。曰。額未下。猶吾堂也。又浼人畀以三百金。使下額。某得金。曰。額亦贈主人。余無所用也。新主人下額得冊。拆竈得金。浮於宅直數

十倍。遂爲富人。某旋中副車。官直隸州判官。後不知所終。蝶階外史

### 蜀婦

蜀中多養鴨。鴨以億萬計。村設蓬。蓬中人合東西南北爲隊。多至百餘人。一村有婦人居與蓬距數武。夫出外作小負販。夕有客來寄宿。拒之。客曰。我攜三百金。暮無依。不得已求託一席地。雖戶外無妨也。婦曰。我孤身。如子戶外。亦不保留客。蓋赴鴨蓬求棲止。客如言去。至二更。聞蓬中呼救甚慘。婦度蓬中人謀客貲。宜速救。因縱火自焚其室。村鄰咸來。婦曰。且無顧火。速往鴨蓬救人。至則已支解付鴨食之。僅餘一股矣。因縛送官。分首從置之法。蝶階外史

### 籠絡名幕

有某幕者。精於刑名之學。無家無室。隻身客保陽有年矣。性情孤峭。避俗如仇。其寓內無長物。一木榻。可眠一人。一枕。鉅若隱囊。有延之者。攜此二物往。不數月。輒託故去。雖欲強留之不可得。有某縣令者。慕其名。託友人羅致之。友以其性情告。令曰。無



妨也。吾自有籠絡之術。乃延之往。比至。潔一室。俾獨處其中。而每晨必有一婢排闥入。手一盒。陳案上。云老太太命送以點朝饑者。久之漸稔。頻以眉目送情。某心動。入以游語。亦不拒。遂成苟合。一日令至。商量公務畢。忽正色曰。人言君品學兼優。自我觀之。學則優矣。品則未也。某知事洩。面赤不作一語。已而悟曰。是矣。是矣。我墮君術中矣。君無多談。自今以往。君作一日官。我佐一日幕可也。令大喜。卽具妝奩。以此婢贈之。而每歲之修。僅送其半。同列咸莫測其意。卽某亦心怪之。然某感令待之厚。無事不爲之盡力。令由此得能聲。屢遷善地。而某自納婢後。連舉數子。亦漸識有生人之樂矣。後數年。令以親老乞歸。乃核算其後所贏之修。造其室而告之曰。我已淡於宦情。此去不復爲出山計。君不能與時俯仰。他就必不合。幸爲積此金。歸置薄田。亦足自給。無俟更橐筆遠遊。我兩人從此分袂矣。某始知令待己之周。俟令歸。卽挈眷南回。不再出。此事凡幕遊保定者。咸以爲佳話。余謂令非某不能循聲大起。某非令必至落魄終身。賢嘉相遇。洵非偶然也。印雪軒

## 偷畫

有白日入人家偷畫者。方捲畫出門。主人自外歸。賊窘。持畫而跪曰。此小人家祖宗像也。窮極無賴。願以易米數斗。主人大笑。嗤其愚妄。揮叱之去。竟不取視。登堂則所懸趙子昂畫失矣。子不語。

## 圓光

圓光一術。法頗簡易。余所見二人。均有奇驗。一年十三歲時。春藻趙氏表姨。許字瑯琊。將報聘。購如意雙。置盃中。啓視已失。婢嫗輩咸欲自明。乃釀錢爲之。術者儒衣冠。一老學究也。所需香爐一。燭台二。案上粘白紙。術者南面立。口中喃喃誦金光咒。其咒外祖及沈師均習之。非黃冠祕笈也。誦半時許。以兩手摩挲拂紙上。掌中若螢火。紛紛散落。彷彿成一鏡。則衆皆見之。先是選兩童。俱年十六。左右侍。至是問童曰。見鏡乎。皆應曰見。又問曰。鏡中何見。曰。見一馬繫宅前旗竿外。曰。謹睇之無瞬。曰。有人來解紼矣。備鞍矣。上馬矣。術者叱童曰。急逐之勿懈。一童林姓。素黠。游移間已不復

見一童蔣姓甚愿。則曰：往東行甚速。我步亦絕塵，不敢後也。頃之，曰：下馬矣。問何所。曰：似府城隍廟。曰：汝不可入。第立石獅旁待之。曰：傳輿從矣。曰：輿從入矣。曰：乘輿出矣。儀衛與賽會無異也。行甚緩。盍先歸乎。術者曰：第隨行。暇則流覽焉可。曰：至嶽廟前矣。某錢店方數錢，呼之不應。某茶食鋪方裝粬糒，戲乞之亦不顧。皆其所熟識也。曰：過秀野橋矣。一惡丐佯死臥地。官役均不問何也。又曰：過包家橋矣。術者令開門。門開，見二老趨出。一白髭豐頰，一長髯黝瘠。證其貌，則堯峯祖姑丈之父與叔。童所未及見也。跪而迎轎中人，拱手乃揖而隱。轎止聽事坐。呼役搜賊。兩青衣諾而入。童呼曰：奶奶何不避也。奶奶髻上珠串觸簾墮。速拾之。奶奶謂余祖姑。適坐中堂。聞外間傳言乃起。歸內寢。相隔遠。所見無少舛者。青衣奔走幾徧。童乃呼獲如意矣。已折且破。藏廊下舊茶竈中。併獲竊者矣。問曰：識否。曰：識。童之父叱曰：勿言。乃附父耳告之。又曰：以婦女識之矣。又縛一人來。笞二十遣去。卽復旃舅乳媪及夫也。城隍卽起。術者復令開門。而童已蹶然倒矣。春藻不究竊事。卽飭其夫領回。其夫仍壯盛。不見。

千丁作受笞態。意陰律亦輕。不過蒲鞭示辱耳。第越縣報府。則與陽例不合耳。越數日。青松石外叔祖蔡茂才涵青。遣人來問病。亦可圓乎。術者諾之。予亦觀焉。侍童則外祖家童顏也。先所見胥與春藻同。神坐中堂。青衣先於後池中。帶一垂髻婢出。顏固識之。詫曰。吳家女乃在此。蓋僕吳良女甫十一。溺於池。見女嬉笑如生時。不怖亦不戚也。神曰。此非崇者。反之池。復有一人身蛇首者來謁神。起而問之。似是宅神。卽立於旁。繼又摔一垢膩人。肥而鬚。責之十。以曾索酒食故。病則非罪也。蛇首人與神語良久。其神太息而起。術者曰。此病也。非崇也。無能爲矣。婢溺已數年而貌如故。地下真無歲月矣。曉嵐所記。節婦已霜雪盈顛。而其夫以夭折故。依然美少年也。其言信然。三異筆談

譎判

乾隆間。蘇州樂橋有李氏子。每晨起。鬻菜於市。得錢以養母。一日。道中拾遺金一封。歸而發之。內題四十五兩。母見之駭然曰。汝一窶人。計力所得。日不過百錢。分也。今

驟獲多金。恐不爲汝福也。且彼遺金者。或別有主。將遭鞭責。或逼償致死矣。促持至其所以待。遺金者適至。遂還之。其人得金。輒持去。市人咸怪其弗謝也。欲令分金以酬。其人不肯。詭曰。余金固五十兩。彼已匿其五。又何酬焉。市人大譁。適某官至。詢得其故。佯怒賣菜者。笞之五。而發金指其題。謂遺金者曰。汝金故五十兩。今止題四十五兩。非汝金矣。舉金以授賣菜者曰。汝無罪而妄得吾笞。吾過矣。今聊以是償。而母所謂不祥者驗矣。促持去。一市稱快。

理憂集

## 大通余翁

鑄陵大通鎮。前濱大江。商估雲集。鎮中余姓。巨族也。有余翁設旗亭於江滸。過客就而啜茗。日繁有徒。一日客散後。翁於座上拾一布囊。內貯白金三百兩。知客所遺。姑藏待之。少頃。一客惶遽而來。東西尋覓。翁問客胡爲者。得毋有所失乎。客曰。然。頃遺一布囊。內有白金若干。翁見之否。翁以其言既符。笑曰。君言不謬。幸是老夫拾得。理合奉還。遂攜囊出。並請驗封識件數。而後歸之。客曰。翁眞長者。願分半相酬。翁堅辭

不受。客感激拜謝。稱歎而去。將渡江。適遇大風。見中流一舟。簸蕩欹側。勢甚危急。客惻然心動。以失金幸返。不如捨此儻來物。作一善事。迺手持白金大聲呼曰。有能拯來舟之急者。當重犒之。岸檣漁舟甚多。貪利爭破浪往。將來舟衆人。扶登漁舟。來舟載輕。得以無恙。既達岸。客出金分犒舟人。同聲稱謝。內一少年。孽客袂曰。小人危急。脫不遇君子。斷無生理。請至舍間。當使合家拜德。稍伸謝忱。客再三辭之不得。及其家。少年亟呼父出見客。其父非他。卽余翁也。翁年六旬。僅此一子。向非還金。則已葬魚腹矣。還金而救子厄。天道亦巧矣哉。里乘

### 千金亭

方恪敏公微時。屢試不第。行年五十。猶以筆耕爲業。有精風鑿者。謂公大運將至。不十年。可位至封圻。公問何之而可。其人曰。公利西北。不利東南。當以入都爲可。公固善書。素欲赴部。謀爲議敘。聞言遂決意北上。襆被徒行。至保定界。資斧已絕。路旁有茅店。聊坐少憩。老嫗提壺茶置公前。渴不敢飲。案堆角黍纍纍。公正苦飢。涎視不語。

老嫗覘公意。笑問曰。客欲食耶。公笑曰。然。奈無貲何。老嫗笑曰。此細事耳。無貲何害。遂命子婦取角黍一盤。勸公飽啖。公亦不辭。啖畢。索紙筆。書券付老嫗藏之。謂他日過此。必酬汝貲。此券慎無失也。乃未及十年。公果爲直隸總督。履任時。百官郊迎。觀者夾道。公命清苑縣令。召老嫗至。老嫗不解所謂。戰慄跪伏。輿前。叩首請罪。公命左右扶起。溫言撫慰。笑問曰。一別多年。汝髮已盡白矣。茅店猶無恙耶。前飽啖角黍。今當酬汝貲。所書券。可繳還也。老嫗聞公言。始憶及前事。乃笑對曰。向察公顏色。敬獻不腆。未敢求謝。公今爲貴人。尙憶及老婦。死且不朽。前券什襲藏之。當卽奉繳。戔戔微物。那得幸邀賞賚。敢辭。公笑曰。汝歸休。保衛眠食。吾當酌給汝貲。令汝子小權子母。以娛餘年可也。迺命人賚賜千金。送其還家。老嫗感公德。作亭奉公粟主而尸祝之。土人至今豔稱其事。皆呼其亭曰千金亭。里乘

### 褚祚典

褚祚典。明嘉靖時關中諸生也。性豪誕。好馳馬試劍。尤善超距。嘗與諸健兒較藝。一

躍能摩真定府銅佛頂。諸健兒咋舌稱贊。謝不及。素嗜賭。一擲千金立罄。負輒與諸健兒伏莽探丸。藉獵獲以償賭貲。後以從征倭寇得官。洊擢山東按察使。平時所交綠林錦帆之徒。暮夜猶與往來。遇大腹賈挾重貲。必邀同獵取之。褚亦自鳴得意。樂與從事。一時童謠有云。君勿行郊藪。陸有攔路虎。君勿行江湖。水有吞舟魚。故凡估客舟車所至。莫不惴惴患盜。各有戒心。撫軍聞之。以語褚曰。道路童謠。君聞之乎。褚唯唯。撫軍正色曰。今外寇甫平。萑符未靖。商賈不通。民何聊生。君職司爽鳩。應爲民除害。坐視不理。將何以辭其責也。褚聞之。無任主臣。急檄所屬府州縣。嚴行緝盜。如敢姑息寬縱。立予糾劾不貸。各屬奉檄畏劾。疊限比捕。卒無所獲。時湖南有名捕梁科者。年七十餘。家居柴門。久已罷役。羣捕畏比。因釀貲具厚幣。遣使求助於梁。梁初以年老無能爲役。固辭。旣款使者以酒。酒酣。談少年時捕盜事。精悍之色。見於眉宇。使者拊掌贊歎。故諛詞以激勵之。謂今盜風雖熾。均非公敵。如勉爲一行。使若曹知捕班中尙有老廉頗在。當不敢爲。否則若曹不謂公年老。反笑公膽怯。當日之英雄。



掃地矣。竊爲惜之。梁不禁耳。熱技癢。掀髯笑曰。汝激吾耶。不得已。偕汝一行可乎。使者大喜稱善。不日同至山東。羣捕接見甚歡。僉謂曩間盜蹤。實藏臬署。梁謂當偵確虛實。休得孟浪。乃日伏臬垣左右以伺之。一夜漏二下。果見一人躍垣而出。疾如飛鳥而逝。梁故善彈。老猶黑夜彈香火。百步之外。百不失一。漏四下。其人仍如鳥飛還。梁急援劔弓。扣鐵丸。從垣下而彈其額。聽牆內墮地有聲。知已中彈。詰旦復命。歷城令謂大盜斯得。令問盜何在。曰在臬署。令叱曰。汝嚙語耶。焉有臬署而爲逋逃藪者。梁曰。小人已彈其額。公可白撫軍。急諭稽臬署人等。額有傷者。卽盜。盜復何遁。顧此宜速不宜緩。緩則稍縱。卽逝矣。令曰善。急謁撫軍。謂大盜斯得。撫軍問盜何在。曰在臬署。撫軍叱之曰。嚙語耶。焉有臬署而爲逋逃藪者。令曰。捕役已彈其額。公可召按察。急諭稽臬署人等。額有傷者。卽盜。盜復何遁。顧此宜速不宜緩。緩則稍縱。卽逝矣。撫軍曰。然。乃遣人召褚。褚辭以有疾。不可以風。請假一月。撫軍頓足讓之曰。此何事也。而可待至一月耶。令鞠躬進曰。此事關係甚重。如按察有疾。公可枉駕省視。固不

失爲謙尊。况僚屬一體。必不得已。卽寢室亦可晤語。無須遠嫌引避也。撫軍然之。比至臬署。褚辭以不敢枉駕。有事俟假滿謁見再議。撫軍執意省視其疾。褚益固辭。撫軍大疑。卽自下輿。徑入其寢室。褚蒙頭呻吟。不敢露面。撫軍命左右褰被而逼視之。見褚額墳起。纏以布帕。血涔涔外流。確係彈傷無疑也。撫軍瞪目詫曰。奇哉。大盜斯得。我始固料不及此也。反署使人風褚。速自錄供待劾。褚料難掩飾。果據實直承爲盜。不諱。撫軍特疏入告。勅卽正法。自褚伏誅後。盜跡頓戢。里乘

### 弔喪

往者某中丞之喪。同時夫人太夫人皆病。適有州縣四人。方賭葉子戲。門者誤報撫憲夫人故矣。四人者遽擲葉子曰。卽往弔。趣呼輿人甚急。已而他僕自外歸曰。故者太夫人。非夫人也。四人者卽命幹僕往探。徐將葉子理清。曰。竟此一局。往弔不爲遲。探者返曰。太夫人危而復安。夫人以哭撫憲故。暈絕者再。實則撫憲自亡耳。四人曰。賭耳。誰有閒暇弔喪。不如多贏金錢。作買酒資也。金壺七墨

## 拳法

同人邀雨林集飲麟祿堂。觀其拳法。雨林曰。拳非一人可試。請以鉛囊代。卽懸囊於庭架之中。四正四隅。正白隅紅。徑距五尺。囊之相距尺有九。以烟煤塗其半。雨林側身入圍。使僕子車夫輩。先舉四正擊之。揮拳肆應。意態從容。已而入囊。並舉左右自相擊。雨驟風馳。兔起鶻落。乃見囊不見雨林。僕輩或中額。或中臂。幸其力輕。亦有負痛而笑者。朗眉探懷出象棋。適購顏料至。乃以粉靛塗棋子。各向圍中擲之。余索胭脂。和酒噴之。舞既止。衆人前視僕輩。手面如鬼。煤自內出所染也。脂粉自外入者。皆中鉛囊上。五色錯雜。而雨林身無一點。金壺七墨

## 文字之鑒

乾隆時。有葉氏者。家業隆起。作堂顏曰養浩。自後家中死亡相繼。有善測字者。指匾字曰。葉爲羊食。又值牛口。焉得全。急毀之。乃安。余考劉績霏雪錄。載張乘槎能以拆字言吉凶。洪武初。參知政事劉公某。王公某。蒞任浙江日。改拱北樓爲來遠樓。槎往

視之曰。三日內主哀喪之事。如期。王公母夫人病卒。劉公以歷日紙邊坐法。王公延  
槎問故。槎曰。來者喪字形。遠者哀字形。旁二點相續者。淚點也。公命槎易之。乃爲鎮  
海樓。此等解晰字義。眞非尋常智慮所及。復按陸儼山深豫章漫鈔。載其郡中譙樓。  
太守題匾曰壯觀。同知王卿。陝西人也。見之忿然曰。何名壯觀。自我西晉。乃賦官耳。  
又紹興郡齋廳事。匾曰牧愛。臧編修潤謂太守曰。此可撤去。我自下望之。乃收受字  
也。形聲近似之際。可與宋人德邁九皇。克長克君等語。同爲文字之鑿。冷廬雜識

### 訟師

有擊母鼻齒落者。鼻怒訟官。甥急甚。投訟師求計。願酬多金爲謝。訟師令辟呷向前。  
遽齧其耳幾落。麾之出。某大悟。俟對簿時。以鼻齧耳圖脫。力猛致齒落爲詞。獄乃解。

# 廣說鈴下卷

## 鳥識字

嘉慶己卯秋。金陵天雨豆。擊瓦有聲。時夜將半。居民疑是雹。起拾視之。大如綠豆。黑嘴紅皮。次日覓視。竟無一粒。又金陵市有人豢蠟嘴鳥。云其四自能開箱。脚面目具。登小臺演劇。其一能識字。取百家姓字。製小紙牌。各書一字。散佈席上。任意呼取某字。鳥自能覓取。百不失一。其一能鬪天九牌。可與三人合同。作勝負。物性之靈。真不可解。未識用何術教之。蟲鳴漫錄

## 逃災女子

吳蘊山向辦度支。就幕安東時。病瘧。同幕有善祝由科者。俟瘧作時。攜吳手立日中。向日吸氣畫符。吳覺遍身火熱。頃刻而止。有某處飯肆中。來一女。年可十六七。飯訖。計其值祇十八文。女曰。我係下游被水災逃出者。匆匆未攜一錢。家中人行且至。肆主令坐門外待之。及暮未至。觀者如堵。女默無言。有絲店少年。詢飯肆。知其故。憫之。

代償其值。以男女俱少。不便授受。轉央一老翁付之。女酬肆訖。尾少年至絲店。店主詰之。女曰。逃災行已二日。再行亦無所歸。然不能無故受少年恩。計不如嫁之。店主語少年。少年辭以貧。女揜袖露金釧三。曰。不足憂也。店主嘉之。遂邀街鄰爲之撮合。此女觀人於微。不動聲色。亦智矣哉。蟲鳴漫錄

### 葉天士遺事

雍乾間吳縣葉天士。名桂。以醫名於當時。自年十二至十八。凡更十七師。聞某人善治某證。卽往執弟子禮。既得其術。輒棄去。生平不事著述。今惟存臨證指南醫案十卷。亦其門人取方藥治驗。分門別類。集爲一書。附以論斷。非盡天士本意也。世稱天士爲天醫星。亦非真有確據。相傳江西張真人過吳中。遭疾幾殆。服天士方得蘇。甚德之。而籌所以厚報。天士密語之曰。公果厚我。不必以財物相加。惟於某日某時。過萬年橋。稍一停輿。謂讓橋下天醫星過去。真人許之。而是日是時。天士小舟適從橋下過去。城內外遂喧傳天士爲天醫星矣。天士宿學虛心。爲一時之冠。其老母病熱

而脈伏。甚似寒證。天士審證立方。其難其慎。中夜獨步中庭。搔首自言曰。若是他人母。定用白虎湯。其鄰叟亦行醫者。竊聞之。次早到門獻技。用白虎湯。一劑而愈。其名頓起。而不知其卽出於天士也。一日。徒步自外歸。驟雨道壞。有村夫素識天士。負以渡水。天士語之曰。汝明年是日當病死。及今治。尙可活。村夫不之信。屆期。瘍生於頭。昇至天士門求治。與金遣之曰。不能過明日酉刻矣。已而果然。又嘗肩輿行鄉村間。適有採桑少婦。天士令輿夫往摟抱之。桑婦大怒詈。其夫亦扭輿夫毆打。天士從旁解之曰。此婦痘疹已在皮膜間。因火盛閉不出。此我設法激其一怒。今夜可遽發。否則殆矣。已亦果然。有木瀆富家兒。病痘閉。念非天士莫能救。然距城遠。恐不肯來。聞其好鬪蟋蟀。乃購蟋蟀數十盆。賄天士所厚者誘以來。出兒求治。天士初不視。所厚者曰。君能治兒。則蟋蟀皆君有也。乃大喜。促具新潔大桌十餘。裸兒臥於上。以手展轉之。桌熱卽易。如是殆徧。至夜怒發。得不死。有外孫甫一齡。痘閉不出。抱歸求治。天士難之。女憤甚。以頭撞曰。父素謂痘無死證。今外孫獨不得活乎。請先兒死。卽持剪

刀欲自刺。天士不得已。俛思良久。裸兒鍵空屋中。自出外。與博徒戲。女欲視兒。則門不可開。遣使數輩促父歸。博方酣不聽。女泣欲死。至夜深歸啓視。則兒痘徧體。粒粒如珠。蓋空屋多蚊。借其嗜膚以發也。鄰婦難產數日夜。他醫業立方矣。其夫持問天士。爲加梧桐葉一片。產立下。後有效之者。天士笑曰。吾前用梧桐葉。以是日立秋故耳。過此何益。其因時制宜之巧如此。以醫致富。然性好嬉戲。懶出門。人病瀕危。亟請不時往。由是獲謗。然往輒奏奇效。故謗不能掩其名。以高壽終。浪蹟叢談

### 露天燒飯法

符五云。打仗之際。刀惟一掠耳。不可直斫。斫必傷刀。爲他人制矣。馬上槍法。決無向前直刺之理。惟有回身一槍耳。打仗不可不多備鷓子鞋。鞋須穿過二三日者方妙。新恐與足不相得也。必備乾飯一包。與肉脯置腰間。饑時食之。精神十倍。更帶米一二升。若飯盡。可於地掘一小坑。築土令緊。水濕之。鋪樹葉一層置米上。米淘過。更以水濕之。米上覆之以樹葉。葉上鋪土。以火煨之。卽成飯矣。此法大妙。非獨行伍人當



知也。帶白蠟米一包。硃砂少許。遇暑熱暨急難撲跌損傷時。食之可以護心不死。若兵散。不可晚入人家。語皆從經歷中得來。故親切而有味也。廣陽雜記

### 醫貧

吳門葉天士。精醫理。求治者踵相接。一日乘肩輿出。有鄉人迎道左乞視疾。葉停輿診之曰。六脈均調。奚病耶。鄉人曰。公名醫。奇疴險症。無不洞悉。小人所患者。貧病也。不識公能療之乎。葉笑曰。是疾也。亦頗易治。子於晚間來取方。一服卽愈矣。至暮。鄉人敲其門。乞醫貧良藥。葉令拾城中橄欖核種之。俟苗茁來告。當獲厚利。鄉人如其教。未幾。苗芄芄然。走告葉。葉曰。卽日有求苗者。高其值。勿賤售也。葉自是藥引皆用橄欖苗。病者爭往購。數日苗漸稀。求者益多。值益昂。鄉人獲錢無算。苗盡而藥引亦除矣。旣而鄉人具禮來謝。葉曰。病愈乎。鄉人曰。賴公力已全瘳矣。葉笑而遣之。至今吳人傳爲美談。香飲樓

### 沙七

吳門沙七拳勇著名。薄游金陵。無所遇。爲米肆司會計。一日有丐者以石臼置櫃上。予之錢。不肯去。沙視其臼。重百餘觔。以手撲諸地碎之。丐熟視其人而去。次日又一丐至。弄雙鐵丸於庭。丸大如碗。市人方聚觀。忽一丸飛上沙面。沙接而擲之。丐卽拾丸去。越數日。有一僧至肆。狀貌獯惡。手舞雙鉞。旋轉如飛。市人咸驚異。一鉞忽飛落沙前。橫削其頸。沙急閃。鉞着於柱。入木寸餘。沙以兩指夾出。又擲而碎之。僧拾破鉞。俛首去。人以沙屢壞其器。咸爲沙危。而沙殊不措意。又數日。一人持紅束。邀沙於某日晚。至某寺飲。旁人戒勿往。沙徑諾之。先期製衲綴。堅厚如甲。至日被之。兩腿纏雙。纏而往。旣入寺。有偉軀者十餘人。飲於庭。僧亦在其中。見沙至。皆努目相向。沙昂首而進。殿後又有十數人。飲啖如前。沙至。皆相視而笑。沙亦不顧。入室。有二壯士。一虬髯者。一猥喙者。趨迎之。曰。夙仰君名。今惠然肯顧。誠厚幸也。沙遜謝而已。室中燈光燦然。几上炳雙紅燭。大如臂。二人讓沙上坐。虬髯者左。猥喙者右。酌酒滿叵羅以勸。庖人進蒸豚。置利刃於上。虬髯者起。舉刃剗肉。剗肉於刃。以啖沙。沙顏色不變。食其

肉而吐刃於几上。次又進熟雞子。上架鐵箸。蝦蟆者起。叉雞子於箸以進。沙又食之。而吐其箸。二人顧而笑曰。沙君真傑士也。俄虬髯者喚賽專諸何在。階下一人應聲出曰。酒間無以爲樂。請以劍舞。遂掣雙劍於前。白光閃爍如電。寒氣逼人。舞畢。倚劍立。虬髯者顧謂沙曰。劍術何如。沙笑曰。技至此。亦可謂神矣。然其中尙有罅漏。僕有雙鐏。請一獻其技可乎。虬髯者曰可。沙乃出雙鐏。置几上。解衲襖作欲舞狀。振衣一揮。室中燈燭盡滅。遂飛身上簷際。縱躍疾走回肆。曰。奴輩意殊惡。不可久居此矣。星夜歸吳。沙自經此險。深自閉匿。不復與人論拳勇。有請角其技者。固謝不敏。後卒以壽終。香飲樓

### 夢葫蘆

尹秀才廷一未第時。每逢下場。必夢神授一葫蘆。放榜不中。自後遇入闈。心惡之。而每次必夢葫蘆。然屢夢則葫蘆愈大。雍正甲辰科。入闈之前夕。尹恐又夢。乃坐而待旦。欲避夢也。其小奴方睡。大呼夢見一個葫蘆。與相公長等身。尹懊恨不祥。亦無可

奈何。已而榜發。尹竟中三十二名。其三十名姓胡。其二十一名姓盧。皆甚少年。方悟初夢之小葫蘆。蓋二公尙未長成故也。子不語

### 白帽子

張影繡庶常。南宮人。康熙戊午赴順天鄉試時。其父病。意不欲往。父強之再三。乃行。是夜宿旅店。夢有人送一白帽子令著。覺而惡之。自是每夜必夢。心悸欲歸。而父書至。言病良已。遂勉終場事。歸塗夢亦如初。抵家。父已久愈。而報人尋至。則張領解矣。是夕遂不復夢。明晨賀客麇至。一客忽云。邑中自大司馬白公後。久無冠冕者。喜君繼之。張始恍然而悟。白公諱圭。前明正統某科解元。累官兵部尙書。池北偶談

### 高二爸

高二爸寶坻人。爲捕役。藝絕倫。盜相戒不敢犯其境。歷任令頗優禮之。年七十餘。屢求退。令不許。會武清有盜拒捕殺事主案。捕不能致。令訪知高。遣僕卑禮厚幣以聘。並函致寶坻大尹。以卹鄰大義。婉致之。高不獲已。敦迫而去。至某處盜窟。其渠迎之。

入。令其下劇盜二三十人。一一謁曰。爾等皆非二爸敵也。問來意。曰。二爸亦太多事。我等相戒不犯公境數十年。今又理越境事耶。二爸曰。我來不獲己。因歷述武清令禮聘狀。邑令敦迫狀。且曰。我年已七十。旣敢來此。數莖朽骨。尙自惜耶。不得案中人有決一死鬪耳。渠曰。遠來大不易。且共飲。羅列酒肴。延之上坐。酒三巡。獻肉一盂。一盜曰。我欲敬二爸肉一方。敢食否。應曰敢。盜持刃之銳者。刺肉置高口。高張其口承之。盜并力戳刃。穎已爲齒所格。力旣竭。不能進毫末。拔之亦不能出。相持逾炊許。渠曰休矣。敢不令案中人隨公去。高張其口。盜持刀坐數武外。洗盞更酌。三更向盡。飲噉畢。卒獲二賊歸案。邑侯袁家駒榜其門曰。勤公勵俗。年八十餘卒。回部之尊稱曰爸。高回人。至今人呼高二爸云。蝶階外史

### 黎世序

黎襄勤公世序。河南羅山人。初以進士令西江。上官命稽案至某縣。羊角風旋輿前不散。黎曰。汝冤魂耶。導我行。爲汝雪之。風果前導。至塚而沒。問里甲云。某甲新以瘞

子問其家。繼妻少艾。無子女。以饒於財。未嫁也。喚其妻至。美而豔。問若夫以何疾死。答以瘵。曰是有他故。吾欲驗之。某氏辯曰。驗有故。當我以罪。無故奈何。黎曰。我當其罪。棺既開。骨瘦如柴。驗無據。某氏喧號索命。黎無以難。姑懸待訪。某氏迭控於廉訪。中丞檄下。如星火至。省垣大吏。咸謂黎風顛。將參處。黎曰。固也。請賜一月限。世序訪不得實。罪無悔。憲許之。辭出。作星士裝。周行縣四境。二十餘日。迄無朕兆。心甚鬱鬱。一日微雨。奔至一村。避柴門下。老媪出。闔扉。問之曰。賣卜之人。暮無所歸。乞投宿焉。媪曰。我齒已暮。無所避嫌。家有三楹。客可宿。東偏屋。出脫粟飯之。問其家人。云有子某乙。日游蕩不歸。言之絮絮泣。俄有叩門聲。一男子入。攜酒肴餅餌甚多。呼母曰。今日博大勝。母可飽餐。媪告以有客在。導以見。因列酒饌。某乙曰。汝財星也。今日來。我博卽大勝。明日勿去。我再往博。明日去。至午歸。負赤仄累累。曰。汝真財星。因更買酒食以餉。飲既酣。某乙曰。欲與君結爲兄弟。何如。黎亦欣然。因勸之曰。觀子意氣不凡。何甘於下流。况有母。宜務正業。畜妻子。不宜自棄如此。某乙曰。我雖賦閑。然奉養老

母外。一身無罣礙。得錢多。卽樂一日。否則忍飢。要妻何爲。天下婦人最毒。某村某甲。家貲鉅萬。身不得其死。今且他人入室矣。要妻子何爲。黎曰。聞有縣官爲檢驗矣。某曰。此事除我知之。雖武侯復生。安能測其底蘊。縣官且由此得罪。他官莫敢問矣。黎曰。盍爲我言之。某曰。他人是非。言之何益。黎曰。僅我兩人。保無漏言。閑談佐酒。庸何傷。某曰。我梁上君子也。一旦入某甲家。掘後牆探首入。見某甲臥牀上。其妻與一男子。各持燭持剪。自竊盜中出小蛇一。置某口。以剪剪蛇尾。蛇痛極入腹中。某甲大呼。氣已絕矣。婦人與男子收蛇尾並剪。置盜中。埋牖下。然後同飲同臥。我觀至三鼓。怒髮上指。不復竊。遂歸。縣官何人。遂能測耶。旣而曰。我明日仍往博。子母去。賣卜村市。晚歸同飲可也。黎曰。我卜子三日內有奇禍。無出門。過此以往。當交佳運。終身喫著不盡矣。汝在家坐守。我出賣卜。約晚仍會於家。黎出。暗令人騎馳至省垣。見廉訪。請復審。拘某乙來。謁堂下。視堂上賣卜人也。黎曰。第吐實。保無害。某乙供如前。從牖下掘得竇。盜蛇尾剪刀並存。再檢棺中。小蛇亦出。供證確鑿。某氏無所遁。乃供在室時。

通於表兄某。既嫁。夫有瘵疾。不能滿其慾。與表兄計。夫死無跡。貲既饒。與表兄暱。不嫁終其身。案定。抵某氏及其表兄於法。羣以爲龍圖復生也。後黎官至河帥。迎某乙母去。奉養若母。約某乙不爲盜。日給錢一緡。任其游矚。先母舅王泗和先生宰羅山。聞諸邑人云。蝶階外史。

### 鬻花瓶

京師某乙。貧徹骨。然素恥求於人。並日而食。無飢寒之色。惟日坐琉璃廠骨董店中。店中人亦以其誠樸。時周之。一日。有乘車至者。白騾昂藏。小窗穴晶。怒馬前導。侍從如雲。蓋太監某也。買一花瓶。索廿四金。已增至廿金。店故昂其直。太監悻悻欲去。某乙曰。汝輩太不曉事。難得售主如意。偶折閱。庸何傷。他日不能使汝利三倍乎。店中人亦恐不售。許焉。太監悅。謂某乙曰。我居內城某巷。暇時可見過也。攜瓶上車去。俄有人衣冠甚都。向某乙拱曰。請問一言。可乎。偕至酒家。飲於僻室。曰。我劉姓。某省方伯僕也。主人命我住京師職升遷。頃聞某省中丞缺出。欲爲主人營此缺。非某監不



可。子能爲主人一言。事成。以五萬金爲謝。立約券焉。某乙歸。破屋一椽。以席爲衾。意某太監一面初識。遽與言營幹事。焉知不逢彼怒。苟謝去之。五萬金可惜也。終夜展轉不成寐。遲明。念前門內關帝君籤極靈。往卜焉。購香一瓣。蹀躞往。至廟門。見冠珊瑚冠。簪翠羽者自內出。將登車。又有冠寶石冠者方下車。各道寒暄。出者曰。某中丞出缺矣。答曰。適已得旨。僉放方伯。蓋卽某乙意中人也。喜極不暇求籤。爇香叩謝。亟歸告劉姓者曰。若何慫恿。乃得集事。持五萬金券兌焉。某乙遂爲富人。不復坐骨董店矣。蝶階外史

### 銅鶴銅爐

正定梁氏家。有銅鶴一。中空有蓋。如尊彝狀。夏日置廳事。蚊蚋蟲豸。咸從鶴口吸入。半日持向院落。揭蓋放之。傳爲蕉林相國所遺。內庭物也。後貧不知售何處。又贊皇人掘古塚。疑是李相國墓道。獲古銅器甚多。中有一爐。蓋作十二辰相。土人得之。初不甚貴異。一日焚香爐中。煙縷縷自所屬口中吐出。周一日夜。十二屬環應無差。乃

寶若球璧。今亦不知落誰手矣。蝶階外史

### 皮毬

京師骨董肆。有皮毬一。渾合無縫。十餘年無問者。後有人問價。答以五百。其人卽出錢付之。肆主戲曰。此至寶。非五百金不可。其人笑曰。焉有一皮毬直五百金者。然愛不釋手。市人評定之。以五十緡購去。肆主問所用。不答。尾之歸寓。叩再三。矢無悔。其人旋出刀如雪。破毬。乃一巨珠也。大如李。圓勻瑩徹。光鑑數百步。蓋珠產海外。渡海時。夜有光。蛟龍見之。將鼓風浪攫去。韜以毬。乃得免水厄。達中國耳。後其人售珠致富。按查初白敬業堂集。有皮毬詩。載毬中藏藏經全部。蠅頭細書。與此異。蝶階外史

### 鶉

某僧住持蔡材之興善寺。村隸武清。距京師百餘里。僧好蓄鶉。蓄鶉以萬計。最後得玉鶉。純潔如雪。長頸短尾。儼然一小鶴也。玉鶉好博擊。每翔起高三四尺。如俊鶉落。一擊輒中。閱千百鶉無與敵者。西賈某蓄一黑鶉。色純墨。短小精悍。每與鶉遇。張兩

翼伏地。如燕掠水。啄利如錐。當者辟易。人謂玉鶉爲天龍。墨鶉爲地虎云。兩人以鶉故。雅相愛好。惟相戒兩鶉勿鬪。各恐傷其尤物也。久之。他蓄鶉者。皆不敢與鶉鬪。兩人不得已。倩他人持鶉下圍而潛伺焉。所倩人固不知也。旣合。兩人各變色。旣已無可奈何。見玉鶉怒伏以待。墨鶉張兩翼伏地以啄。啄玉鶉膺。玉鶉已受數十創。血殷羽毛。突亦張兩翼。效墨鶉狀。往來馳驟。無慮四五百度。最後人不見鶉。第見黑白影馳逐如梭。觀者千人皆屏息。嘖嘖歎賞。以爲得未曾有也。玉鶉忽躍起高五尺。突下一擊。黑鶉目精已爲抉出。垂翅逃去。西賈怒。出白刃相讎。僧謝曰。我固不知也。墨鶉敗。誠可惜。請以玉鶉償子。何如。西賈慚而罷。僧從此不令玉鶉鬪。閉以雕籠。籠畔繫狹狗。有人近籠。輒狂噬。他人飼玉鶉。玉鶉不食。僧自飼乃食。時鶉爲僧所勝金。已買田百頃矣。任城某公子。以好鶉負千金。卑禮厚幣。假玉鶉去。盡返所負金。僧壽七十餘。與鶉相依爲命。一日僧方握鶉。忽示寂。鶉亦在僧手中死。

## 沙彌思老虎

五台山某禪師。收一沙彌。年甫三歲。五台山最高。師徒在山頂修行。從不一下山。後十餘年。禪師同弟子下山。沙彌見牛馬雞犬。皆不識也。師因指而告之曰。此牛也。可以耕田。此馬也。可以騎。此雞犬也。可以報曉。可以守門。沙彌唯唯。少頃。一少年女子走過。沙彌驚問。此又是何師。慮其動心。正色告之。此名老虎。人近之者。必遭咬死。尸骨無存。沙彌唯唯。晚間上山。師問汝今日在山下所見之物。可有心上思想他的否。曰。一切物我都不想。只想那喫人的老虎。心上總覺捨他不得。子不語

### 高參領

鑲白旗漢軍高參領。以拳勇聞。同時林某。福建人。爲香山教習。亦負盛名。高訪之。相與較談。言多不合。氣復不相下。衆欲觀二人優劣。咸慫恿之曰。曷決於一試乎。高乃攘臂立庭中。林亦忿忿相搏者久之。衆慮有一傷。復從旁解釋曰。二公皆妙手也。吾輩已深敬服矣。請暫息。二人乃止。林閉口不發一言。掉臂下山去。衆目送之曰。教師怒極矣。高獨笑而不答。林行至山半少住。俄而蹲身於地。不測所作。良久復行。衆疑

之好事者跡而觀之。但見鮮血一掬。血中纍纍然。不辨何物。於其地撥視。則牙齒八九枚。始悟交手時。林齒已中高拳。故高之無言。林之閉口。各已默喻之矣。自是高之名愈震。後十餘年。高爲江寧協領。適張家口市馬數十匹至。將軍坐箭亭閱之。馬一湧入柵。勢不可止。高不及迴避。爲馬頭所觸。正中口。齒落十數枚。或言馬卽林之後身。說亦近理。夜譚隨錄

## 某廣文

某學廣文。耄而貪。諸生皆惡之。適有少年科甲之學使來。最惡白髯。見之輒曰。汝已老大。好讓後生矣。必罷之。故斑白者皆聞聲而懼。此廣文鬚髮皓然。遍求烏藥。又不肯解囊。勒派諸生代覓。有生謂之曰。門生之戚宦於東粵。有好烏藥。名透骨丹。初染色紅。三復之。則黑如明漆。澤潤有光。眞無價之寶也。門生感師恩。僅分得少許。敬以奉贈。廣文大悅。謝而受之。如法試驗。一染而紅。再染而絳。三染而紫赤色。愈洗則愈鮮明。儼如道院中所塑之祝融像。見者大笑。尋其門人。不知所往。竟不敢赴試。致仕。

歸去。生始告人。其藥以龜溺熬紫草爲之。卽染髮纓之法。不能改色也。此廣文者。蓋終身爲紅鬚子矣。夜雨秋燈錄

### 超勇公軼事

超勇公索倫人。卽伊徹滿洲也。少以軍功。累晉公爵。聞公出征時。沿途供億。必遣心腹偏將某甲前驅預備。公平日嗜好。唯某甲能知之。凡啓節。每到驛館下馬。卽顧某甲。問所需各物俱備否。某甲鞠躬對曰諾。公色然喜曰。好孩子。狠會辦事。甫入門。某甲手捧髹漆紅盒一。屈膝以獻。去其蓋。內盛徑寸大蜘蛛百枚。螂蛆螻蛄蠹蠹等物。稱是。公一一去其鉗爪。生啖畢。某甲侍公登堂。樑左右懸兩巨蛇。粗如椶。長丈有奇。公睨而嬉笑。拔金錯刀寸斷。大嚼如咬甘蔗。食訖。某甲屈膝告退。公獨入後室。內有蠢胖村婦八人。年皆二十以來。裸體以待。公一一遞接已。乃呼從者具湯沐。進冠服。出見客。客退。又呼某甲來。讚之曰。好孩子。很會辦事。凡沿途供應。必如此方愜公意。不則竟日忽忽不樂。帳下部曲。訶責鞭箠。無所不至矣。又聞公過戈壁瀚海等地。常

數百里無人烟。村婦難致。則以肥壯水牛代之。故出征必多隨水牛聽用。按日輪交四牛。牛輒不能與公敵。公恨其不能勝任。則手刃。而生饗之。觀公所爲。可謂天人。彼樊舞陽之生食豚肩。常開平之與虎豹交。以公較之。皆不足爲奇矣。里乘

### 褚復生

上海邑志以藝術著者。如璩君瑕之畫。楊伯立之詩詞。陳悟泉之數學。董杏芬之仙術。皆挂人口。而褚復生士寶。又以拳勇稱。褚居西郭。家素封。自幼負膂力。好技擊。旣長。游學四方。與畢昆陽武君卿爲友。遂精槍法。橫矛飛越。旋轉如風。名曰四平鎗。數百人莫能近。福王南渡。以兵部員外郎何剛薦。授伏波營遊擊。未之官。而南都破。遂終老於家。其技不輕授人。得其傳者。惟王聖蕃池天榮二人。池又傳於浙江提督喬照。同時邑有獨骨張擊者。虎頸版肋。力舉百鈞。橫行市廛。恆爲商旅患。衆請褚除之。褚曰。試觀其技。於是衆商設席延張。褚亦赴焉。酒再行。褚挑以微語。張自誇其勇。酒酣起舞。攘臂作格拉勢。褚徐徐以箸點其胸曰。子盍坐而言乎。張遂坐。終席默然。褚

亦無語。頃之。張辭去。衆謂褚曰。渠傲睨若此。君何不交一手。褚曰。彼若稍遜。猶可活。惟以驕故。今必死於途矣。衆猶未信。次日。聞張死於亭橋。徧體色青如靛。乃共駭服。蓋褚運神功。中人要害處。於三時之頃。傷卽入骨。能致死耳。今城西隅有褚家墳。其子孫猶聚族居云。墨餘錄

### 卜者梁翁

海昌張端林父。爲雲南尉。卒於任。端林迎父櫬歸。道由湖廣。米價甚廉。以宦囊所有。糴八百石。舟運入豫。江值大風。望船多處收泊。至一村落。面面皆河。客舟環泊。中有一大家。高其閤閤。厚其牆垣。門前停舟更密。端林登岸散步。偶入酒肆。沽飲獨酌。聞人議論卜者梁翁。知人過去未來事。言休咎其應如響。端林就客問之。始知卽大宅內之人。遇異人傳大六壬著名。問卜無須開口。卽知所事。因此起家巨萬。近以年老。每日只賣十二課。須黎明至其家。與掛號者清錢百文。課金一兩。得列簿內。則得占。遲則掛號不及。卽不得與。人爭趨之。有不遠千里而來候教者。故門前舟常滿也。端



林亦起意問卜。次日賣銀錢入其家。門房內設櫃。掌櫃者係其親戚。收儀登號。及端林去。十二數已滿。強之增添。則曰非翁自主。不敢有加也。乃持簿邀十二客入內。端林隨入觀之。登堂入室。室中陳設精雅。有老翁年近八旬。帶四品冠。據案上坐。前列牙籌一個。兩旁設四小几。各具筆硯。其徒四人。伺應書單。前後坐椅環列。客入。翁起讓坐。客各就位。掌櫃人開簿唱號。曰第一號某客。請抽籌。客抽送翁前。翁觀籌掐指。謂其徒曰。某客得某時以某事問課。主何凶吉。徒舉筆照錄。所斷皆合來意。無一爽者。十二課次第畢。客亦陸續退出。端林目注神凝。忘其進退。翁忽謂曰。遠客不及入號。老朽合送一課。以盡地主之誼。足下姓張。從滇南來耶。端林曰然。何以知之。翁曰。足下坐於離宮。正時屬午。度值張宿。我固知之。今日乙卯三傳。申酉戌爲日之財官。值貴神。虎常玄武白虎。凶神同官。爻爲有官之尊屬。舟中合有父棺。戌爲地獄。生前曾爲司獄之官。太常爲米麥。附酉金而兼連茹。當帶有稻米。兩金重四。其八百石乎。寅申一冲。箕星動矣。明日寅時。轉西北風大順。未傳爲地。足與卯作合應。十二月之

卯日到籍。其米不但不得價。且顆粒全無。緣財入玄武耗散之手。盡化爲三傅之鬼矣。足下其慎之。端林得課回舟。果於五鼓得順風揚帆而進。於臘月二十六日己卯。抵邑之王家橋。改歲之際。無暇安葬。泊舟處有姊夫陸某。米客也。借其閒地權厝父棺。因思米運入家。宗族強借可虞。不如近就姊家。以寄於棧。端林奉母回城度歲。歲朝往賀姊家。叩關而入。其姊對之號泣曰。爾姊夫虧客貨千餘金。上年爾所寄之米。被客強起去。姊夫無以對爾。今不知遁於何處。端林憶及梁翁之課。慨然曰。數已前定。果無可逃。姊毋惶急。忝在至親。米價不足討論矣。我爲尋訪姊夫歸家可也。

夜雨秋燈錄

### 蟻陣

曩在毘陵市上。觀蟻陣。見一人藉地坐。左右置黑赤髹漆方盒各一具。盒各三層。寬各盈尺。旁各有小孔。出入如蜂房然。觀者次第歛錢畢。其人將黑赤盒各取首一層。列地上。彼此相距約二尺許。又取黑赤小旗各三竿。插左右。相距尺有咫。又出一小竹筩。長五寸許。吹之嗚嗚然。作簸邏聲。又擊細腰鼓三通。但見每盒所蓄蟻。絡繹自

孔出若有千餘。各投所插色旗下。中旗蟻帥約長一米左右。兩副將長稍殺。餘俱細小。與凡蟻等。赤左黑右。列陣畢。其人又擊鼓數聲。各帥乃督蟻兵爭前交綏。前後進退。與鼓聲緩急抑揚相應。兩軍相持良久。忽見赤隊蟻帥率衆便退。左右兩副亦率衆分路俱退。黑隊蟻帥便統左右兩副率衆前追。約逾赤旗界才二寸許。忽見赤帥又統衆轉戰。兩副亦從兩翼截出。三面合攻。黑隊陷入重圍。帥知中計。情甚窘迫。同兩副竭力衝突。竟不得出。亡者甚衆。勢窮援絕。鼓聲頓止。其人急出小銅鉦。連敲數杵。忽見赤蟻讓路一線。黑帥急同兩副率敗殘餘兵。倉皇奪路而出。又鳴鉦數聲。兩帥各統衆。次第由孔入盒。是役也。黑蟻陣亡。共計三百三十有五頭。赤蟻亡者僅二十有七頭。其人手拈篋絲。定目視地。撥數戰骨。太息謂衆曰。頃者倘不急鳴金收隊。則黑蟻全軍覆沒矣。便將赤盒蓋揭開。請衆觀獻俘。但見盒中罽界縱橫。凡二十有五方。中一罽。又劃分前後各半。前爲蟻王聽政之所。後爲妃嬪所居。以箬葉爲廬。蔽不可見。但見蟻王鉅若赤豆。氣象英傑。端拱殿中。帥同兩副。匍匐詣王前。交頭隱隱。

不知作何語。蟻王首肯。似甚嘉悅。須臾。帥同兩副退下。羣蟻迎上。交頭隱隱。亦不知云何。但見羣蟻爭前獻俘。將所噬黑蟻之首若足。各銜置殿前。築若京觀。王顧左右。似有所諭。兩蟻似是近侍。下殿不知傳何旨。蟻帥又獨上殿。詣王前伏聽諭旨畢。緩緩退下。兩副同羣蟻迎上。又交頭隱隱。不知云何。似俱欣欣有喜色。羣蟻便趨至殿前。將所築京觀。各銜出。擯棄盒外。始各歸列。其人便將赤盒蓋好。觀者欲散。其人曰。未也。有賞卽有罰。旣觀獻俘。不可不觀治罪。便又將黑盒蓋揭開。請衆觀治罪。但見盒中方罽。亦與赤者等。其王亦大如豆。端拱殿中。似甚震怒。正副三帥。伏殿前不少動。似甚惶恐。少選。王顧左右。似有所諭。但見王旁羣蟻。類近侍者二十餘頭。分半下殿。將三帥後股。約噉有數十許。三帥崩角乞命。但見王仰首不知作何語。始罷噉。三帥稽首謝罪。緩緩退下。王亦退朝。羣臣亦各歸列。其人又將黑盒蓋好。觀者咸嘆息稱奇而散。予詢其人曰。蟻乃極微之物。君以何術馴致若此。其人曰。蟻雖微物。其性極靈。盡其性而導之。不半月。便可演熟。予曰。各插小旗三竿何也。曰。使之辨識。各歸

各隊也。吹竹筒何也。曰使聞聲之多寡。知派幾許隊伍也。擊鼓三通何也。曰促其出。盒列陣也。再擊鼓以作其氣焉。兵法所謂鳴鼓進攻也。既戰酣而停鼓敲鉦。亦猶鳴金收兵之義也。予曰。君言是矣。顧每陣無論孰勝孰負。必有所傷。如今日黑部陣亡不少。日日如此。不將漸滅無噍類乎。曰每陣亡之多者。休息五日。少者三日。故將列陣。必先歛錢。計得小人五日糧。乃可博一戰。曰必須五日何也。曰兩部皆日日將雛育出。一日乳之。二日哺之。三日便知自食。四日便成立。五日便列隊。故必須以五日也。曰每部所蓄蟻幾何也。曰每罫僅容百頭。除中罫王宮計之。當各二千四百有奇也。曰今日所出隊伍幾何也。曰吹簫六聲。係派六成隊伍。計每部應出一千四百有餘也。曰每盒三層何也。曰上層爲衆蟻所居。中層將雛。下層儲胥。曰盒中方罫二十有五何也。曰中罫爲王宮。環王宮之八罫。將相百官各執事居之。緣邊十六罫。庶民居之。曰王宮後半。以箬葉爲廬蔽之何也。曰是妃嬪所居。不使人見。所以別內外。明尊卑也。蟻雖微物。固禮義廉恥。四維畢張也。予肅然謂曰。何謂也。曰王宮居中。各官

早晚兩朝。時無少愆。每罽男左女右。序無少紊。凡所供億。皆取給於庶民。無敢或怨。是其禮也。有功必賞。有過必罰。號令嚴明。毫無寬貸。一遇急難。互相護救。是其義也。凡出覓食。一有所得。歸鳴於衆。同往舁運。上之於官。官又上之於王。命儲庫中。以濟公用。不致少有所私。倘王賞有功。卽私存誌之。衆亦不敢攘奪。是其廉也。凡蟻交皆有時。不令人見。其性最警。人欲竊窺。卽便分散。是真知恥也。又示以盒之中層。亦分二十有五罽。中罽爲妃嬪將雛之地。外八罽爲命婦將雛之地。外再十有六罽。爲民婦將雛之地。諦視所生之子。纍纍然與蝨蟣相類。又示以盒之下層。但分三罽。都有旨蓄。予曰。是人爲之。抑自取之歟。曰。蟻貴自食其力。人所供者不貴。故日出覓食。預置各物於外。以待其飛挽斯可矣。曰。蟻以何物爲貴。曰。其上者龍眼肉。其次胡桃肉。再其次羶膩各物。再其次枯死蟲豸。而穀粒亦所珍惜。故穀粒另置一罽。日食粒幾許。皆有定額。不敢虛糜。凡日所將雛。必報王。乃可給糧。予曰。其王亦出陣否。曰。間或有之。然兩王出陣。彼此皆持重。不甚盪決。反不如命將督帥之能鏖戰也。曰。今日赤

部大捷。其王賞有功當賚何物。曰今日賞賚必重。非龍眼卽胡桃也。其人言畢拱手攜盒款步而去。里乘

### 六指人冤獄

嘉慶年間。浙江某縣鄉人。有娶妻者。合巹之夕。新郎自洞房出如廁。至夜半。家人皆已倦臥。始聞新郎返入房中。黎明家人方起。見洞房已開。詢知新郎早出門矣。亦未知異也。旣而數日不歸。家人始怪之。相與跡至廁中積薪之下。忽見一屍。則新郎也。大駭。詰問新人云。花燭之夜。新郎入房。片時旋出入廁。夜半始入房就寢。天將明。詳問我金銀首飾共有若干。藏於何所。我一一告之。彼云。性喜早起。囑我且睡。少頃則聞其已出。今檢視首飾。皆無有矣。家人問其狀貌若何。答云。夜半燈影朦朧。未能諦視。但見其右手六指。蓋新郎方如廁時。適有賊藏廁中。欲俟夜深行竊。旣見新郎。恐其號而執之也。遽前搯其項殺之。因假其衣以入洞房。次早席卷而去。是時村中有一六指人。素無行。爲衆所不齒。家人聞新人之言。以爲必此人矣。遂鳴之官。捕六指

人加以刑訊。遂自誣服。獄既具。論如律。新人以新郎既死。復遭汗辱。遂自縊。新郎之母。惟一子。見子婦俱亡。亦自縊。越數年。郡人有商於閩者。遇一人於逆旅。詢之同鄉也。其人忽問曰。吾鄉有一新郎被殺之案。其賊已得否。郡人曰。獄早定矣。賊且伏誅矣。其人面有喜色。方盥沐。不覺自匿其右手。驟視之。六指也。郡人覺有異。因窮詰之。且告以有人抵死。今雖告我何害。賊具吐其實。蓋賊與新郎。相隔一村。自殺新郎後。遠適閩省。既遇同鄉。乃欲探一實音也。郡人許以不洩於他人。陰遣人報本地有司執賊。一訊卽伏。閩省督撫爲之具奏。移案至浙江核辦。論賊如律。於是知縣以失入抵罪。自巡撫至知府。皆照例議處云。庸庵筆記

### 甲與乙爲善友

甲與乙爲善友。甲貧而乙富。甲將遠出貿易。託家室於乙。乙毅然諾之。甲既去匝月。妻以食用不給。遣子往乙求助。乙冷笑曰。曩與爾翁言。特戲耳。若眷口多人。將仰給於我。來日方長。但供給坐享。雖銅山亦易崩也。請別爲計。子聞言缺望。不得已。又哀



懇之乙拒益力。子怏怏歸。返命於母。甲妻嘆曰。今天下所謂金蘭之友者。類如此矣。米罄薪絕。舉室愁對。計無所之。忽乙之老僕來。甲妻數其主人負諾之非。僕亦頗爲不平。義形於色。且曰。人情反覆如此。焉用友爲。夫人第請息怒。老僕聞夫人一家。皆精女紅。曷不以針黹生活。較勝求人。甲妻曰。汝言固善。奈無貲何。僕曰。果爾。老奴自有良策。老奴常爲主人會計。各店頗蒙取信。夫人應需何物。老奴可暫往各店支取。俟鬻物償貲。亦無不可。甲妻大喜稱謝。遂央僕貸得絨線布帛等類。日督女婦諸人。壹志刺繡。自旦達夜。不肯少休。每業一物。僕卽攜去。代鬻於乙。乙賞其精巧。不吝厚價。甲一家食用。賴以不乏。久之。漸有贏餘。舉家甚德老僕。而益不直乙。乙自甲去後。亦絕不過問。初甲出門。同人合權子母。三年客囊充物。旣歸。見家室無恙。衣食豐腴。意是乙所賙卹。詢之妻。妻唾且罵曰。君休矣。君若徒恃金蘭之友。則一家之骨肉。不填溝壑也。幾希矣。乃痛數乙所爲。並頌僕德。備述縷觀。甲不勝詫異。將詣乙詰責。乙見甲歸。大喜。執手敘闊。情誼殷拳。甲忿不能遏。作色曰。別後以家室相累。今幸不致

餓孳。微君之惠不至此。乙笑曰。君疑僕耶。誠然。老僕之代夫人經營者。皆鄙人之所籌畫。而指使之者也。鄙意如夫人暨諸弱息。皆在妙齡。君既遠出。舉家無主。若使坐食偷安。反恐逸蕩生事。故藉鍼滸使之作苦。閑束身心。不有以難之。則有所恃而業不專。又高其值而以利誘之。則更有所貪而益忘倦。僕之爲君謀者。不可謂不忠矣。豈真需繡飾藏爲玩好者耶。乃使左右舁一箱至。見頻年所購各物。堆積其中。燦然如新。顧謂甲曰。僕留此實無所用。請仍攜歸。俟女公子迨吉。小助妝奩可也。甲至此始知乙用心之深。用情之摯。把臂痛哭。再拜謝過。歸述於妻妾子女。始各恍然。無不感激涕零。嗟乎。如乙之於甲。是真不媿爲友矣。安得今天下所謂金蘭之友者。盡如是耶。里乘

### 某先達

鄉先達某公未遇時。貧無升斗蓄。而嗜酒落拓。不事生產。夫人葉氏有賢德。以紡織給公。每食必留以待。不敢自飽。時或斷炊。則置火酒一杯於几。公歸見酒便會意。飲

訖卽大步去。以爲常。公每深夜未歸。夫人登樓望。遙見紅燈二盞。照一人冉冉來。漸近數十步外。則燈杳而公至矣。夫人知公必貴。心竊喜。嘗準此以候門。一夕。燈未見而公已叩戶。夫人大疑。問公曰。間作何事。公曰。不過賭錢喫酒耳。夫人曰。非此之謂。意君所爲。或有傷於陰隲者。公曰。是無他。惟爲相識某。代寫一轉婚書。旣非我所說。合且其事旣成。不書亦嫁。故代書之。想無害也。夫人曰。咄。旣云不書亦嫁。書將安用。此事攸關名節。斷不可爲。其速往毀。遲恐不及。公如聞棒喝。言下頓悟。卽馳往。託言書尙有誤。當改。其人出書。公急毀而納諸口。曰。我不作此也。遂返。及抵家。而夫人已笑候門左矣。未幾。時當大比。夫人曰。日往月來。老將至矣。凍餒豈長久計耶。值今槐花復黃。曷不藉以自奮。公曰。我亦思之。奈貧竟至此。祇求百文。尙難度日。何來多金作考費。夫人曰。同袍中或有能挈帶者。試謀之。倘少有所需。妾當罄所有以助。公因徧探交好。則已俱就道。繼至牕友顧某處。知少一僕。因未啓行。公曰。弟亦欲往。奈無盤費。君等欲覓僕從。弟願稍貼舟金。爲之執鞭。君能帶弟一行乎。顧曰。是何言。君本

鴻才遠器。衆所敬服。豈敢屈爲隸人。公曰。此弟自願。諸君能周旋。弟已感甚。縱不賤視。弟亦何敢少怠耶。顧曰。如君言。同人諒無不允。某日兄蚤至東門碼頭。喚某船戶可也。是日顧卽言之同伴。衆皆駭曰。某嗜酒好賭。妻孥尙不顧。肯爲人服役耶。且彼雖貧。亦士流也。帶挈旣無此力。若以隸役之。反難免衆議。此事萬不可。如必與俱。擬各他就。顧曰。奈已許何。一友曰。另伴亦難。君旣約彼某日。我等可先期動身。彼無資本。未與共事。亦難深罪我等也。衆然其議。至期。公襪被出。徧覓顧舟。不得。徘徊間。又遇試友下船。公趨問。始知顧與衆人。已於某日動身。將出關矣。公聞爽然若失。自嘆爲貧所困。致人厭棄至此。不如投水以死。繼又念囊中尙有錢二緡。係細君物。不知費幾許心血。乃始穿就。當覓相識寄回。方不辜負。遂離岸。不數步。聞有相喚者。乃舊識某。近開糧食店於浦灘者。曰。先生赴試動身耶。時尙早。盍少坐。時公欲以被銀相寄。遂入店。某奉茶而前曰。今科先生必高中。當預備賀儀。奉擾喜酒。稍頃。卽送先生下船。不知泊船何處。公聞某語。不禁淚落。無一言。某更駭問。公因述前事。某曰。先生

有志赴考。豈以此阻。奈我力綿。未能獨助。姑在此一飯。我當商之同輩。倘得集資贈先生。亦不枉與市井人屈交耳。但不知費應幾何。公曰。十貫足矣。飯畢。某卽出。公獨坐以待。少頃。某偕短衣草履者五六人歸。指公曰。此卽赴考某先生也。衆探懷中。各出銀錢置桌。曰。請收會錢。公問故。某曰。此皆同業。適爲公合一會耳。公感謝。某曰。今日不及起行。我作東道主。沽酒餞先生。兼請諸君。是晚各歡飲盡醉。散時已二鼓。衆曰。夜深矣。我等宜送先生歸。遂同進南關。及過倉前水關橋。前行者忽止。公問故。衆曰。有巨人跨立橋上。不得過。公乘醉趨上橋。迫視之。其人高與城齊。仰望面目。黑暗中糢糊不可辨。跨立橋中。不言不動。公以手拍其腿曰。汝亦太自便矣。不顧人行走耶。速讓。其人縮左足。側立讓公。公方與四人過。則又跨立如故。三人後至。皆自跨下出焉。未幾。三人者俱死。始知所遇乃凶神。以公福大。故讓之耳。明日。公就道。是科卽以高魁獲售。明年連捷成進士。由縣令歷任顯要。有政聲。或云此卽喬潤齋光烈中丞事也。墨餘錄

## 一文錢

一文錢者。姑蘇布店也。初徽商甲乙二人。合夥挾重貲。至蘇貿易。各昵一姬。不吝揮霍。兩姬固奇女子。嘗半夜無人時。謂二人曰。從古勾欄中搗媪。無好相識。有錢則奉爲上賓。無錢卽標諸門外。比比皆然。日來窺二君囊金。漸次蕭索。君等挾重貲。背鄉里。爲權子母。今爲妾等耗費殆盡。脫不早爲計。其何面目歸見家人。願熟思之。甲乙亦以爲然。以戀戀不忍割愛。苟且安之。搗媪每有所求。必百方謀畫以厭其欲。無何。典質旣罄。遽爲搗媪齒冷。將下逐客之令。兩姬曰。何如。君等不聽妾言。早知有今日矣。妾等不幸。身墮下流。實非所願。蒙君等割臂要盟。刻銘心髓。觀二君意氣。不過暫時落莫。必不久困。不如暫歌別鵠。努力以圖恢復。妾等當誓死待踐昔約。報君有日矣。各餽白金五十兩。趣令早去。甲乙無可如何。不得已。受金揮淚而別。時歲將暮。二人姑就酒壚。對酌禦寒。並市飪餽餅餌等物充饑。心緒煩冤。飲罷忘攜餽金。歸寓始覺。急覓不得。逆旅主人。促索稅貲。勉強典衣以應。行李一空。二人計窮。日則行乞。夜

則寄宿古刹。恥過兩姬之門。避道而行。會除日薄暮。二人拾得枯枝。就地燃火。相對  
歔歔。甲於腰橐摸得一錢。擲地嘆曰。重貲散盡。留此一錢何益。不如拋去。乙忽心動。  
急拾取曰。此碩果也。天幸留此一脈生機。安知非剝極而復之兆。遽攜錢出口。君姑  
待之。我自計。甲莫喻其意。少頃乙歸。手攜竹片草莖敗紙鷄鴨毛等物。甲問何爲。  
乙笑出麵粉。索水調漿。就火光中。將草纏竹片。上蒙以敗紙。又偏黏鷄鴨毛。昇甲視  
之。宛然各種禽鳥。甲曰。君處此愁城。尙何作此兒戲。乙但笑而不言。竟夕。約成二三  
百具。平明。以半付甲。邀同至玄妙觀。自有料理。甲姑與俱往。觀爲姑蘇遊觀之藪。春  
日尤盛。比至觀。士女雲集。婦女見甲乙所攜禽鳥。以爲酷肖。爭來購買。頃刻俱盡。每  
具十數錢。共計五千有奇。甲至是始嘆乙心思靈巧。樂不可支。因問一錢何用。曰。竹  
片草莖敗紙鷄鴨毛等物。皆係拾諸市上。以一錢市麵粉。豈不恰敷所用耶。相與大  
笑。自是購添彩色紙張。雜鷄鴨毛。以肖人物花草等狀。兩人夜間分製。日至觀求售。  
自春徂夏。纔百日。計斂錢三千餘緡矣。因變計居積貨物。往无不利。不兩年。積貲數

萬。遂於閨門開設布店。大書一文錢三字。榜於門。誌不忘所自也。乃各具千金。爲兩姬脫籍。姬各出私蓄相助。經營不數年。財雄一方。爰遣人至徽。迎取眷屬。兩家相約。世爲婚姻。迄今二百有餘歲矣。閨門外泰伯廟前。一文錢三金字。大如栲栳。猶煌煌照人目云。里乘

### 某甲

某甲。農家子也。其父母愛之。以其荏弱。不任農事。有叔父開藥肆於市。使從之學。賈其叔父嗜飲。每日必使就對門屠肆沽酒。甲時年十二三。眉目娟好。屠婦愛之。輒多與之酒。如是數年。甲年十六七矣。屠婦語之曰。若知我愛汝乎。曰知之。然則何以報我。甲曰。不知所報。婦笑曰。易耳。乃出酒肉共食。食已。招之登樓。私焉。嗣後伺屠他出。輒就之。事祕無知者。一歲。值中秋。藥肆中友。皆出步月。甲亦與焉。已而雨作。諸友皆反。而甲後之。及肆。則門闔矣。念叩門而入。必爲叔父所責。正徘徊間。屠婦適開樓窗。下視。樓固臨街者。見甲在下。招之以手。甲曰。屠在乎。曰。買豬去矣。乃開門納之。登樓



而寢焉。會屠亦遇雨而歸。呼於門。甲窘曰。奈何。婦曰。無妨。使尾其後以行。匿甲於門側。屠入而甲出。不知也。甲念夜益深矣。叩門而入。叔父怒更甚。乃立簷下以待天明。俄其婦又啓窗。見甲猶在。曰。未歸乎。曰。然。屠安在。曰。醉而眠矣。甲因遺其帽於樓。乃以手自捫其頭。且伸手作索取之狀。婦曰。諾。未幾開門招甲。甲入。曰。屠在招我何爲。婦曰。已殺之矣。甲驚曰。奈何殺人。婦曰。汝以手示我。使我殺之。何問焉。登樓視其牀。赫然死人也。問何刀。曰。屠刀。刀安在。曰。在牀下。甲卽就牀下取刀。斫婦死。而取帽以出。徑歸其家。給其父母曰。頃偕諸友步月。行稍遠。距家近矣。故暫歸也。父母喜而留之。有皮匠者。藥肆之鄰也。素豔屠婦而未得間。遲明荷擔出。過屠肆之門。見門虛掩。入之。無問者。皮匠固知昨暮屠出。而不知其反。私計婦必獨寢於樓。乃登其樓。則屠死於牀。婦死於地。流血濡其履。驚而走出。歸而閉戶臥。久之。天大明。列肆皆啓。見屠戶已啓而無人。呼之不應。入視得狀。又窮履迹而至皮匠之門。遂縛送官。不勝鞭箠。自誣服。越數日。某甲反。諸友告之曰。對門屠肆夫婦。爲鄰人皮匠所殺矣。甲曰。信乎。

曰到官已自承。不久將尸諸市矣。甲曰此我爲之。何誣匠爲。叔父掩其口。甲不可。走縣搗鼓以聞。述本末。官曰義士也。未減其罪。竟不死。

### 某銅匠

某甲銅匠也。居蘇州閶門外。孑然一身。而頗有積蓄。然性儉嗇。衣履不完。所居破屋兩間。中惟草薦敗絮而已。一夕獨坐未寢。時風雨交作。忽聞門外有泣聲。啓視一少年女子也。頗嬌麗。問所自。此女操江北口音。自言父母俱亡。爲族人誑誘至此。將鬻我於倡家。恐陷入火坑。故冒雨而逃。然我無歸矣。言已又泣。且出金簪一枝付甲。求爲之計。甲旣豔其色。又利其財。乃招之入室。曰室止一榻。奈何。女靦然曰旣至此。固惟君所爲矣。甲喜。擁之而臥。及天明。女起爲執爨。若甚相安者。俄有江北人數輩。排闥而入。見女曰。在此矣。乃並執甲。曰汝誘藏良家女子。當縛送官。女俯首不一言。甲亦無從置辯。衆人徧搜室中。得金簪。並金約指十六枚。洋錢數十。問女曰。簪與此等。皆汝所攜來乎。女點首。乃盡攫之。挾女出。復欲拉甲去。一人故相解勸。乃舍之。闕然

而散。

## 乩仙

秦對巖宮諭家。有乩仙。適吳令君伯成至。知其召仙。必欲觀之。宮諭延之入。時所請者。云是李太白。令君曰。請賜一詩。乩判云。吳興祚何不拜。令君言。詩工固當拜。又判云。題來。時有一貓蹲於旁。吳指之。卽詠此。又判云。韻來。吳因限九韭酒三韻以難之。乩卽書云。貓形似虎十八九。喫盡魚蝦不喫韭。只因捕鼠太猖狂。翻倒牀頭一壺酒。吳乃拜服。

## 介溪墳

嚴介溪爲其妻歐陽氏卜葬。召門下風水客數十人。囑曰。我富貴已極。尙何他望。只望諸君擇地生子孫。能再如我者而甘心焉。諸客唯唯。未一月。有客來云。某山有穴。葬之子孫貴壽。與公相埒。介溪命羣客視之。一客獨曰。若葬此。子孫雖貴。但氣脈大遲。恐在六七世後耳。俱以爲然。介溪買成開穴。中有古墳墓志。摩視之。卽嚴氏之七

世祖也。介溪大駭。急加封識。然自此嚴氏大衰。且籍沒矣。此事嚴後裔名秉璉者所言。子不語。

### 三斗漢

三斗漢者。粵之鄙人也。其飯須三斗粟乃飽。人故呼爲三斗漢。身長一丈。圍抱不周。鬚虬面黑。乞食於市。所得莫能果腹。一日之惠州。戲於提督軍門外。雙手挈二石獅去。提督召之。則仍雙挈石獅而來。提督命五牛曳橫木於前。三斗漢挽其後。用鞭鞭牛。牛奮欲奔。終不能移尺寸。提督奇其力。賞食馬糧。使入伍學武。乃跪求云。小人食需三斗粟。願倍其糧。提督許之。習武有年。馳馬輒墜。箭發不中。乃改步卒。鬱鬱不得志而歸。遊於潮州。值潮之東門修湘子橋。橋梁石長三丈餘。寬厚皆尺五。衆工構天架。數十人挽之。莫能上。三斗漢從旁笑曰。如許衆人。頰面汗背。猶不能升一條石塊耶。衆怒其妄。命試之。遂登架獨挽而上。衆股栗。橋洞故有百數。辛卯年圯其三。郡丞范公捐俸倡修。見此人能獨挽巨石。費省工速。遂命盡挽其餘。賞錢數十千。不一月。

食盡去。莫知所之。或云餓死於澄江。子不語

### 癡女子

昔有讀湯臨川牡丹亭死者。近時聞一癡女子。以讀紅樓夢而死。初。女子從其兄案頭。搜得紅樓夢。廢寢食讀之。讀至佳處。往往輟卷冥想。繼之以淚。復自前讀之。反覆數十百遍。卒未嘗終卷。乃病矣。父母覺之。急取書付火。女子乃呼曰。奈何焚寶玉。自是笑啼失常。言語無倫次。夢寐之間。未嘗不呼寶玉也。延巫醫雜治。百弗效。一夕瞪視牀頭燈。連語曰。寶玉寶玉。在此耶。遂飲泣而瞑。耳食錄

### 顧鶴鳴

顧鶴鳴。常州廕生也。挾相人術。在吳越間。所至傾動。久著聲稱。嘉慶乙亥。客於滬。下榻豫園。言人禍福。率多奇中。邑有無賴子陶奇山者。一日亦往相。顧言其面某部位隱起殺紋。直透眉際。將遭官匪牢獄之厄。並云不出三日。若不驗。此後亦不再相矣。言過切直。觸陶怒。突起揮一拳。不意適中要害。隨擊而斃。鄰右繫陶送縣。獄成。遂擬

抵嗟乎。陶不足數。若顧之術則亦神矣。而罹禍尤奇。余獨怪其精於相人。而疎於自相也。何哉。墨餘錄

### 測字

崇禎末年。流寇信急。上日夜憂勤。一夕遣內臣易服出禁。探聽民間消息。遇一測字者。因舉一友字詢之。問何占。曰國事。曰不佳。反賊早出頭了。急改口曰。非此友字。乃有無之有。曰更不佳。大明已去其半矣。又改曰非也。申酉之西耳。曰愈不佳。天子爲至尊。至尊已斬頭截脚。內臣咋舌而還。又南昌張曼胥儲。大學士張位之弟。醫卜堪輿風鑑之術。靡不通曉。萬歷間。遊遼東歸。語人云。吾觀王氣在遼左。又觀人家葬地。三十年後。皆當大富貴。閭巷兒童走卒。往往多王侯將相。天下其多事乎。人以爲狂。旣而果一一皆驗。乃知真龍之興。非偶然也。

### 牆洞解元

湖城某上舍。赴浙江鄉試。旣入闈。文思枯窘。日晡不得一字。時向鄰號某生問題義。

某厭之。曰君是時尙白卷耶。曰然。奈何。某曰。我已作得三藝。自顧不甚佳。草稿在牆穴中。君可取去。毋溷我。生大喜。經取錄之。榜發領首薦。時稱牆洞解元。香飲樓

### 盜舟對聯

海盜蔡牽既伏誅。餘黨賊目猶數十。連艘海上。往來劫奪。爲患於江浙間。數歲不絕。百菊溪相國。總督江南。探賊艘所在。單騎往撫。羣盜邀入舟中。割腥羶。酌酒奉公。公飲啖自如。陳說禍福。洞中竅要。出空劄數十道。許授以千把總等官。盜皆羅拜乞降。惟一盜夷然不顧。勸諭再三。終不肯屈。予之官。亦不應。其艙中懸一聯云。道不行乘桴浮於海。人之患束帶立於朝。盜亦非常人哉。香飲樓

### 石異

宋牧仲筠廊偶筆。載有人於歸州香溪。得一石。大如斗。剖之。得雌鴛鴦石一枚。後復過此溪。又得一石。剖之。得雄鴛鴦石一枚。因琢雙杯。寶用之。已奇絕矣。余幼時。嘗聞學士云。有人寶一水石。上作山樹形。尾有杜詩一句云。石出倒聽楓葉下。其人絕愛

之行篋中常以自隨。一日過黔州某溪。偶於篷窗把玩。失手墮水。因停舟僱人撈取。良久得一石。大小無異前石。而花紋迥殊。末亦有詩句。則櫓搖背指菊花開也。再下搜取。復得前石。此等神物。其生之也奇。其合之也尤奇。秋雨庵

### 于廟祈夢

毘陵周蓉和先生未遇時。祈夢于忠肅廟。夢神予字一幀。錄唐詩云。寒雨連江夜入吳。平明送客楚山孤。洛陽親友如相問。一片冰心在玉衡。先生曰。結句是玉壺。何云玉衡。神曰。玉衡妙。玉壺便不妙矣。醒而不解所謂。後舉博學鴻詞。制題爲璿璣玉衡賦。恍惚前所夢。文思沛然。遂中選。授檢討。所謂玉衡妙也。後歷官清要。以宮詹予告。謝恩訖。賜印章一方。出朝視之。其文曰。一片冰心在玉壺。尋思舊夢。忽然驚悸。返第而卒。所謂玉壺不妙也。又韓城相公未遇時。祈夢忠肅廟。至則先有人在焉。問占何事。曰。求子也。遂並鋪而臥。其人夢神賜以竹管二枝。再叩。則曰。問汝並臥之人。公夢神與語。叩請終身。則亦曰。問並臥之人。寤而各述所夢。公告其人曰。昔孤竹君有二



子今夢此是佳兆也。其人喜極舉手加額而祝曰：願你狀元宰相，後皆如其言。

秋雨庵

## 科場事

有三人祈夢于肅愍廟。兩人無夢。一人夢肅愍謂曰：汝往觀廟外照牆，則知之。其人醒告二人。二人妒其有夢，僞洩焉者。卽於夜間取筆向牆上書不中二字。天尙未明，寫不字不甚連接。次早三人同往視之，乃一个中三字，果得夢者中矣。子不語

## 年羹堯

年羹堯幼時其父遐齡攜遊山寺遇一道人氣度充遠顧見羹堯撫之曰奇貴惜欠後福遐齡異其言問可術禳否道人曰術何能爲能從我學三年變化氣質或萬一耳遐齡欣然請道人館其家道人許之既至擇高樓與羹堯共居索桌凳數十具置樓上樓去梯飲食便溺以繩上下約三年乃得下樓遐齡既如約不復聞問家人間至樓下竊聽但聞樓上步履聲踊躍聲挪移桌凳聲指揮進退聲若演陣者逾年則聞書聲琅琅至夜不息書語隱奧不可解又逾年寂然無聲從他樓覘之則兩人相

對瞑坐。至是已三十月矣。會遐齡妻病急。欲見子。遐齡難之。妻搥牀哭泣。遐齡不得已。梯而呼焉。道人張目曰。敗矣。學備而養未至。他日必以氣償命也。嘆息辭去。稟施雜識

### 董邦達

當陽董邦達少時。以優貢生留滯京師。寓武林會館。資盡。館人迫之。徙於逆旅。質衣裝以給。無何裝盡。逆旅主人又逐之。窘無所之。有劉媪者。奇其貌。謂必不長貧賤。館之家。屬勤業以待再試。董日夜淬厲。期得第自振。且酬媪德。榜發。仍落第。恚甚。謀自盡。蹀躞街市。未有所也。倚一高門癡立。俄有人啓門。呵問誰某。董告以下第生。其人大喜。邀入款語。出紅箋倩書謝柬。署名則侍郎某也。旣而留食。互述生平。知爲侍郎。旬閤僕。以薦初至。適書謝柬。大爲主人稱賞。因請留董代筆。薄奉旅資。董方失路。欣然諾之。自是一切書牘。皆董擬草。往往當意。侍郎益信任僕。居頃之。侍郎有密事。召僕至內室擬稿。僕惶窘。良久不能成一字。侍郎窮詰。乃以實告。侍郎大駭。急延董至廳。具衣冠見之。且謝曰。使高才久辱奴輩。某之罪也。因請爲記室。相得甚歡。侍郎家

有婢敏慧得夫人意。夫人欲嫁之。婢不可。強之。則曰。身賤終隨輿隸。必欲如董先生者。乃事之。又安可得。故寧不嫁耳。夫人以告侍郎。侍郎哂曰。癡婢。董先生神志不凡。行且騰上焉。肯妻婢。會中秋。侍郎與董飲月下。酒酣。從容述婢言。且願納爲妾。董慨然曰。某落魄京師。盡京師不加一睨。公獨厚愛之。彼女子亦有心。何敢言妾。正位也可。侍郎終以爲疑。謀於夫人。女婢而壻董焉。踰年。董舉鄉試。成進士。後官吏部侍郎。生子爲富川相國。相國登庸時。太夫人猶在。兩窗消意錄

### 聽鏡

崑山徐大司寇乾學。昆季三人未第時。除夕相約鏡聽。乃翁偵知之。先走匿門外。俟三子之出。揖而前曰。恭喜弟兄三鼎甲。諸子知翁之戲已也。不顧而走。則有二醉人連臂而來。甲拍乙之肩而言曰。癡兒子。你老子的話是不錯的。蓋以俳語相戲也。己而果應其言。又錢唐黃文僖公機。未遇時鏡聽。聞二婦人相語云。家有二雞。明日敬神。宰白雞乎。宰黃雞乎。其一曰。宰黃雞可也。機雞同音。遂以爲讖。秋雨庵

### 蘭蠶

江以南蘭最多。而莫盛於閩。蘭叢中生蟲大如蠶。因名蘭蠶。以蘭膏爲食。不多得。閩人餉客。用古瓷盛一枚。獻之筵上。以爲加禮。客肅然起。主人持鹽少許。灑之。蠶倏化爲水。色漂碧。注醯醢中各一滴。香溢齒牙。亦食譜中所未見也。

### 乞丐作聯

前明靖難時。有乞丐作一聯。挽被害者云。恭喜兩先生。有志竟成。斫節烈頭。剝忠義皮。快活極矣。可憐一乞丐。無家可宿。洒英雄淚。秉春秋筆。於戲哀哉。語奇崛可喜。又莊烈帝徇國時。有乞人題詩橋柱云。三百年來養士朝。如何文武盡皆逃。綱常留在卑田院。乞丐羞存命一條。題畢赴水死。雨窗消意錄

### 譚襄敏夫人

宜黃譚襄敏公綸。夫人某氏。初配於李氏。于歸之日。遺矢轎中。臭不可邇。李氏醜之。卽反諸其母家。與絕婚焉。由是鄉里聞之。無肯委禽者。時襄敏貧而未娶。夫人之父。

使人喻意。願不索其聘。以女歸之。遂納爲婦。夫人旣淑且慧。不類愚嫗。叩其遺矢之故。終不肯言。後襄敏登嘉靖甲辰進士。歷官太子少保。兵部尙書。夫人以事召至宮中。出而笑謂襄敏曰。數十年之夢。今日始醒矣。向嫁李氏日。中途假寐。夢二女使如內家妝束。導吾至一處。宮闕巍煥。歷門闔數重。忽覺腹漲。欲如廁。女使引至一室。因據一紅桶而遺。覺而穢物汙襟矣。心甚恥恨。然知所夢之必非無故。姑隱忍待之。向所以不告人者。恐人有謂我飾詞而包其羞也。今至宮中。悉符所見。旣而登溷。亦儼然故處。使吾無當日之夢。不能有今日之事。然無今日之事。又安得有當日之夢哉。月下老弄人何狡獪也。襄敏噤然。耳食錄。

### 婢女代嫁

婢代女嫁。小說常載之。近乃實有其事。陶文毅公微時。家極貧。初聘同邑某氏女。歷歲餘矣。邑有富室吳姓。聞女姿色。謀奪爲其子婦。以多金餌女父。父利吳富。竟爲所動。迫公退婚。公不可。女之母亦不願。而其女惑於父說。已萌異念。私誓不適窮生。會

有養婢請於母。願以身代。母許之。文毅亦坦然娶之。卽後之膺一品夫人誥命者也。夫人右手背有疣凸起。藥之不愈。則少時操作。爲磨石壓傷耳。某女旣歸於吳。父子恃富奢蕩。又強佔鄰姓田。率衆毆鬪。吳子中傷暴卒。女無出。翁亦憤鬱死。於是族中強黠者。恨吳吝刻。宗族無所沾惠。羣欺某女寡弱。謂以吳氏私財飽外家。藉口侵吞其田產殆盡。至貧困無以自存。時文毅已貴顯。乞假回籍。鄰里嘖嘖言前事。公微聞之。質諸夫人。良信。太息久之。遂以夫人意。贈女五十金。女得之。愧悔欲死。日抱銀號泣。不忍用。卒爲穿窬者竊去。忿而自縊。遇救未絕。公嗣是歲致周卹不倦云。寶應朱詠齋先生。由浙江學政任滿還朝。舟過吳門。文毅方官蘇撫。同官演劇觴朱。令演雙官誥。文毅淚承睫。不能忍。朱私語同官曰。此我失檢。不知雲汀家亦有碧蓮姊也。金

壺七墨

### 潘封翁

吳縣潘相國之封翁。性好善。喜施捨。人有婚喪事。以緩急告者。無弗應。闔城以善人

稱之一日。閒步郊外。見涼亭中有一老者飲泣。解帶將自經。翁遽前止之。詢其故。其人曰。數日間將爲子娶婦。貸於戚友。得三十金。今日進城市。衣裙爲剪絡賊掏摸去。無顏見家人。故覓死耳。翁曰。此小事。吾償爾金以成其美。毋遽輕生也。拉之入城。向所熟店舖。假三十金予之。其人感泣叩謝。問翁姓名。不告而去。後數年。翁爲先人覓葬地。久之不得。偶偕地師至光福鎮。見水中有一墩。左右環以兩堤。若二龍搶珠狀。地師詫曰。此吉壤也。葬之後。必有大魁而位登宰輔者。顧無從得主者。姓氏。姑至一酒肆訪之。坐定。見當爐一叟。似卽向所贈金者。叟見翁喜曰。吾恩人也。奚爲而至此。翁告之故。叟益喜曰。此某之廢地。曩承拯救。厚施久不忘。欲報無由。惟朝夕焚香祝公福壽。今以是地爲可用。謹以奉貽。翁不可。與議值。叟不肯受。推讓至再。卽以前所贈三十金署券歸之。旣葬。相國之顯達。果如地師言。識者曰。此所謂陰地不如心地也。心地善。則陰地隨之矣。香飲樓

## 定數

有老翁精數學。一日有一道者來問數。坐其竹床。床遽壞。道者欲償其值。老翁笑曰。成敗有數。何償爲。遂取床足示之。有字一行云。此床某年月日。有仙翁來坐。床不能載。數當壞。因謂道者曰。子必仙人也。道者愕然曰。神仙亦莫逃乎數耶。言訖不見。堅觚廣集

### 茄字

世人誕罔。自詡博洽。談事則議論鑿鑿。或揭其謬。屢遷其說以文之。吳諺謂之假在行。朱復繹云。一蒙師在館中。偶與客小飲。食茄子。其徒忽問曰。茄字如何寫。師愕然未語。一客曰。草字頭。着加字。師認爲家字。毅然曰。要曉得茄字原出在易經。非我求童蒙。茄下童蒙求我。客曰。非此家字。師復認爲佳字。恍然曰。是矣。春秋不云乎。鄭國多盜。取人於萑。茄苻。客曰。亦非也。草頭下一勾一撇。着口字。師將指畫作勺口字。喟然曰。忘之矣。禮記開卷卽云。臨財毋苟。茄下得。臨難毋苟免。客曰。草頭下一勾一撇。不是這樣寫。師又凝思。復認爲刀口字。因厲聲曰。汝讀詩經。如何不曉得詩經上有



茗<sup>茄</sup>之華乎。客曰。又誤矣。只是草頭下一箇力字。一箇口字耳。師猛然想作立字。搖首瞪目。顧其徒而言曰。可見凡人。不特五經當熟。卽二典亦須博通。我每晨持誦金剛經。見有這箇茄字。所云須善<sup>茄</sup>下提。於意云何。佛告須菩提。至梁皇懺則云。南無<sup>讀如</sup>菩薩摩訶薩。相與闕堂大笑。曾見謔浪編載。尙書趙從善之子希蒼。官紹興日。庖人請判食單。欲食燒茄。問吏茄字。吏曰。草頭下着加字。卽援筆書蒙字。時人笑曰。燒蒙。則知以蒙作茄。亦不始此西席也。堅觚集

## 紀文達

世傳名人前因。皆星精僧。此說殆不盡虛。相傳紀文達爲火精轉世。此精女身。自後五代時卽有之。每出見。則火光中一赤身女子。羣擊銅逐之。一日復出。則入紀家。家人爭逐。則見其逕入內室。正譁然間。內報小公子生矣。公生時。耳上有穿痕。至老猶宛然。如曾施鉗環者。足甚白而尖。又若曾纏帛者。故公不能着皂靴。公常脫襪示人。不之諱也。又言公爲猴精。蓋以公在家。几案上必羅列榛栗梨棗之屬。隨手攫食。時

不住口。又性喜動。在家無事。不肯坐片時也。又傳公爲蟒精。以近宅地中有大蟒。自公生後。蟒卽不見。說甚不一。少時夜坐暗室。兩目如電光。不燭而能見物。比知識漸開。光卽斂矣。或謂火光中女子。卽蟒精也。以公耳足驗之。傳爲女精者。其事或然。惟公平生不穀食。麵或偶爾食之。米則未曾上口也。飲時只豬肉一盤。熬茶一壺耳。宴客肴饌亦精潔。主人惟舉箸而已。英煦齋先生嘗見其僕奉火肉一器。約三觔許。公旋話旋啖。須臾而盡。則飯事畢矣。又聽松廬詩話云。姜西溟不食豕。紀文達不食鴨。自言雖良庖爲之。亦覺腥穢不下咽。且賦詩云。靈均滋芳草。乃不及梅樹。海棠傾國姿。杜陵不一賦。以梅花海棠爲比。雖不食鴨。而鴨之幸固已多矣。又芝音閣雜記云。公善吃烟。其烟鎗甚巨。烟鍋又絕大。能裝烟至四兩。每裝一次。可自家至圓明園。吸之不盡也。都中人稱爲紀大鍋。一日失去烟鎗。公曰無慮。但日至東小市覓之。自得矣。次日果以微值購還。蓋此物他人得之無用。又京中無第二枝。易於物色也。

歸田瑣記

## 祈夢

新齊諧載安溪李公厚菴光地未遇時。曾祈夢於九仙山。仙示以詩曰。富貴無心想。功名兩不成。公悵然以爲必落魄終身矣。後中順治戊戌進士官至相。始悟戊戌兩字。皆似成而非成。想心無心。則相字也。聽雨軒

### 汪狀元詳夢

秀水商人某乏嗣。曾詣育嬰堂領一螟蛉。此子至中年。家頗贍。惟常以不知年庚爲憂。因祈夢於嘉興元妙觀。後冷仙祠。卽洪武時協律都尉冷謙也。地頗幽寂。禱夢甚靈。夢仙子以一桃核告之曰。爾須問同邑某殿撰。便能推詳。斯時汪公雲壑。名如洋。猶諸生也。適途遇此人。索解。示云。桃係木兆。木在天干始甲。桃開時。斗柄建辰。應三月。核亦係木字。旁拆開。木字是十八。定是甲辰三月十八亥時生。後汪公果於乾隆庚子科魁天下。始悟子平之推不妄也。聞見異辭

### 鄭仰田拆字

上虞倪公元璐爲祭酒時。與溫輔體仁忤。將請告。惠安鄭仰田者。善拆字。遇於同官

席上初未通名。取骰子中以緋飾四者予卜。鄭曰。京官四品而掌印者惟祭酒。公其祭酒倪公耶。公頷之。曰公必與當事忤。姓名中帶骨字者其人也。蓋骰子骨所成。而四面稜角。不能刊圓。以是知不合也。又曰。公意欲圖歸乎。必得請矣。骰體方。類口。四亦類口。乃回字也。後果然。堅觚廣集

瓦卜

萬曆間浙人楊生。善占瓦卦。隣嫗失雞。楊占云。往西方短牆上求之。有傍觀者笑云。據此卦。雞當在土墩矮樹上。非短牆也。俄而隣嫗獲雞。果在土墩矮樹。楊甚嘆異。其人袖出一書授楊云。此瓦卦秘訣。須細玩。三年後。吾來索酬。叩其姓名居處。不答而去。楊自此瓦卜愈神。越三年。其人果至。楊敬禮之。居數日。謂楊曰。吾明日將歸。子宜有所贈。然無費家財。只清晨一卜之所獲。便足酬我。楊不解所謂。乃自卜一卦。預知其故。書片紙置瓦下。黎明有負囊叩門來占者。楊問其姓。曰與君同姓。楊卽瓦下紙示之。上云。今日今時。有假楊姓者來。當縛送官。其人失色。楊云無恐。但須傾囊見付。

富指汝生路。蓋此人乃劫盜。事露將逃匿。故隱姓來卜。欲問所往。其囊中皆金珠也。既被識破。卽盡出以與楊。楊乃示一處云。於此削髮爲僧。可免患。盜叩首謝。以所獲酬授書者。其人笑而受之。別去。楊未幾亦他徙。不知所之。堅觚餘集

### 長洲周某

康熙中有長洲周某。年纔舞勺。應院試。遇一癡道人謂周曰。功名有路。消寒會。喜氣全憑一字中。不解何義。及十八歲入泮。則九九也。應鄉試數科。始中副車。聞報日。值重陽。亦九九也。八十一歲以老生欽賜舉人。亦九九也。歿後以子貴贈官。適九十九歲。亦九九也。消寒之數。無不相符。亦奇矣哉。履園叢話

### 范時行

乾隆三十九年間。蘇州范時行者。以相字來吾邑。寓於紫陽觀中。所言不多。而義理明徹。吉凶禍福。指示若神。每日以得錢六百爲率。過此則垂簾謝客。絕似君平之賣卜也。一營卒拈碁字以問終身。范曰。其字之下。加石爲圍碁之碁。加木爲象碁之碁。

圍碁越着越多。象碁愈着愈少。今君之碁字。係象棋。自君出世以後。恐家業人口。漸消磨矣。曰固也。我日後究竟何如。范曰。君家居總無佳處。若能出外。當有機緣。然十分得志則未也。問何以故。范曰。卒一過河。便可縱橫而走。但行僅一步。不能暢意馳驅耳。有以義字占終身者。范問生年何屬。答以屬羊。范曰難矣。義字分開。則上爲羊而下爲我。問屬羊者何人。曰惟我。問我有幾人。曰止一屬羊者。以此觀之。君當以孤身終。眷口恐不能有也。夫終身既無眷屬。則機緣際遇。安得而佳。其他可毋庸再問矣。一剃頭者盛其冠服而往。拈村字。范曰。木以長材爲貴。一寸之木。亦何所用。因以指拈筆桿橫而捻之。復曰。一寸之木。亦何所用。其人以爲道其剃刀之柄也。驚而失色。范曰。君勿自墮其志也。凡事若肯努力。則方寸之木。可使高於岑樓。後其人跟官出外。果發大財。一人以風字問所孕男女。范曰。風字之形。似鳳。鳳冠乃女人品服。且移虫字於兀旁。則爲虺字。詩云。維虺維蛇。女子之祥。所孕爲女無疑。後果然。

聽雨軒

長洲韓慕廬宗伯莢未第時。嘗祈籤於靈巖山寺。有功名須到五門知之句。不解所謂。及鄉試策問字。皆誤作門。闈中不覺。竟中式。由是成進士。魁天下。歷官至禮部尙書。頗有拜閣之想。會直省解鄉試卷至。閱所對策。率多蕪濫。私念少時闈作。將毋類此。因命吏檢視。見五門字。不禁啞然。且悟籤語。無復遠志矣。雨窗消意錄

### 神籤預兆

秦狀元大士。將散館。求關廟籤。得靜來好把此心捫之句。意鬱鬱不樂。以爲神嗤其有虧心事也。已而試松柏有心賦。限心字爲韻。終篇忘點心字。閱卷者仍以高等上。上閱之。問心字韻何以不明押。秦俯首謝。而閱卷者亦俱拜謝。上笑曰。狀元有無心之賦。主司無有眼之人。子不語

### 求籤

康熙己未。編修徐逸少先生。公車北上。禱其鄉大乘菴土神。得一籤。後二語云。今日杏園沉醉後。聲聲報道狀元歸。徐大喜。以爲必登大魁。是科一甲一名。乃常熟歸允

肅也。而先生亦捷南宮。授庶吉士云。

吾鄉王殿撰雲錦。康熙庚午舉南闈。至丙戌年。年五十矣。擬不與禮部試。求籤於關帝廟。有五十功名志已灰。誰知富貴逼人來之句。乃赴京。遂捷南宮。大魁天下。

關聖帝君籤。有前三三與後三三之句。鄧小山教授雲倬爲諸生時。祈得之。乾隆癸卯鄉試。中三名。閱十年癸丑。會試中九名。毛養梧主政繡虎。嘉慶己卯鄉試。亦祈得之。是科中三十三名。道光壬午會試中式。亦三十三名。未幾歿於京邸。年三十三歲。又一士子祈得是籤。中六十六名。

嘉慶甲子科。江南鄉試。長洲蔣廣文景曾。於關帝廟祈得一籤。有云自南自北自西東。及入場。首題爲謹權量至四方之政行焉。文後比卽用此句。下股對無黨無偏無反側。主考戴可亭先生以經語現成。密圈批中。履園叢話

### 術數之奇

丁卯周蓼圃檢討齋。偶爲扶鸞之戲。紫坪年十四。時供果中有西瓜子。紫坪漫撮而



問之。乩筆曰。三八之數。開掌數之。則二十四枚也。復撮問。曰。仍前數。數之。則三十八枚。復撮少許問之。曰。仍前數。數之。則十一枚。漫取不數。而亦能奇中。豈邵子之說不盡然耶。茶餘客話

### 扶乩奇驗

曾文正公嘗告幕客曰。余向不信扶鸞等術。然亦有奇驗者。李忠武公之克九江也。余方銜恤家居。一日。偶至余弟沅甫宅中。塾師方與人爲扶鸞之戲。問科場事。余默念此等狡獪。何足爲憑。乩盤中忽寫賦得偃武修文。得問字。余言此係舊時燈虎。作敗字解。所問科場事。其義云何。乩盤中又寫爲九江言之也。不可喜也。余詫曰。九江新報大捷。殺賊無遺類。何爲言敗。又自忖九江去此二千里。且我現不主兵事。忽提及此。亦大奇事。因問所云不可喜者。爲天下言之乎。抑爲曾氏言之乎。乩判爲天下大局言之。卽爲曾氏言之。時戊午四月初九日也。余始悚然異之。而不解所謂。至十月而果有三河之敗。全軍盡歿。忠武公及余弟溫甫咸殉焉。乩仙自言彭姓。河南固

始縣人。新死於兵。將赴雲南某城隍之任。道經湖南云。噫。一軍之勝負。關係甚鉅。此時文正雖奉諱里居。而東南全局。隱倚以爲輕重。忠武固文正舊部。而文正之弟。又在軍中。半年之前。敗徵未見。而鬼神早有以告之。凡事莫非前定。豈不信哉。庸庵筆記

### 十七字詩

正德中。有無賴子。好作十七字詩。觸目成詠。時天旱。太守祈雨未應。作詩嘲之曰。太守出禱雨。萬民皆喜悅。昨夜推窗看。見月守知。令人捕至。曰。汝善作十七字詩耶。試再吟之。佳則釋爾。卽以別號西坡命題。其人應聲曰。古人號東坡。今人號西坡。若將兩人較。差多。太守大怒。責之十八。其人又吟曰。作詩十七字。被責一十八。若上萬言書。打殺太守坐。以誹謗律。發配鄖陽。其母舅送之。相持而泣。泣止。曰。吾又有詩矣。發配在鄖陽。見舅如見娘。兩人齊下淚。三行。蓋舅乃一眇目云。堅瓠集

### 對語敏捷

高宗純皇帝燕見詞臣。出對曰。冰冷酒。一點水。兩點水。三點水。南昌彭文勤公元瑞

應聲對曰。丁香花。百人頭。千人頭。萬人頭。儀徵阮文達公元。在翰苑時。仁宗睿皇帝。因燕見。命以其姓名屬對。公卽對曰。伊尹。對語不難。難在敏捷。非有夙慧者不能。冷庵雜識

## 解大紳

解縉嘗從永樂遊內苑。上登橋。問縉當作何語。對曰。此謂一步高一步。及下橋。又問之。對曰。此謂後邊又高似前邊。上大悅。一日上謂縉曰。卿知宮中夜來有喜乎。可作一詩。縉乃吟曰。君王昨夜降金龍。上遽曰。是女兒。縉卽曰。化作嫦娥下九重。上又曰。已死矣。應曰。料是世間留不住。上笑曰。已投之水矣。應曰。翻身跳入水晶宮。上本欲詭言以困之。旣得詩。深嘆其敏。堅觚集

## 十三閣老

毘陵吳氏。大族也。明季科甲聯綿。簪纓絡繹。最著者有十三閣老。公幼時讀書之暇。散步登城。時已薄暮。忽見一婦人。長八尺許。衣麻衣。空惚而來。公怪之。執其裾問安

往。婦曰。我有緊要。何預若事。公固挽之。婦不得去。相持至更餘。婦曰。我披麻星也。某處某姓。今夕迎娶。日者犯我。我將往禍之。今時辰已過。我何能爲。祈放我。吳問日者誰也。曰。張心浦。將釋之。又躊躇曰。既係凶神。儻誑我去奈何。又持之半夜乃去。家人蜂集。輿載而歸。明晚。詣張心浦曰。昨某姓吉期。汝所擇否。曰。然。然則曷爲有披麻星也。曰。貴人星解之矣。越數年。公已舉孝廉。買舟詣江陰。是時學使按臨。見岸上垂髫幼童。行赤日中。令僕邀之至。問童姓氏里居。童曰。祖居宜興。周姓。延儒名。問年。曰。九歲。少頃。枕書而眠。吳曰。將書作枕。千秋賢聖共頭眠。周眡吳手中紙筆。一面繪天文。一面地理。卽對曰。把扇輕搖。一統乾坤隨手轉。吳大驚。又曰。童能入股乎。曰。能。爰以小子二字命題。頃刻而就。公閱之。益訝異。知童之非常人也。歸謀以猶女妻之。兄嫂不可。固強之。周是年補弟子員。吳致之家塾讀書。周穎悟絕人。而性流動。貌不颯。吳之嫂每怨吳。吳曰。請勿躁。此子聲名當出我也。每薄暮出遊。更餘乃返。吳嫂戒閤者閉之門。周往往從後門進。心竊啣之。未幾發解南畿。捷南宮。狀元及第。奉旨歸娶。

妝奩之盛。爛其盈門。相傳周夫人不輕顰笑。一日甫曉妝。聞夫壻中狀元。不覺嫣然一啓齒。周入閣。再笑。後以事入宮。皇后命宮娥數十人。簇宮燈送歸第。又一笑。俗稱三笑夫人。周娶後。謁岳家。不肯入大門。親友苦勸不聽。爲毀後門而高大之。令容高車駟馬。厥後周首相。吳次相。每入朝。周揖吳而先曰。有僭矣。夫以周之天資卓越。誠爲間氣所鍾。而事業經綸。難逃青史。惜矣。要之應運而興。其權奸氣象。蚤流露於對語間也。若十三閣老者。識豪傑於童年。困頓之中。士伸於知己。而絀於不知己。嗚呼。可勝感哉。

### 劍俠

康熙時。某督以重賞歸里。慮有盜警。募健者護之。某甲年弱冠。美如玉。甲爪長數寸。應募往。每至逆旅。解騾綱。堆篋滿地。某甲少飲。倚壁假寐。劇盜十人。由江南尾行十餘日。不見少年動靜。未敢妄發。至山東境。羣謀曰。今夜不刦。越境卽不得發。以其渠各有成約也。夜分。藝最高者一人先入。啞然號。旋寂無聲。次入一人。又入一人。胥如

之。七人曰。質明入室。以殺人訟之。味爽共入。惟少年及銀篋數十。尸則杳然。少年呼驟網從容去。七人惘惘至午。見室中央磚似新填者。啓之。見亂髮數團。膿血三四而已。蝶階外史

### 江慎修

江慎修。安徽歙縣人。好窮經。尤精卜筮之學。著周易釋義十六卷行世。其析理頗精。創三十六宮之說。謂易中乾坤坎離大過小過中孚頤八卦。皆無反正。餘可反正者五十六卦。其實只二十八卦。合之成三十六數。其說甚新。又謂河圖順生。洛書逆尅。按之皆確有見地。館同里某富家三年。兀坐一編。喜慍不形於色。一起居曰定數。一飲食曰定數。富家厭之。辭焉。慎修欣然去。明年重九日。富家集客爲茱萸會。慎修適過。主人邀入席。慎修盡三爵。食二饅首。遂起辭。富家挽留。慎修曰。定數也。引富人至書室廚後。見有徑寸帖書云。三年賓主歡。一日遽分手。尚有未了緣。明年九月九。邀我賞茱萸。酌我三杯酒。數定且歸休。只啖兩饅首。衆大訝。慎修平生不妄交。惟與同

村程翁善。程亦精奇門者。一日同醉歸。程曰。月色大佳。合乘輿入城乎。慎修曰。夜二鼓入城且十里。倘不及返。奈何。程指道旁石曰。此石今夜亦至城。何云不及也。慎修笑曰。誠然。但此石明日始返耳。旁觀異二人言。坐石旁驗之。俄有擔酒者。以擔後輕載石去。明午果載回。棄舊處。於是村中咸仙慎修矣。村有戴正者。負異才。過目不忘。聞慎修名。擔簦往學。慎修適他出。戴徑入室。據案翻閱三日。盡讀所藏書。慎修歸。戴師事唯謹。慎修問讀此間書未。戴言盡熟矣。慎修曰。能用否。戴曰未也。異日偕戴游隴上。見黃牛與黑牛觸。慎修問戴曰。牛孰勝。戴曰黃土也。黑水也。土克水。黃當勝。慎修曰不然。今於令爲孟冬。於日爲壬子。水旺。土斯廢矣。此理不可拘於一定。而學所以貴於化也。已而黑者果勝。戴大悟。學業日進。名遂與慎修埒。雍正初。大吏薦慎修於朝。上召見。慎修戰栗不能對。乃薦戴。戴口如泉湧。剴切詳明。上大悅。問卿與師孰優。對曰。臣劣於師。上曰。師優不對何也。對曰。師年耄。患重聽。若所學。固勝臣萬萬也。上嘉其讓。賜翰林。同治中。曾文正公搜遺書。得慎修周易釋義。爲梓之行於世。

麟趾軒

## 骨董店

東門鈕氏。世開骨董店。家傳兩燭阡。其形鶴。其色黑。久不見鬻。轉賣於蘇店。又不見鬻。共疑爲廢物。一日有客來。按良久。論價不昂。讎值挖鶴睛以去。歸語同伴曰。頃得一寶。蓋貓兒睛也。細告其故。伴問阡何在。曰廢鐵耳。仍在他家。伴遂至店。以數文買歸。曰子誤矣。天下豈有飾貓兒睛於頑鐵者。必金也。鎔之果是。又一客見紙舖中以鐵壓紙。狀如礎。高尺許。上刻馬字。問此何用。曰係隣家物。想是象棋。尙有車砲士卒之類。客低首沈思。以手舉之。復以指彈之。徑詣隣家。問象棋全乎。曰全。但散置各處。或壓菜。或作階砌。或被他家借去。搜尋半日。竟無缺。便問賣否。曰是無用物。平日受其累墜。一旦棄去。亦得清曠。但未知君將何用。客酬以值。喚人速舁去。剩其一。指曰。此棋如許。筋兩。若作戲具。決無此鈍漢。我舉之而重。彈之而空。當非鐵也。必宦囊多貲。隱金於內。人莫知耳。卽邀鐵匠來鑿。竟得金。隣人見而呆立。面作灰色。客乃舉以遺曰。聊償多年藏置之勞。予素不喜訑者言。而是爲朱啓在蘇所目擊。



## 賣蒲扇

邵椽軒先生。少屢空。日不能謀兩餐。曾賣蒲扇爲業。草鞋布襪。日遊於街。夜讀於室。弱冠後。博覽典籍。值字典新成。三月而讀畢。遇文詞幽突。如狼隲人。鯁金。夜中亦識。於是方聞綴學之士。咨問者盈庭。客又故造奇字以相難。寫詡字示之。先生曰。此字六書所不載。唯我能識。一手捏兩口。當爲亨聲去。鼻涕之亨聲去。字。其善詼諧如是。生平祇讀書。交歡伯。不律隄糜。日不暇給。手鈔書至五六百卷。明齋小識

## 夢馬言

乾隆十八年。山東高蔚辰宰河南延津縣。晝寢書室。夢一馬衝其庭。立而人言。高射之。正中其心。馬吼而奔。高驚醒。適外報某村婦盧羅氏夜被殺。以杙椽其陰。并殺二孩。高往驗屍傷。如所夢。乃順莊點名。冀有馬姓者。點畢無有。問外莊有姓馬者乎。曰無。高將莊冊翻閱。沈思良久。見有姓許名忠者。忽心計曰。馬屬午。馬立而言。則言午也。正中其心。當是許忠矣。呼許曰。殺此婦者汝也。許驚愕叩首曰。實是也。以姦不從。

故殺之。兩指被婦咬傷。故怒而椽其陰。并殺其子。但未識公何以知之。高笑而不答。視其手。血猶涔涔也。置於法。合郡以爲神。子不語

### 古人轉世

世傳明成祖靖難。殺戮忠臣甚慘。故再世爲莊烈帝。建文諸臣。爲流寇報怨。卒亡其國。此說荒誕不足信。然史閣部爲文信國後身。高宗聖諭。亦曾及之。桐城張封翁少時。曾夢金甲神。自稱晉之王敦。欲托生其家。封翁以亂臣也拒之。敦曰不然。當晉室喪敗之際。我故應運而生作逆臣。今天下清明。我亦當應運而生作良臣矣。驚寤後。果生一子。然未幾而夭。後數年。又夢敦來托生。封翁責之曰。汝果姦賊。復來欺我。今不用汝矣。敦曰。我歷觀江南諸家。福澤無逾于君者。是以仍來。今不復去矣。遂生文端公英。故小字敦復。相聖祖爲名臣。子文和公廷玉。歷相雍正乾隆兩朝。孫曾皆躋臚仕。福澤冠於江南。第不解以敦之凶逆。而再世乃膺福報。爲良相。文信國之忠節。再世雖仍爲宰相。而復丁陽九。作忠臣。報施之理。固如是哉。庸閒齋

## 卜者之謬妄

鄞有卜者。設肆於市。一日有男子在肆中大罵。勢將用武。衆人環集。問其故。人曰。夏間因人口不安。就彼問卜。彼問竈何向。我對曰南向。彼曰宜改西南。我謹如其言。乃至秋而仍多疾病。又來問卜。彼仍問竈何向。我曰西南。彼曰宜改正西。我亦如其言。今入冬後。病者未愈。加以貿易折耗。無聊之至。姑再卜之。彼問如前。及我告之。則曰宜改南向。是仍復其初矣。自夏徂冬。我奉彼爲著龜。乃顛倒如此乎。衆大笑。爲解勸之而去。余因憶親串中有從相宅者之說。一歲之中。三易其竈而復其初。與此相類。然彼則三人三說。此則一人而前後異說。尤可笑也。江湖術士不明真理。趁其妄說。固無足據矣。耳郵

## 庸醫

東關吳氏婦。偶發寒熱。邀醫視之。曰暑也。爲治其暑。不能愈。易醫視之。曰濕也。曰風寒也。爲治濕治風寒。又不愈。纏綿四五月。四肢漸腫。腹漸大。心衣不能約。則曰榮衛

不和。虛矣。極力補之。腫不退。凡城中讀靈樞素問者。悉延之。悉袖手無策。乃請專治鼓症者來。曰此鼓也。久爲庸醫所誤。攻之瀉之如故。踰旬腹痛復問前醫。曰痧耳。至晚生子。乃知前此有身也。然以攻補亂投。母與子俱不能生。明齋小識

### 翁覃谿

相傳翁覃谿學士。垂老康彊。目力尤勝。六七十時。猶能於燈下作細書。閱蠅頭字。不假顰蹙。每歲元旦。必用西瓜子仁。書四指字。五十後曰萬壽無疆。六十後曰天子萬年。七十後猶能寫天下太平云。可謂異稟。按翁氏家事略記載。英和按云。先生每於一粒胡麻上。作一片冰心在玉壺七字。則

尤爲神技矣。郎潛紀聞

### 少林寺僧

少林寺僧。以拳勇稱。欲學其藝者。先納貲若干。拜一人爲師。每日服食。皆取給於貲息。學旣成。從中門出。各門土木偶。皆有機。觸之卽拳杖交下。能敵之無恙。方可出師。設酒餞於門。反其貲。從此天下無與對。不然。仍返受業。往往學數年不能成。則越牆

逸去。貲亦不可得矣。一日。有瞽者來請業。僧視其瞳尙在。特外受膜障。持青銅錢五百。撒擲山上下。俾瞽者覓之。曰。盡得。當傳汝技。初不得。甚焦急。漸得一枚。輒喜。復連得數枚。日以爲常。兩餐外。躑躅山上下。暗中摸索。閱年餘。竟得四百九十九枚。其一大索不得。忽一日。摸得之。狂喜。目頓明。竟受其技去。又有患痿症者。兩股不能動。亦持貲來學。僧命沙彌拾石子盈筐。置其旁。山上畫大墨圈。命之擊。旣久。輒中。又畫小圈。無不中。乃命擊飛鳥。鳥應手下。後以石子小於芥者擲鳥目。目穿而墜。前後左右。惟所納之。無不如志。師曰。汝技成矣。後每坐船頭。護水標。身旁置石一器。劇盜咸不敢近。遂業此終老焉。蝶階外史

### 寶石

雲南邊徼諸山。產寶石。山高。人不能徑至。而猿居徧山。往來如織。人習弩。以丸彈猿。猿怒。羣拾石擲人。人往來避之。倏又彈以觸其怒。猿又擲石。石大小不一。人拾歸。棄其頑者。而貓睛石、紅靺鞨、祖母綠、五色陸離。羣歌得寶矣。亦有蘊璞中者。磨治成器。

售之可得重貲。萬物莫巧於人。利之所在。趨之如鶩。雖時有爲石所中。破面傷骨。或至於死者。亦不惜也。蝶階外史

### 象尊牛鼎

豐潤學宮有象尊牛鼎各一。象形製樸拙。高二尺許。橫一尺有奇。瓷作縹綠色。塵土膠膩不可拭。一二處未翳者。漉潤欲滴。眞所謂九秋風露越窰開。奪得千峯翠色來也。注以水。雖盛暑經數十日。色味不變。鼎三足皆作牛首形。銅質古雅。傳金建學時。有聲吼土中。循聲發得之。明時學吏置諸牆側。承屋漏水。尊復吼嘯不已。駭甚。移置几上。牆砉然頽矣。二物今尙存。高麗使臣過。必詣求觀之。摩挲愛玩。恆歎爲不可多得云。蝶階外史

### 買東西

兔園冊。崇禎中。思陵設游藝堂。爲涉覽文史地。有所疑。輒使中官問之詞臣。一日。忽命中官問詞臣曰。今市肆交易。止言買東西。而不及南北何也。詞臣猝無以對。輔臣

周延儒曰。南方火。北方水。昏暮叩人之門戶。求水火無勿與者。此不待交易。故惟言買東西。中官以其言入奏。思陵善之。愚意東主生發。西主收斂。或取東作西成之意。書之以俟博識。堅觚集

### 戲咒真死

聞有太學生在學舍讀書。偶晝寢。同輩戲以白紙書其姓字。爲靈位。設於桌上。更置楮帛香燭於前。反閉其門。而從外窺伺之。生旣寤。拭目熟視。大驚云。我豈死耶。遂嗚咽流涕。乃復就寢。久之不起。入戶視之。則真死矣。急輟戲具而諱其事。豈此生因疑駭喪其神魂乎。堅觚集

### 淨慈寺匾額

西湖淨慈寺。湖南第一山匾額。爲華亭董宗伯書。相傳前明寺僧某。修建殿宇旣成。尠人題額。乃設粉牌於門。自擊木魚。募書五字。文人墨客來游者。各爲留墨。僧視不當意。輒抹去。適宗伯游湖上。遂書之。僧留湖南二字。抹去第一山。詢之。則曰。第字需

立形。一字臥形。山字坐形。稍不穩。則立者蹶。臥者僵。坐者欹矣。公書雖佳。尙蹈此病耳。宗伯歸習之。半載。復游其寺。僧擊木魚如故。乃補書三字。僧大喜。加髮懸諸寺門。宗伯書法固迥絕恆蹊。而僧亦具正法眼藏者。香飲樓

### 山東朱翁

山東人朱翁。商於姑蘇。性好施與。有以緩急告。輒假貸之。不責其償。及病且死。其子問父。外人所假貸者。亦有契券乎。翁曰。此可勿問也。吾枕函中有一小匣。吾死。汝取視之。一生喫著不盡矣。俄而翁死。子發匣視之。中無他物。惟朱子家訓一篇。此翁大有晏子鑿楹之意。其所見高出士大夫上矣。耳郵

### 戲變

嘉慶己卯。湘潭朋毆之獄。其起甚微。湘潭居交廣江湖間。商賈匯集。而江西人尤多。江西會館曰萬壽宮。歲時演劇飲宴。是歲首事以江西優人來。登場歌舞。皆詰屈礧礧。不可聽。臺下人大笑。或以芒鞋土塊擲之。曰犒汝遠來。笑者益甚。聲如潮。江西人



大慚。怒且詬。湖南人強者應之。遂共爭毆。不可解。畏事者稍稍引去。江西人潛招其衆。闔門共擊湖南人。死者數百。傷未殊者縛之。於是市人訛言曰。盡殺湖南人矣。烹於鑊矣。釘於柱矣。割舌而醢之矣。市胥奔告知縣。知縣懼不敢往。在籍給事中石承藻謁知縣曰。江西人烹割縣民千百。知罪重必且爲亂。公閉閣能獨生乎。等死不如往救。或可止。知縣忿然曰。君責我能偕我乎。承藻曰。不能何敢勸公。乃俱往。至則門不敢啓。壯士舁石獅撞門。門破。知縣乃入。得未死者十六人以出。江西人皆散。於是湖南人皆憤相告。民商舟人數萬。共毀江西人店肆。遇江西人卽擊殺之。奔鬩喧呼。數日不絕。橋津關市必考其音。非江西人乃得過。往往誤死。事定。知縣以聞。巡撫吳邦慶。江西人也。嚴檄知縣捕治。衆皆散。莫得主名。先是市胥見衆洶洶入市。懼有變。鳴鑼於市。令各閉門備劫竊。遂以鳴鑼罷市爲胥罪。論斬之。獄未具。時論者皆謂當多殺湖南人。湘潭周系英。方官吏部侍郎。其子家居。僞爲父書。抵巡撫。巡撫奏之。上以系英越職與事。罷職令歸。閉門省愆。石承藻家居。論常右湖南人。爲巡撫所

廣說鈴 下卷  
効。亦罷。瞑庵雜識

七十八

上海图书馆藏书



A541 212 0009 5367B

中華民國九年冬月初版

廣說鈴全一册

定價大洋五角

\*\*\*\*\*  
\* 版 權 所 有 翻 印 必 究 \*  
\*\*\*\*\*

編輯者 上海進化書局

印刷者 上海進化書局

發行者 上海進化書局

經售處 各省埠大書局

本局發行所開設上海四馬路中市

4351

# 最新出版

## 學校用書

## 通俗用書

小學 紀事文模範

定價書 三四角

寫信百法

四冊三角

高等小學 論說規程

定價書 二角五分

日用文件備體

四冊三角

中學 論說規程

定價書 三角

普通應用新尺牘

四冊三角

增輯古文觀止

定價書 八角

詳註分類 女子新尺牘

一冊五角

續古文觀止

定價書 四角

中華新楹聯大全

四冊三角

## 詩文集類

## 筆記小說

原印 續文選

定價書 五角

中國奇男子傳

一冊五角

分類詳註 歷代咏物詩選

中紙 定價書 一元六角

近代奇物小誌

一冊四角

江左三大家詩鈔

定價書 八角

怪異叢譚

一冊四角

清朝書畫錄

定價書 四角

結婚笑話

一冊三角